

# KILISTÒ MMUSOKOLOLA

## MU DÎYÌ DYÈNDÈ MENE



Twinyikàayi mitù yètù.

Mukalenge Yesù, Mulami wa Cisumbu cinène cyà mikòòkò, tudi beena dibànzà Kúdi, Mukalenge, ditùdi katùyikù mwà kuKufuta bwà dinanga Dyùdi mupòngòlòle mu myoyi yètù mwònsò. Tudi tudyùmvwa katùyì bakùmbànyine patùdi twinyika mitù yètù ne biimàne mu bwikadi Bwèbè. Tudi tuKulòmba bwà kutùkezula ku bilema byònsò ne mpèkaatù yònsò. Tudi tulòmba bwà Wèwè kupà mibidi yètù dikàndà leelù ewu. Bààbùngì bàdi bàsaama ne biikàle mu ntàtu, mùdìbi bileejjibwe kaaba aka, bwà mishwalà ne malòmba bìdi bilwila ku tèlefonè ne myaba yònsò.

<sup>2</sup> Ne tudi twitabuuja ne tukàadi tujikija bwalu-bulonda bwà pa buloba ebu mpindyewu, nènku àbìdi aa cikondo necijiminanganè mu Cyendèlèlè, nènku tudi baswè kwikala badìlongòlòle bwà diine dîbà adi. Ki bwà cinyi tudi badìsangishe kaaba aka mu dindà emu, mbwà kudìlongolola bwà diine dîbà adi. Mbangabile ne kùdi bààbùngì bàdi bàtelejilà ku tèlefone mu dindà emu mu ditùnga dijimà emu, ku elu luseke ne lukwàbò. Mwaba wònsò wùdi mèyì ètù àfika awu, swàkù bwà kasùmbù kakesè aku kàbèneshiibwè. Ondòpàku babèèdi bàdi munkaci mwàbò abu, ne ndi ndòmba bwà Úkezulèku misùùkà yàbò ku bubì bwònsò. Nènku tükwàcishèku kaaba aka mu dindà emu, ku tabernacle, bwà twikala pèètu mwà kusankila dyèsè dinène adi.

<sup>3</sup> Nènku tudi tulòmba bwà Wèwè kwakula neetù leelù ewu mu Dìyì Dyèbè difùnda, ne swàkù bwà Nyumà àtùbuulwilè bintu bitùdi naabi dikèngela, bu mutùdi badìsangishe mu ditùnga dijimà emu mpindyewu, biikàle tuumvwa ne tudi cisàmbà cikesè, kàdi tudi ne mwaba munkaci mwà bapikula, bwalu tudi biitàbùùje Yesù Kilistò. Tùpèeshèku bintu ebi, Mukalenge.

<sup>4</sup> Nènku patùdi tujikija disangisha ne tuya ku mbànzà yètù mishìilèshìilàngàne mu ditùnga dijimà emu, swàkù bwà twàmbè, mùvwà bàvwà bàfùminà ku Èmawùsè abu ne: “Myoyi yètù kayìvwakù yilàkuka kapyà munda mwètù pàvwàYe wàkula neetù mu njila apu anyi?”

<sup>5</sup> Mpindyewu, Taatù, ndi mumanyè ne cyònsò cìndi mufwànyine kwamba ncifwànyine bulelèlè kwikala kaciyì cikùmbàne to, biikàle ne—ne beena Kilistò balenga mu ditùnga dijimà mpindyewu bàdi bakàngùle tudyòmba, kì ncifwànyine kwikala—kì ncifwànyine kwikala cikùmbànàngàne to. Kì

ncifwànyine kwikala cintu kampànda cìndi mwà kwamba cìdi cifwànyine kwenza bwà nsongu to, bwalu tudi bwònsò mu cipidi cìmwècimwè aci. Twètù tudi bantu, bàà cifwàkà. Kàdi lekèlà Nyumà Mwìmpè munène awu àkule; swàkù bwà Yèyè àshaalè mukwàte ku Dìyì ne àdibuulùlè ànu Yèyè mwinè. Tudi baMwindile mpindyewu, mu Dìna dyà Yesù. Amen.

Nudi mwà kusòmbaayi.

<sup>6</sup> Mémè ndi bu. . . ndikèma mémè mwinè. Mvwa mwambile mukàjàanyi, byòbi byenzèka ne ikale munkaci mwà kutèlejila, mu Tucson mwàmwa, bu mùumvwà ncìyì mwele meeji ne mvwa mwà kwikala ne disangisha pangàalukilà; nènku ncìvwa nànsha mutwàle bilàmbà to. Kàdi ke mémè kwambila mukàjì wa mwanàanyi, ùvwa munkomène nkooci, ne mémè kwamba ne: “Ndi nshààla mwimàne paanyimà pàà cyambilu, ne. . . Kì mbamanye ne mupanu ngwà mùshindù kampànda ne nkooci ngwa mukwàbò to.” Byòbi abi mbìmvwà mulwàte kumbèlu. Kàdi, Meda, yèyè ùvwa munkomène mutèèlù wànyi ne bikwàbò byònsò, nàнку cyònsò. . . Kuditàcishi to; kakwèna bwalu nànsha bùmwe to.

<sup>7</sup> Mpindyewu, tudi ne dilòmba kaaba aka, dyà ne kùdi mwanèètù munanga wa dikèma. . . Ne ndi ngèèla meeji ne—ne Prescott, ngèèla meeji ne, ùdi neetù ku nshinga mu dindà emu, mu—mu Prescott, mu Arizona mwàmwa. Tatwèndè wa Mwanèètù wa bakàjì Mercier ùdi ànu mu njila mutàngile kaaba aka ku disangisha edi, mùndi muumvwè, nènku bìvwa bimukèngela kuyabo nendè ku lùpitaadi bwà disaamà dyà mwoyi, Mwanèètu Coggins. Nènku, kàbìdì, Mwanèètù Junior Jackson, ngèèla meeji ne ùdi ku cisanji cìdi cilondà kwinshi eku aci, anyi ku tèlèfonè udi ulonda kwinshì mu Clarksville anyi mu New Albany, ne tatwèndè ùdi mu lùpitaadi, mùndi muumvwè, ne dipandiibwa dikolè dyà kànsèrè ku mucimà. Nànku tudi bushùwà baswè kuvùluka bwòbò abu mu masambila. Nènku mpindyewu kùdi bakwàbò kaaba aka, kàbìdì's, kàdi katwèna baswè kudyà dìbà to. Nzambì mmumanyè byònsò bwà bwalu bwàbò, nànku túbàsambidilaayi mpindyewu.

<sup>8</sup> Nzambì munanga, bu mùdi mukùlumpè munanga, wa kale, wa byanza minyèngù awu, Mwanèètù Coggins, nkòlomò wa kale mu budimi bwà bwambi, mwikale. . . mulààdika mu lùpitaadi mu dindà emu, mwaba kampànda, ùsaama disaamà dyà mwoyi wèndè. Nzambì, mwoyi wà kale mukwàte ne byà luse awu mmupicile mu ntàtu búngì cyanàànà. Ndi ndòmba, Nzambì, bwà kumukwàcisha. Enzàku nànku. Yèyè mmuswè. . . Yèyè mmunangè mwoyi ànu mutùdi twètù bwònsò aba banange amu's, ne mmuswè kwikala ne mwoyi. Mukalenge Nzambì, enzàku nànku. Tudi tumusambidila mu ditùngà dijimà mu Dìna dyà Yesù, bwà Wèwè kumwondopa ne kumupàtula. Tudi twitabuuya ne newenze nànku; yèyè neàlwe buludi mu disangisha emu.

<sup>9</sup> Tudi tulòmba bwà Mwanèètù Jackson, tatwèndè wa mushinga mukolè mmulàadika kuntwaku pabwipi ne lufu mpindyewu ewu, pèndè mulelè pa buloba apa nsongàalume mulenga bu Junior. Ndi—ndi—ndi ndomba, Nzambì munanga, bwà Wèwè kumwondopa. Ndi mumanyè ne bidi bimwèka ne kabyèna mwà kwenzeka to. Bamingàngà, bangàngàbukà, kabèèna—kabèèna bamanyè cyà dyenza mu bwalu bwà mùshindù ewu nànsha. Kàdi tudi tuvùluka Mwanèètù Hall, pèndè, pàakamba bangàngàbukà bàà batàmbe bwimpè ku bònso kaaba aka, mu Louisville emu, bàmba ne: “Nkumushàadile ànu ndambù wa mèbà mukesè cyanàànà bwà kwikalayè ne mwoyi,” mwikàle ne kànsèrè ku mucimà. Kàdi’s nyèyè ewu ne mwoyi leelù ewu, ne kùkaadi bidimu makùmi àbidì ne bitaanu, bwà ngàsà Webè. Pa nàнку ndi ndòmba bwà Wèwè kwondopa Mwanèètù Jackson leelù ewu, Mukalenge, enzàku bwà ngàsà Webè ne luse biikale nendè.

<sup>10</sup> Ne mushiki munène wà mishàlà wònsò ewu ne tulùlù ne bintu bidì bitèèka kaaba aka mu dilòmba abi; Wèwè udi mubàmanyè bwònsò, Taatù. Ndi ndòmba bwà Ùfilèku dyondopiibwa kùdìbò bwònsò. Mu Dìnà dyà Yesù Kilistò. Amen.

<sup>11</sup> Mpindyewu bwà kubanga, mu dindà emu, ncìvwa ngèèla meeji ne mvwa ne cyà kupwekà, mèmè mwine to, mu dyàlumingu dishààle. Ne pashiishe kàbidì, patwàkacimanyishà, mèmè kupweka. Mwanèètù Neville wàkakèba bwà mèmè kwakula’s! Nènku pashiishe twètù kumanyisha bwà ne netùlwe leelù ewu, kàdi kí ncimanyisha bantu pambèlù pààpa mu ditùnga dijimà emu to. Nènku tudi ne ndongolwelu wa maatèlèfonè ewu mpindyewu, udi mwimpè be, mwimpè mulenga be. Bantu bàdi mwà kusòmba ànu mu mbànzà yàbò anyi yàbò. . . badìsangishe mu myaba yàbò, èkèleeziyà yàbò, ne bikwàbò, ne kutèeleja disangisha. Ndi ngànyisha aci.

<sup>12</sup> Mpindyewu ndi mmòna bààdije mwaba ewu, kùvwa malòmba àbùngì be lumingu lushààle elu, pa címvwà mwambè mu dyàlumingu dishààle mu Diyisha. Ndi mupwè ne mwoyi mùmvwà muciinnyike mpindyewu’s. Kàdi mvwa mwàmbe cintu kampànda bwà bwalu bwà difuta dyà mabànzà ènù. Kàdi nudi bamanyè’s, nànsha wèwè wamba cinyi, bààbùngì kabàakucyùmvwà ànu bìmpè to. Kí nnè mbwalu bàdi. . . kí mbaswè kucyùmvwà bibi to, kàdi wèwè udi ànu ucyùmvwà bibi.

Ke mpindyewu muntu kampànda kwambaye ne: “Bìvwa bìkèngela bwà twètù kusùmba màshinyi anyi?” Anyi ne: “Bìvwa bìkèngela bwà mèmè. . .”

Mpindyewu, aci kí ncyàkambà Yesù to, anyi Bible mwaba awu, wàkamba ne: “Kanwikadi dibanza ne muntu nànsha umwe nànsha.” Aci’s mmabànzà à munèngànèngà anùdi mwà kufuta. Àfutàayi. Kabyèna. . . Aci’s ke kubènga kwikala dibànzà ne muntu. Kacyèna cyumvwija ne. . . Èkèlekèle, s’tudi ne cyà

kufuta mushinga wà difucila, facture wetù wa tèlèfònè, tudì . . . ne bikwàbò. Tudì—tudì beena dibànzà dyà bintu abi, ne tudì tubifuta. Kàdi, dibànzà dyà kale dinènge dyùdì mufwànyine kwikala wenda ufuta, ùdifute. Nwamònu anyi? Mpindyewu, kwikadi wenda ne cintu kampànda cikulembèlèlè mùshindù awu to.

<sup>13</sup> Ndi mvùluka cikondo kampànda cìmvwà nsaama, musangu kampànda pàncìvwà nsongààlùme. Mémè kupàtuka mu lùpitaadi mwikale ne dibànzà dyà ndola mitwe ku binunu bibìdì. Nènku kùvwa pa ciibidilu kàfwànkoolò mwab'ewu kale wàwa, Mukalenge Swaniger, mvwa ne dibànzà dyèndè dyà ndola mitwè ku nkàmà yìsàtù anyi yìnaayi, mushinga wà manga. Yèyè kàvwa nànsha mummanyè to. Kàdi muntu awu . . . Mémè kuya kùdiye. Ncìvwa mumumanyè to. Kàdi yèyè kuàtuma ànu kuntwaku, nànsha bìshi, kàyìku mwà kubenga kuàtuma to. Ke mémè kwamba ne: “Ndi neebè dibànzà.” Ke mémè kwamba . . . Ngèèla meeji ne, Swaniger . . . Ûvwa m'Mukalenge Mason lwà mu Mùsèèsù wà Court ne wà Spring amu.

Ki mémè kwamba ne: “Ndi neebè dibànzà. Nènku ndi—ndi ànu ne butekète bwà kacya, kàdi ndi nteeta bwà kuya ku mudimu. Mpindyewu, mémè ncìyi mwà kukufuta to . . .” Mémè ncìvwa ànu nshàdilakù mwena Kilistò. Mémè ne: “Cintu cyà kumpàla, Mukalenge Mason, bu mudimu wànyì kùdì Nzambì, ndi ne dibànzà dyà kuMupà byàdiikùmi byànyì. Ndi muswè kuMufuta byàdiikùmi byànyì, dyàmbedi.” Ki mémè kwamba ne: “Dibà adi mudimu wànyì wùdì wùlondà nkufuta mabànzà àànyì.” Mémè ne: “Taatù wànyì ùdì ànu ùsaamakana, ne yèyè . . . Nènku tudì ne . . . Tudì bânà dikùmi dijimà mu dikù.” Kàdi mémè kwamba ne: “Nèngìikalè . . . Mémè ncìyi mwà kukufuta meeyà mapìte pa makùmi àbìdì ne àtaanu pa mfranga ayi, ku ditùkù dyà difutu; mémè ncìyi mwà kukufuta nànsha meeyà makùmi àbìdì ne àtaanu awu to, nèndwile apa bwà kukwambilaci. Ndi nkwabwila ne: ‘Ncyèna—ncyèna—ncyèna mwà kucyènzà musangu ewu to.’” Mpindyewu, ku dikwacisha dyà Nzambì, ndi mufute kantu ne kantu. Nwamònu anyi? Kàdi aci's ke cìndì nswa kwamba, nwamònu anyi? Muntu kampànda kàlù ànu kwamba . . .

<sup>14</sup> Kaa, mwena Kilistò kampànda mwaba ewu mu èkèleeziyà emu musangu kampànda wàkapàtuka kuya kalongolweshà kàshinyì mwaba ewu, ke muntu awu kulwayè . . . Muntu awu kwambayè ne: “Nènkufutè. Ndi mfuciibwa mu disambòmbò,” anyi cintu kampànda. Ne yèyè kààkamufuta to. Ne paanyimà pàà mbingu ne mbingu mimanè kupita, ne kààkamufuta ànu to, nànshapù mwàkù wà kumwambilakù. Nènku—nènku muntu awu kulwa kunkonka, kwambayè . . . Nwamònu's, eci's cìdì cìleeja cibadi cibì bwà èkèleeziyà. Cìdì cìleeja cibadi cibì bwà Kilistò.

Paùdì kwèna mwà kumufuta to, ndaaku ùkamwabile,

wamba ne: “Ndi neebè dibànzà, kàdi nêngiikalè mwà kukufuta. Mémè ndi mwena Kilistò, kàdi ndi—ndi ànu. . . Ncyèna mwà kucyènza mpindyewu mene to, ndi ne. . . Ndi ne dibanza dyà cyôci eci.” Nènku, vùlukàayi ne, bìdi kàbìdì pa mikàndà yà Nzambì, nudi bamanyè’s, bwà nwènù kucyenza. Pa nàнку aci cidi. . . Ndi nteeta, bwànyì mémè mwinè ne bwà twètù bwònsò pàmwè, bwà kuteeta bwà kwikala badìlongòlòle, bwalu tudi bamanyè ne tukaadi pabwìpì ne cintu kampànda, pabwìpì menemene ne cintu kampànda ciikala ne cyà kwenzeka. Pa nàнку tudi baswè kwikala badìlongòlòle. Pàdì Dilwa dyà Mukalenge dyènda diseemena mpindyewu apa, tudi baswè kwikala badìlongòlòle bwà dibà dinène adi.

<sup>15</sup> Mpindyewu tudi baswè kudìlongolola ne kwakula mpindyewu pa kaacyena-bwalu kakesè mwab’ewu kàmvwà musungùle bwà mu dindà emu, ku dyambulwisha dyà Mukalenge. Nènku netwàkule ànu mu cikòsò ne mwètù mwònsò, bwa bantu bàdì bàtèelejila ku nshinga. Ndi ntèkemena ne nudi bwònsò. . . mu ditunga dijimà emu, nudi ne dindà dilenga bu mutùdì naadi munwemu mu Indiana emu. Cyuyuyà cilenga, cyà cyashima, cimpè citùdì naaci mpindyewu kacya mvùla wàlòka. Nènku mbìmpè byà menemene.

<sup>16</sup> Mpindyewu ndi muswè kubala mu Mukàndà wà Ebèlù, nshapità 1; ne mu Mukàndà wà Yone Munsantu, nshapità 1. Ebèlù 1:1 too ne ku 3, ne Yone Munsantu 1:1, bwà kubala eku. Cyena-bwalu cyànyì mu dindà emu ndilonga mu Mifundu. Mpindyewu túbalàayi Ebèlù 1:1.

*Nzambì, uvwa mu bikondo byà kale. . . mu mishindù mishùlèshùlàngàne mwakwìle mu bikondo bishàale ne baataatù kùdì bapròfetà,*

*Kàdi mu matùkù à ndekeelu aa mmwakwìle neetù ku Mwanèndè, udiyè mutèeke mupyànyì wa bintu byònsò, ku yéyè kàbìdì nkwaenzàye buloba;*

*Uvwa mwikale mu dibàlakana dyà butùmbi bwèndè, ne. . . ùleeja patòoke cimfwànyì cyà mupersonà wèndè, ne mwimanyike bintu byònsò ku dîyì dyà bukolè bwèndè, pàakakezulàye yéyè mwinè mpèkaatù yètù, wàkasomba ku dyàbalume dyà Mutàmbe bunène wa mu dyulu;*

Dibala bulenga kaayipu’s wè! Mpindyewu Yone Munsantu 1:1.

*Ku cibangidilu kwàkadi Dîyì, ne Dîyì dyàkadi ne Nzambì, ne Dîyì dyàkadi Nzambì.*

<sup>17</sup> Mpindyewu, nènku cyena-bwalu cyànyì mu dindà emu cidi ne: *Kilistò Mmusokolola Mu Dîyì Dyèndè Mene*. Mpindyewu, cìndì mufikila ku nkomeni ewu bwà kwakula pa cyôci eci, mbwalu. . . Mutùdì bamanyè ne citùdì twamba katwèna ne cyà kwamba ànu ne bwalu tudi badisangishe pàmwè bwà

kwakula ànu ku mpùùkàpùùkà menemene pa cintu kanà cyònsò to, kàdi ncintu kampànda cìikalà mwà kukwacisha bantu bwà kushìndamabò, bwalu netùpicile mu mâyi à njiwu, mabyamàbyalè. Tukaadi munkaci mwà kwendelapù mu màzuwà. Nènku misangu mikwàbò ndi ncinka ne bidi bwènù mùdìbi bwànyì pàànyì, ne bidi bimwèka ne, byàbúngì byà ku cyòci aci, bìdi ànu bu bìdi byènza bwowa's.

<sup>18</sup> Mvwa ànu nyiikilangana ne mwambi kampànda wa citende ne mukàjèndè, mu cibambalu amu, kwènji ànu katanci kakesè cyanààna. Ne bwònsò bùbìdì bwàbò bàdi ne dibinduluka ànu mùtù bantu bakwàbò bwònsò emu, mùtù bantu bakwàbò bàà pa buloba amu. Mémè ne: “Vùlukà ne, Sàtaanà ùdi ne cisuusu citàngija kùdi aku.” Nànsha wèwè nganyì, Nzambi. . . Yèyè ùdi ne bukenji bwà dituuta cisuusu cìmwè aci. Udi muswè cìkale cyà bishi, cisuusu aci; kwikala mpofo, anyi kwikala mwena binyòka musòmbè mu nkwasà, anyi kwikala mubindùlùke anyi? Nwamònu anyi? Ùdi ne mwaba kampànda ùdiye mwà kukutuucila cisuusu. Ùdi ne bukenji bwà kulenga pa mwaba wà mubuulùlùke awu. Mpindyewu, s'ke mwaba wudìbi bikèngela bwà wèwè kulama mubwikila dìbà dyònsò. Ne pa kumòna cikondo cyà dibinduluka citùdìmu ne mwoyi eci!

<sup>19</sup> Nènku mikàbà yà mèyi yà lumingu lushààle, ngèèla meeji, neyinùbuulwile bintu binène byà bikwàcisha bwòwà bitwikala ne cyà kwakwilapù abi dimwè dyà ku matùkù àdì paanshi aa patwikalà mwà kupeta mwaba mukùmbàne, bwà dikàngula dyà bipùpu byà ndekeelu abi bwà kupongolodiibwabi pa buloba, Mpànza ayi's wè, dipòngoloka dyà Mpànza ayi, ne Mikungulu Mwandamutekète, ne bintu bìdi byenza bwòwà bìdi bilwa pa buloba abi. Bantu mpindyewu, ne bantu leelù ewu, bàdi mu ngiikàdìlù wa mitù minyùngùlùke; buloba bujimà!

<sup>20</sup> Nudi babalè *Reader's Digest* wa ngondo mushààle ewu, nenùmòne cyena-bwalu aci muntwamu; cidi bwà Billy Graham, mutangadiki munène awu. Ùkaavwa mucyòke bikolè mu mùshindù wà kàyìkù mwà kwenza masangisha èndè to, nènku yèyè—yèyè kuya ku lùpitaadi lwà ba-Mayos bwà dikenketa dyà mubidi. Kakùvwa cintu nànsha cìmwè cibi mu yèyè to, ànu ne yèyè kèna wènza mudimu mukùmbàne to. Ke kumutèekabo ku dinyeema lùbilu; diibidija dyà mubidi. Ùdi ùnyeema kìlòmèèta umwe ne citùpà ku ditùkù dyònsò edi.

Ne pashìshe kaabwalu aku kàtùngunuka ne kwamba ne maalu à mamanya mmajaadìke cyòci aci leelù ewu ne, bàna batekète abu, nsongàalùme ne nsongààkàjì mitekète eyi ne: “yìdi yìkola mu bidimu makumi àbìdì.” Nènku ku bidimu makumi àbìdì ne bitaanu, misangu mivulè, mu maalu àbùngì, nsongààkàjì yìdi yìfika mu cikondo cyà kayìciyi yimòna cijila to, mu bidimu makumi àbìdì ne bitaanu.

Ncyèna mumanyè ní nuvwakù bacìmanyè anyi to, kàdi

kùkaadi ndambù wa malòòlò pàvwà Nyumà Mwímpè munkaci mwà kwakula mu disangisha emu, nsongààkàjì mutekète musòmbe paanshì apa, aci's ke cìvwà menemene lutàtù lwà mwànà awu pàakabiikidiibwàye. Mémè kumutàngila cyàkàbìdì, kumutàngila kàbìdì, ke mémè kumòna cìvwà bwalu. Mémè kudyàmbidila ne: “Kabyèna mwa kwenzekakù to; mwànà awu's mmuciikàle mutekète bikolè.” Kàdì cìvwà ndiimana dyà kumòna cijila, ne bidimu bitwè ku makùmi àbìdì, makùmi àbìdì ne bisàtù, cintu bu nànkù. Nwamònu anyi?

<sup>21</sup> Mamwányi ne mamwébè bààkafika ku cikondo aci mu bidimu bìpacila ku makùmi ànaayi ne bitaanu anyi makùmi àtaanu. Mukàjàànyì mmufike ku cikondo aci mu bidimu bitwè ku makùmi àsàtù ne bitaanu. Mpindyewu mbipweke too ne ku makùmi àbìdì. Bukwàbantu bujimà mbubolè. Èè, pìikalàbì ne buumùntù bwètù bwà mubidi wètù ewu bùdì munkaci mwà kwatuka ku didyà dyà byàkudya bisopakaja, dibinduluka, bìdì bìwùbolesha, abi kabyèna kàbìdì bìbolesha tubùlù twà mashi twà mu bwongù anyi? Dìbà adì's tudì mwà kuumvwa mùshindù ùdì bakàjì mwà kubwela mu mùsèèsù, butakà. Tudi mwà kuumvwa mùdìbo mwà kunyeemesha mu—mu mùsèèsù mu lubilu lwà kilòmèètà lukàmà ne makùmi citèèmà ne yìbìdì ku dìbà dìmwè, bintu byònsò ebi. Mbikafikè mu mùshindù wà ne ditungà dijimà, buloba bujimà, kí ng'anu ditungà edi to, kàdì myaba yònsò, mbifwe mu meeji amu.

<sup>22</sup> Ne pashìshe patùdì tukàngula byòbì abi, bu Mukalenge mwà kwanyisha, pa Mpànzà Mwandamutekète ayi bwà kuleeja bintu byà byenza bwòwà abi... Balùme nebìikale batàmbe kunyunguluka mitù, paanyimà pa katanci, mu mùshindù wà bìikàle bàdìfwànyikijila ne bàdì munkaci mwà kumòna tunkèna twà bunène bwà mukùnà. Bintu abi nebìikalè mwà kukèngesha bakàjì; nekwikalè mwà kulwa mpasu pa buloba apa, miikàle ne nsukì mile, bwà kukèngesha bakàjì bàdì bàkòsa yàbò nsukì abu; ne nsukì bu yà bantu bakàjì, milembèlèlè; ne mènù maleemàlè, bu nyama wa ntambwe; ne tulonda mu mukilà wàyì amu, bu twà kamìnyimìnyì, ne—ne bikwàbò, bwà kukèngesha balùme pa buloba apa. Kàdì dìbà adì kakwàdyàkwikala dìbà to bwà kwenza ní ncinyì ní ncinyì pa bwalu abu. Nwènù dìlongòlòlaayi ànu mpindyewu mene. Nwamònu anyi? Dikèngeshiibwa!

<sup>23</sup> Nènku dyàlumingu dishààle edi patùvwà tulonga bijèngù abi, pa bìdì bitàngila mùshindù ùdì byumvwilu bitaanu byà mu cipaapu cyà pambèlù aci. Aci's ke cibweledi, byumvwilu bitaanu byà mubidi abi. Kùdì mùshindù ànu ùmwèpelè ùdì mwà kubwela mu mubidi, aci's nku byumvwilu bitaanu abi: lumòno, lulabulu, lulengu, lununku, ne lumvu. Kakwèna mungà mùshindù wà kupetangana ne—ne mubidi to.

<sup>24</sup> Munda mwà muntu awu mùdì muntu ùbìikidiibwa ne nnyumà, ne yèyè ùdì ne byumvwilu bitaanu: kwela kwà meeji,

dyela dyà meeji . . . ne dyela dyà meeji, ne dinanga, ne kondo kàà mwoyi, ne bikwàbò. Èyo.

<sup>25</sup> Mpindyewu, kwèna mwà kwela meeji ne mubidi wèbè awu to. Udi wela meeji ne meeji èbè awu. Nènku mwòmù amu ke mùdì bààbùngì menemene, bàà beena Kilistò, bìimanyina ànu's. Nènku bàdì mwà, ànu mùdì ditalà mu budimi ne lupela mu budimi amu, bàdì mwà kwikala beediibwe maanyi kùdì Nyumà Mwimpè umwèumwè udi mwena kwitabuuya mulelèlà awu mwediibwe nendè maanyi awu.

Kàdì munda menemene mwà cyòcì aci amu, mu cipaapu cìdì cìlondà, cipaapu ciisâtù, ke musùukà's; ne aci ncidyànjila-kulongolola kùdì Nzambì. Ke mwaba wùdì mùtòlokù mulelèlà wùsanganyiibwa awu, mmwòmò amu.

<sup>26</sup> Nènku, vùlukàayi ne, bu mèmè mwà kwangata lupoopù kàdì kulùkàngula, kufinyika munda mwèndè amu mwoyi wà—wà blé ne kuwütèèka mwaba awu, kuwùjiika, nekùpatuka blé mu lupoopù alu; byà pambèlù nànsha biikàle cinyì, masaluka à bìshi.

<sup>27</sup> Leelù ewu, bàdì mu cibwejàkàjì cicolè cyà cileeji cyà Nyumà Mwimpè, ne bikwàbò. Sàtaanà ùdì mwà kutentula dipà dyà mùshindù kanà wònsò dìdì naadi Nzambì adi, kàdì kèna mwà kutwala Dìyì adi, ku Mwàkù ne ku Mwàkù to. S'ke mwaba wàkapangilàye mu budimi bwà Edènà amu awu, ke mwaba ùdiye ùpangila misangu yònsò awu's. S'ke mwaba ùdìbo, mukàbà wà mèyì pa *Balaaba bàà Mashimi Abu* . . . , anyi *Balaaba Abu's* . . . , bàdì mwà kwikala balaaba maanyi kùdì Nyumà, bààkula mu myakulu, baja maja, bèèla mbilà, bàyiisha Èvànjeeliyò, kàdì biikàle ànu démon.

Cìdì ne bwalu mmunda's! Mpindyewu vùlukàayi ne, Yesù wàkamba ne: “Bwònsò bàdì Taatù muMpèeshe nebàlwe kùNdi. Muntu nànsha umwe kèna mwà kulwa pàdì Taatù Wanyì kàyì mumukòke dyàmbedi to.”

Mpindyewu, tudi bapìcishile mu dileesònà adi, bwà kuleeja ne mu. . . Wèwè ewu uvwa munda mwà tatwèndè wa tatwèndè wa kakwèbè mulùme awu, ànu kacya kwònsò eku, bwà mu ngaakwilù wa mubidi. Dìbà adi, ke cyùdì mu mubidi ncyòcì aci, mu bufùki. Míngà misangu mwàna nealediibwè mu dìkù kampànda, ne nsukì mikùnze. Cìdì cikèmesha taatù, bwalu kakwèna muntu nànsha umwe udiyè mumanyè, wa ku cisàmbà cyèndè, wa nsukì mikùnze, anyì wa ku baa maamù to. Kàdì bu nwènù mwà kwalukila buludì paanyimà ku nkongo yàbùngì, nenùjandule ne muntu kampànda ùvwa ne nsukì mikùnze. Dimiinu adi dìdì ànu dítungunuka ne kupweka, nènku ulwàlwa ne ngiikàdilù wa umwe wa ku bàà kale abu.

Bu mwàkambà Èbèlù nshapìtà wa 7, ne: “Melekisedekè, Abraham wàkafuta byàdiikùmì kùdìYe pàvwàye munkacì mwà kwalukila ùfùmina ku dishebeya dyà bamfùmù apu. Nènku Lewì, ùvwa wakidila byàdiikùmì awu, wàkafuta byàdiikùmì,”



bwalu ùvwa mu mifùngù yà Melekisedekè ku . . . anyi, “mifùngù yà Abraham,” èyowà’s wè, pàakatwilanganàye ne Melekisedekè apu.

<sup>28</sup> Mpindyewu cintu cìmwècìmwè aci ncyòci eci. Pawìkalà mwànà wa balùme wa Nzambi, ne piikalàbi ne mèmè ndi mwànà wa balùme wa Nzambi, anyi mwànà wa bakàji wa Nzambi, tuvwa mu Nzambi ku cibangidilu. Nènku pàakalwà Yesù kaabujimà kàà Dìyì, dìbà adi tuvwa munda Mwèndè, mu mmwènekelu wa mùtòlokù. PàakapoopediibwàYe pa nkùrusè, twàkapoopediibwa pa nkùrusè mu mubidi Wèndè. PàakabiikàYe ku bafwè, twàkabiika Nendè ku lufù. Nènku mpindyewu, kacya ànu twacijingulula: “mpindyewu tudi basòmbe pàmwè Nendè, mu nyaba yà mu Dyulu mu Kilistò Yesù.” Nwamònu anyi? Bwalu Yèyè . . . Twètù, piikalàbi ne tudi bânà bàà balùme ne bàà bakàji bàà Nzambi, tudi bânà bàà Nzambi, dìbà adi tudi byambiibwà byà Nzambi. Dìbà adi tuvwakù. . . tudi ne Mwoyi wà Cyendèlèlè. Ne Nzambi ke Mwoyi wà Cyendèlèlè wùmwpèlè wùdiku. Dìbà adi, tuvwa munda Mwèndè kacya ku cibangidilu. Nènku pàakalwà Yesù Dìyì dyònsò adi, dìbà adi tuvwa citùpà cyà ku Yèyè dìbà adi. Amen! Ki bwalu mbwòbù abu’s. Aci’s cidi munda amu, kakwèna démon nànsha umwe, makolè nànsha àmwè, cintu nànsha cìmwè cìdiku mwà kucinyungisha to. Ke dikunji dyà ciswikidi dyà musùukà ndyòdi adi.

<sup>29</sup> Udi mwà kwikala mwediibwe maanyì lwà pambèlu *apa*, mu nyumà ewu, kàdi kujinga, ne kwenza bintu bikwàbò byònsò ebi. Kàdi pàkaadibi bikafika ku dikunji dyà ciswikidi edi ku Dìyì adi, kwàdyàkuumukakù to. Nedishaalè ànu diimàne tèndè ne lulamatu, ku Dìyì adi, ne mwàdi mwònsò. Kakùyì aci to, cyùdi wenza nànsha ciikàle cinyì, wèwè udi ànu mujimìne.

<sup>30</sup> Cikondo cyà Èkèleeziyà wa Laòdikiyà aci, “butakà, mpofo, mwena dikènga; kàyì nànsha mucimanyè to.” Nwamònu’s, bìdi pambèlù. . . Cidi ànu mulaaba awu, mulaabiibwe kùdi Nyumà mulelèlè. Nwamònu’s, Nyumà Mwìmpè awu ùdi mwà kumata pa muntu, mu nyumà wèndè. Kàdi musùukà wèndè s’ke mùtòlokù wèndè; mùtòlokù awu n’Dìyì. Nwamònu anyi? Ne mùshindù mwinè. . . Nànsha wèwè mwà kuyiisha munyì, nànsha wèwè wenza *cikampànda* bìmpè munyì, ne nànsha munangè mùshindù kaayi; ke cìmwè cyà ku bibweledi byà nyumà ncyòci aci. Kwèna mwà kunanga ne mubidi wèbè to; udi unanga ne nyumà webè. Ke cìmwè cyà ku bibweledi aci. Nènku udi mwà kunanga, ne kunanga Nzambi mene, kàdi kùyì ànu mu bwakàne to. Udi mwà kwipata baadémons, ne kuyiisha, ne kwenza bintu ebi; kùyì ànu mu bwakàne to. Yesù ngwákamba nànkù, kwamba ne bààbùngì nebàlwe mu ditùkù adi. Dìyì adi ndikòse bwalu!

*Ku cibangidilu kwàkadi Dìyì, ne Dìyì dyàkadi ne Nzambi, ne Dìyì dyàkadi Nzambi.*

*Ne Dìyì dyàkalwa mubidi, ne dyàkasòmbela munkaci mwètù, . . .*

<sup>31</sup> Mònaayi, nêngiikalè mwà kwakula pa cyena-bwalu cyà Bible eci, cyà ne, *Kilistò Musokolola Mu Dìyì Dyèndè Mene*. Mwaba ùmwvwa mufikile ku nkomeni ewu, ùvwa mmu cibambalu cyànyì amu.

Muntu kampànda munanga, udi mwà kwikala musòmbè kaaba aka mu dindà emu. . . Ndi ne fòtò mukùdika mu birò byànyì kuulu aku, aci's ncimfwànyì cyà *Mutù wà Kilistò* cyà Hofmann, cifùnda mu Masànka. Nènku ànu mwaba wùdì mufwànyine kufika mu mùshindù wùdì ukèngela citùpà cyà nsukì awu, kutwìshilabo ndambù menemene pa kasàlà paùdì upita citùpà aci. Mwaba awu, s'ki Yèyè awu, musòmbè mu Dìyì Dyèndè, mutàngile buludì pambèlu; Kilistò mu Masànka. Muntu kampànda, nànsha yèyè nganyì, ndi nkwela twasàkidila bwà bwalu abu.

Ne muntu kampànda mmulwe ne fòtò awu ne kumutèèka mu birò byànyì amu, wa Eliyà munkaci mwà kubànda mu dikalù dyà mvità dyà kapyà. Tudi twanyisha bintu ebi. Misangu yàbùngì, ne misùmbà minène yà bantu, ncitu ànu mpeta mpungà wa kwakula ne kwamba bintu ebi to, kàdi ndi mbimòna, mwanèètù wa balùme, mwanèètù wa bakàji. Ndi—ndi mubimanyè, ne Nzambi mmubimanyè.

<sup>32</sup> Mpindyewu nêngiikalè mwà kwakula pa cyena-bwalu eci cyà ne: *Kilistò Musokolola Mu Dìyì Dyèndè Mene*. Mùshindù mwinè wùdìbi ne, mu Masànka amu, mùdi fòtò wa Kilistò mwimàne muntwamu, mwimanè ànu mwaba awu, mùshindù awu's. Ki mùmwvwa mwele meeji bwà cyena-bwalu eci. Mpindyewu, Kilistò ne Dìyì bàdi cintu cimwè. Nwamònu anyì?

<sup>33</sup> Bwòbò bàdi bàmba ne: “Bible ùvwa bishi. . . ?” Mwàmbambà bantu. Mvwa ngenda ngèndesha màshinyì ne muntu kampànda ànu àbìdì àdì panshi aa. Yèyè ne: “Anji elabi meeji ku bwalu abu. Twètù aba pa buloba apa, mùshindù utùdì twètù ewu, ne tudi bamanyè ànu anyì mwà kwamba ànu ne tudi basungidiibwe ku mwanu mukwatakaja kampànda wà cyena Yudà ùdìbo bàbìikila ne m'Bible.”

<sup>34</sup> Mémè ne: “Mukalenge, ncyèna mumanyè ne mmunyi mùdi wamba aci to, kàdi ncyèna ngèèla meeji ne mmwanu mukwatakaja wà cyena Yudà to,” mungàakamba.

Yèyè ne: “Èè, s'utu usambila, cyùtù usambila ncinyì? Mémè ngààkalòmba *cikampànda* ne bikwàbò bintu kampànda; ncìvwa mubìpetè to.”

<sup>35</sup> Mémè ne: “Udi usambila bibì. Kabìvwa bikèngela twètù kusambila bwà kushintulula mmwèneni wa Nzambi to; bìvwa bikèngela twètù kusambila bwà kushintulula mmwèneni wetù. Meeji à Nzambi kaèna dijinga ne dishintuluka to. Nwamònu

anyi? Nwamònu's, ncyà bushùwà." Mémè ne: "Kí ncyúdi wèwè musambidile aci to . . ."

Ndi mumanyè mwànà wa balùme mutekète wa cyena Kàtòlikè, musangu kampànda, wàkadi ne mukàndà kampànda wà disambila, munkaci mwà kwenza masambila, ne bwà mamwèndè kwikalaye ne mwoyi. Kàdi kufwàye, ne yèyè kwimanshayè mukàndà wà disambila awu mu kapyà. Èè, nwamònu's, mukàndà wà disambila kawèna ne cidiwu ùngambila to; kàdi, nànsha nànkù, nwamònu's, wèwè udi wangata lwidi lubi. Udi uteeta kwambila Nzambì cyà dyanza.

Disambila dìwwa ne cyà kwikala ne: "Mukalenge, nshintùlùlèku bwà nkùmbanangane nè Dìyì Dyèbè." Kí ne: "Shintùlùlà," kí ne: "lekèlè nshintululè meeji Èbè to. Wèwè shintùlùlè meeji àànyì." Nwamònu anyi? "Wèwè shintùlùlè meeji àànyì ku diswa Dyèbè. Ne diswa Dyèbè ndifùnda mu Mukàndà emu. Nènku, Mukalenge, kù—kùndekèdiku nye nànsha too ne paWàtèèkà meeji àànyì—àànyì mafwànàngàne ànu ne meeji Èbè. Nènku díbà adi pàdi meeji àànyì matèèka bu meeji Èbè, díbà adi nèngìtabuuje Dìyì dyònsò dyÚdi mufunde. Ne Wèwè wákamba, mwómò amu ne, Udi mufwànyine kwenza bwa 'maalu ónsò àkwacishanganè bwà dyàkalenga dyà bàdi baKunangè. Ne ndi muKunangè, Mukalenge. Byònsò bìdi bìkwàta mudimu pàmwè bwà dyàkalenga."

<sup>36</sup> Mvwa nsanganyibwa lumingu elu ku musòko, musòmbe ne bàmwè bàà ku balundà bananga. Mémè kukonka bàmwè bàà kùdìbo ku mèèsà, makèèlèlè awu, patùvwà tudyà apu. Tutu misangu yònsò tusòmbe mu cijèngu ne biikale ne kakesè . . . byenze bu dilonga dikesè dyà Bible. Tuvwa twakula bwà dinanga.

Ke muntu kampànda kungambilayè, wàmba ne: "Ndi ngèlè meeji ne wèwè udi mufwilakanyi ne Kìlistò."

<sup>37</sup> Mémè kwamba ne: "Bu byòbi mwà kwikala bisànkisha Mukalenge wanyì, ke cìndi muswè kwikala ncyòci aci. Ndi muswè kwikala cyònsò cidiYe muswè bwà mémè kwikala aci. Ndi muMunange. Nènku bu Yèyè mwà kungeela mu ifernò, nèntungunukè ànu ne kuMunanga, mémè muyè ne nyumà mpwèmwè ùndi nendè mpindyewu ewu." Kuntàngilayè mu mùshindù kampànda wà pabwàwù.

Mémè kumòna bànaayi anyi bàtaanu bààbò mwaba awu, bansongàalùme; bakàjì batekète, bakàjì balenga bàà dikèma. Mvwa mumanyè mùvwà bansongàalùme abo banangè bakàjì bààbò, ki mémè kubàmbila, mémè ne: "S'ke mùshindù wà diciteeta ngwòwò ewu. Piikalà mukàjèbè, kumpàla kwà nwènu kusèlangana . . . Mpindyewu, nudi nwalukila, amba ne nudi . . . nsòmbelu wa bwena dibàkà ewu, uvwa munkaci mwà kulòota ne nudi basèlangàne; kanùyì bulelèlè basèlangàne to, kàdi wèwè kulòota ne nudi basèlangàne. Nènku utàbuluka ku tulù, ke wèwè

kuya kayiikila ne mulundà webè wa bakàjì awu, ne kwamba ne: ‘Udi mumanyè’s, ndi mulòòte tukààdi basèlàngàne, ne tuvwa ne bânà. Tuvwa ne nsòmbelu wa disànkà, ne—ne bindile Dilwa dyà Mukalenge, ne bikwàbò byònsò.’ Ne pashìishe nsongàkàjì ewu mufwànyine kukwambila ne: ‘Udi mumanyè anyì, mèmè’s ntu munange mulùme mukwàbò bikolè kukutàmba wèwè. Ndi mwà kusòmba ne disànkà ditàmbe ne mulùme mukwàbò awu.’ Udikù mwà kumunanga bìmpè bikùmbàne bwà kumwambila, bifùmina mu mwoyi wèbè ne: ‘Mabènesha à Nzambi ikalè pambidi pèèbè, munanga wanyì. Ndaaku ne mulùme mukwàbò awu’ anyì?”

Mpindyewu, mpindyewu kenkètaayi aci, yònsò wa kunùdi nwènù balùme anyì nwènù bakàjì. Nwamònu anyi? Èè, piikalà dinanga dyèbè dijaalàme, udi mufwànyine kwenza nànkù, bwalu udi uditàcisha bwà dyàkalenga dyèndè. Bwalu, udi mumanyè ne udi mufwànyine kwikala nendè, udi mwà kusòmba nendè, wèwè. . . Mmukàjèèbè; yèyè neikale mukàjèèbè. Neàkwitàbe ùmusèlè, kàdi kààkwikala ne disànkà to. Mmufwànyine kwikala ne disànkà ditàmbe. . . Ne pashìishe, wèwè mumunange, dîbà adi udi muswè bwà yèyè kwikala ne disànkà.

Ki bwà cinyi, cyònsò cìdì diswa dyà Nzambi aci, lekèlè diswa dyà Nzambi dyènzekè, nànsha mèmè mwikàle nsànka naadi anyi to. Ndi muswè kwikala ne mwoyi bwà Yèyè kusànkishiibwa kùdi bìndì ngenza. Ki bwà cinyi kenkètà kiipàcìlà kèèbè—kèèbè ne kabingilà kèèbè ku cyòci aci; udi umanya ní udi munangè Nzambi anyi to.

Ambàbi tūng bu Yèyè mwà kwamba ne: “NeùNkwàcile mudimu bu mèmè mwà kukwipata anyi?”

“Ndi muKunangè, nànsha bìshi.”

<sup>38</sup> Ki bwà cinyi, bu èkèleeziyà mwà kumòna aci ne mifwànyine kucitabuuja mu mùshindù awu, kabìvwa bifwànyine kwikala ewu ùteeta bwà kunyenga mukwèndè ndundu ku dikàsà pàdiye munkàci mwà kunyeema nendè to. Yèyè’s mmufwànyine kwikala munkàci mwà kukùba yèyè awu. Nwamònu anyi? Pàdibi ne, cìdì cìkusàka cilelèlè menemene ne kalumbilà, kabìvwa kwikala kàà ewu ùteeta kwamba ne: “É, ndi ne *eci* mèmè pàanyi’s! Ndi, *cikampànda eci*’s mmèmè, *cikampànda*.” Nwamònu’s, Nzambi kèna mwà kukwata mudimu ne muntu to. Kùdi ditentula bùngì cyanàànà didì dicilondà, ne ciine aci’s n’Sàtaanà. Kàdi bantu kabèèna mwà kufika ku dyumvwa aci to. Bàdi bâteeta kunyènga ndundu kùdi muntu kampànda udibò bamupèèsha awu. Nzambi àjuulebi ànu mudimu kampànda wà bwambi kàdi nutàngilè numòne bùngì bwà bàdi bàmutwa mu nyimà. Nwamònu anyi? Nwamònu anyi?

<sup>39</sup> Mpindyewu, dinanga dilelèlè bwà Nzambi ne: “Nànsha mèmè mwikàle citùpà kaayi, Mukalenge, mèmè ànu mwà kwambakù dīyì bwà Dyòdì adi, kwambulwisha bwà kuDikùba, lekèlaku bwà gènzè nànkù’s.” Nwamònu anyi?

Ncintu cimwècimwè aci cidi cifwànyine kwikala bwà mukàjèèbè. Wèwè mumunangè cyà bushùwà, nwamònu's, kí ndi—kí ndi—dinanga dyà *phileo* to; ndinanga dyà *Agapao*, dinanga dishùwashùwàlè. Yèyè mufwànyine kusòmba ne muntu mukwàbò, ne disànka ditàmbe; kanwèna basèlàngàne mpindyewu to, mu bushùwà bwà bwalu, kwèna mwà kwikala nendè to.

<sup>40</sup> Ne byòbì biine, bantu bàdì munkaci mwà kutèèleja mikàbà yà mèyì eyi abu, bàmwè, bààbúngì menemene, batu bààmfundila, bàmba ne: “Mòna's, mu *Dibàkà Nè Difwà Dyà Dibàkà*, uvwa mwambe *cikampànda* ne mwambè *cikansanga*.” Nkàadi mwambàmbe nàнку misangu yàbúngì; mikàbà yà mèyì eyi yiyaaya ànu. . . Ndi ngàakula ne disangisha dyànyì, mwanèètù. Mèmè ncyèna mwambule bujitu bwà cidi Nzambi mukupèèshe bwà kudiisha to; ndi mwambule bujitu bwà mùshindù wà Cyàkudyà cìndì ndiisha bantu aba. Eci cidi ànu bwà tabernacle ewu nkàayendè. Nwamònu anyi? Mpindyewu, bantu bwòbò baswè kutèèleja mikàbà yà mèyì, aci ncibàtàngìle. Kàdi ndi ngàakula ne bàdì Nzambi mumpèèshe abu. Yìvwa mmpèkaatù yàbò yàkalekelediibwà.

Muntu kampànda mmufunde, wàmba ne: “Èè, mèmè's ndi mwenze *cikampànda* ne ndi mwenze *cikansanga*. Wèwè's wàkamba ne mpèkaatù wetù. . .” Mèmè—mèmè ncivwa mwambe aci to.

Mèmè ne: “Citàngidilaayi ku eci; eci cidi ànu bwà bantu bàdì apa aba, bantu bàà mu tabernacle emu, cisumbù cyànyì sungasunga cyà mìkòòkò.” Mpindyewu, bantu bwòbò baswè kusopakaja byàkudyà ne bikwàbò pambèlu pààpa, wèwè—wèwè udi upeta dibuulula dyà kùdì Nzambi ne wenza cidi Nzambi ùkwambila bwà kwenza aci. Nèngènzè cintu cimwècimwè aci. Kàdi Mayiisha aa àdi bwà èkèleeziyà ewu.

<sup>41</sup> Mònaayi mpindyewu ne, tudi baalùkile, bikèngela twikale ne cintu kampànda citùdì ne cyà kushààla bakwàtekù. Bikèngela cintu kampànda ciikalè dikunji dyà ciswikidi, mu ngaakwilù mukwàbò, cidi nkàmisha. Ne muntu yònsò ùdì ne cyà kwikala ne nkàmisha anyì cyeyemenu kampànda. Ngàkayiishapù musangu kampànda, kuùkaadi bidimu, pa cyeyemenu kampànda, mwaba kampànda ùdì dìyì dyà ndekeelu.

<sup>42</sup> Bu mùdì mwedi wa kashiba mu dinaya dyà ndundu, yèyè mwàmbe ne ndituuta dyà ndundu, ki cìdiku menemene ncyòcì aci. Nànsha wèwè mucimòne bìshi, mwedi wa kashiba mwàmbe ne cintu ndituuta dyà ndundu. Wèwè wamba ne: “Mèmè—mèmè—mèmè. . . Kacivwa dituuta dyà ndundu to. Cìvwa ciyè. . . Mèmè ndi mumòne. . .” Nànsha ciikalè cinyì, pàakambàye ne: “dituuta,” ke cyòcì aci, aci's cidi cikòsa ànu bwalu. Yèyè, yèyè's ke nkàmisha.

43 Ne midilu yà mu njila yìdi nkàmisha, yòyì myàmbe ne: “ndà.” Wèwè udi wamba ne: “Èè, mèmè, mèmè ndi mu dilwijakaja, ndi ne. . .” To, to. Cìdi cyàmba ne: “Wèwè shààla mupùwe pàdi mukwènù ùya apu.” Nwamònu anyì? Cintu’s nkàmisha.

44 Mpindyewu, bikèngela kwikalè nkàmisha kampànda ku byònsò byùdi wenza abi. Kùvwa ne cyà kwikala nkàmisha paùdi usungula mukàjèèbè apu. Bìvwa bikèngela bwà kwikalakù mukàji úvwà ne cyà kusòbola.

45 Mpindyewu, kùdi ne cyà kwikala cikondo cyà, paùdi uya kasumba kàshinyi, nkàmisha wa mùshindù kaayi udi ukukèngela. Neciikale Ford, Chevy, Plymouth, kàshinyi kàà kubaabèndè anyì? Cyònsò ciikalaku aci, bikèngela bwà wikale ne nkàmisha.

Nèku ke mùdibi kàbìdi ne nsòmbelu wa bwena Kilistò. Bikèngela kwikalè nkàmisha.

46 Mpindyewu, muntu yèyè mwambè, muyè kùdi muntu mukwàbò ne mwambè. . . mumvwè muntu kampànda wamba ne: “Èè, bìvwa bikèngela bwà wèwè kubàtijiibwa,” kàdi mukwètù ewu yèyè kacya. . . Pàmwàpa, wendè, èkèleeziyà kampànda uvwa kàyi ùbàtiiza to, bàvwa ànu bamyaminangana màyi pa mutù. Ngèèla meeji ne, wamba cileejilu ne, Méthodiste, bàdi bàbàtiiza pàdi muntu ùlòmba, mùndi muumvwe. Anyì pàmwàpa kùdi. . . Mwena Kàtòlikè, ngèèla meeji ne bàdi bóbò bàmyaminangana ànu màyi pa mutù cyanààna. Nàku dìbà adi bu—bu muntu mwà kuumvwa cintu kampànda cyà ne “kwinyijiibwa mu màyi,” èè, kàvwakù muumvwe aci to; mmukolèle mu Kàtilikè. Nàku ùyaaya kùdi nsaserdòsè, wamba ne: “Taatù, ndi ngumvwa ne tudi ne cyà kubàtijiibwa ku diinyijiibwa dyà mu màyi. Èkèleeziyà wetù ùdi wamba cinyi pa bwalu abu?”

47 “Mòna’s, mbàmbe ne—ne bidi bikèngela bwà twètù kumyamiyiibwa màyi pa mutù.” Èkèleeziyà awu yèyè mwikalè wendè nkàmisha, aci’s ncikose bwalu. Dikòkangana dyònsò dyàjiki; èkèleeziyà mmwambè nàku, ne ki cyònsò cidiku.

48 Ambàayibi bu. . . bu Mwanèètù wa ba-Baptiste mutùumvwe twamba ne tudi twitabuua mu kwikala babàtijiibwe ku “diinyijiibwa mu màyi”? Yèyè’s mmufwànyine kwamba ne: “Mèmè ndi ngiitabuua aci.”

“Ne mu Dìna dyà ‘Yesù Kilistò.’”

Mpindyewu, cidimba cyà èkèleeziyà eci—eci cìdi cyàlukila kùdi mpaasàtà cyàmba ne: “Mpaasàtà, ngùmùvù muntu ùngambila ne bìvwa bikèngela twètù kubàtijiibwa mu diinyijiibwa dyà mu màyi, èyo, kàdi mu Dìna dyà ‘Yesù Kilistò.’”

49 “Èè,” mùvwàye mufwànyine kwamba, “mpindyewu, twànji tùmònèbi. Mòna’s, mwaba ewu mukàndà wùdi wamba ne bidi bikèngela bwà twètù kubàtijiibwa twangata “Taatù, Mwàna,

Nyumà Mwîmpè.” Èkèleeziyà awu yèyè mwikàle nkàmisha, aci ncikòse bwalu. Yèyè kèna úcyùka cìdì ní ncinyì ní ncinyì cyàmba to; ki nkàmisha wendè nyèyè awu.

<sup>50</sup> Èè, òngumba ne òngumba dyònsò òdì òkàmisha bwà beena kwitabuuja bààdì.

Kàdì, bwànyì mêmè, ne bwà aba bàndì ntèkemena ne ndi munkaci mwà kulombola kùdì Kilistò, ne kupicila ku Kilistò, Bible ke nkàmisha wetù. Nànsha byòbì ne... Bwalu, Nzambì mmwambe ne: “Dìyì dyà muntu yònsò ewu òikalè mashimi, kàdì Dyànyì Bulelèlà.” Ne mêmè ndi ngiitabuuja ne Bible ùdì nkàmisha wa Nzambì. Cìdì muntu mukwàbò kanà yònsò ewu wàmba nànsha ciikàle cinyì; Ùdì nkàmisha.

Bible kî mmukàndà wà ndongolwelu to. To, mukalenge. Kî mmukàndà wà ndongolwelu, anyi méyì maswika à maalu à mu nsòmbelu to. Bible kî mmukàndà wà ndongolwelu to, ndongolwelu yàbùngì, ne bikwàbò. To, mukalenge. Kî mmukàndà wa maalu à bukalanga à mu nsòmbelu to. To, mukalenge. Kî nnànkù to. Kèna nànsha mukàndà wa maalu malonda to, bwà menemene. Anyi, anyi Kî mmukàndà wà tèlòlòjì nànsha. Bwalu, Ùdì ndibuulula dyà Yesù Kilistò.

Mpindyewu nwènù baswè kubala cyòcì aci, nwènù bàdì ne mabèjì ènù abu, nùbifùnda, aci’s m’Bwàkabuulwibwà 1:1 too ne ku 3, bu mùdìbì ne, Bible ùdì “Dibuulula dyà Yesù Kilistò.”

<sup>51</sup> Twànjààyi ànu kucibala patùcìdì ne òbà apa. Ndi ngèèla meeji ne wànyì... ncyèna ne tuntu twàbùngì tufùnda mwab’ewu twà kwakwilapù to. Bu Mukalenge mwà kunènga, mòna’s, netùteetè bwà kufikakù.

*Dibuuludùibwa dyà Yesù Kilistò, òwà Nzambì mumupèèshe, bwà kuleeja basadidi bèndè bintu bìwà ne cyà kwenzeka mu cikòsù; ne wàkatùma ne kubyùmvwijila kùdì mwanjèlò wendè kùdì musadidi wendè Yone:*

*Wàkafìla bujaadiki bwà òyì dyà Nzambì awu, ne... bujaadiki bwà Yesù Kilistò, ne bwà bintu byònsò byàkamònáye.*

*Wa disànka ng’ewu udi ubala, ne aba bàdì bàtèèleja òyì dyà cipròfetà eci, ne ùlama bintu bìdì bifùndamù, bwalu cikondo cikaadi pabwìpì.*

<sup>52</sup> Pa nànkù, Bible ùdì dibuulula mu kaabujimà dyà Yesù Kilistò. Ne Wàkafùndiibwa kùdì bapròfetà. Èbèlù 1:1, mu... “Nzambì, Uvwa mu bikondo byà kale mwakwile ne baataatù kùdì bapròfetà awu, mu òtùkù dyà ndekeelu edi ùdì wàkula neetù ku Mwàn’Èndè, Yesù Kilistò,” uvwa bapròfetà abu awu, bònsò bwàbù, basanga pàmwè. Yesù ùvwa Maalàkì; Yesù ùvwa Yelèmiyà, Yeshàayi, Eliyà. Cyònsò cìwàbò aci, cìvwa munda

Mwèndè. Ne cyònsò cyúdi aci, ne cyònsò cîndi, cidi munda Mwèndè; Mèyì, bantèmù bàà Dìyì.

Pa nàнку Kí mmukàndà wà ndongolwelu, mèyì malongolola à nsòmbelu wa bukalanga, anyi Wòwò kí mmukàndà wà maalu malonda, anyi mukàndà wà teòlòjì to. Kí nnàнку to. Kàdi Cidi ndibuulula dyà Yesù Kilistò, Nzambi Yèyè mwinè mubuulùdiibwe, muumùke ku Dìyì kuya ku musunya. Ki cidìYe ncyòcì aci. Bible ùdi Dìyì, ne Nzambi ùdi mubidi, Nzambi mu . . . Nzambi ùdi Dìyì, èyowà's, ne Yesù mwikàle mubidi. Ndiibuulula, mùshindù ùvwa Nzambi (Dìyì) mumwènèshìibwe mu mubidi wa buntu, ne mubuulùdiibwe kutùdi. Nènku ki bwà cinyi Yèyè ùdi ùlwa Mwàna wà Nzambi; Yèyè ùdi citùpà cyà Nzambi. Nudi nuumvwa anyi? Mpindyewu, Yèyè kèna. . . Mubidi wùdi citùpà cyà Nzambi, mu mùshindù wà ne m'Wwàna.

<sup>53</sup> Mwàna, ànu mùdi Kàtòlikè ùcyàmba ne, “Mwàna wa Cyendèlèlèlè,” ne èkèleeziyà mikwàbò yònsò ayi; mwàkù awu kawèna nànsha ùmvwika to. Nwamònu anyi? Kakwèna mwà kwikala wa Cyendèlèlèlè, ne pashìishe kwikala Mwàna to, bwalu *Mwàna* ùdi cintu kampàndà cidì “cilelela ku.” Nènku mwàkù Cyendèlèlèlè, Yèyè kèna mwà kwikala wa Cyendèl-. . . Yèyè ùdi mwà kwikala Mwàna, kàdi Kèna mwà kwikala Mwàna wa Cyendèlèlèlè to. To, mukalenge. Kacyèna mwà kwikala Mwàna wa Cyendèlèlèlè to.

<sup>54</sup> Mpindyewu, kàdi Yèyè ùdi Mwàna, menemene, bwà ne Dìyì dyònsò divwa mu Yelèmiyà adi, mu Mòsà, ne Mèyì wònsò awu, mwàkambàYe ne: “Bàdi bàakula bwànyi Mèmè.” Dibuulula dyà Nzambi dilelèlèlè dyà Dìyì adi dyàkatùkina mu mubidi wà buntu, ne Nzambi kuDìjingila misunya. Ki bwà cinyi Wàkabìikiidiibwa ne “Mwàna,” ke bwà cinyi Ùdi ùleedila ku, “Taatu.” Mòna's, s'mbipeepèlè ànu pèpèlèlè, bu wèwè ànu mwà kulekela Nzambi uwùpwekesha mu meeji èbè amu's. Nwamònu anyi? Nzambi mubuulùdiibwe mu mubidi wa musunya, mònaayi, mubuulùdiibwe ku musunya. . . anyi muumuke ku Dìyì muyè mu mubidi. Ki Yone Munsantu 1:14 nyèyè awu: “Ne Dìyì dyàkandamuka mubidi, ne dyàkasòmba munkacì mwètù.”

<sup>55</sup> Mpindyewu mònaayi Bible ewu. Bàmwè bàà kùdìbo kwambabo ne: “Kaa, èè, Yèyè's mmwènzè cikampànda, Yèyè's mmwènzè cikansanga.” Kàdi lekèlaayi nnwàmbilèku cintu kampànda, twànjàayi ànu . . .

Tùbwelàayi mu bwalu-bulonda bwà Bible, katancì kakesè cyanààna, tùmonè kùdiYe mufùmìne. Wàkafùndiibwa kùdi bafùndi makùmi ànaayi bashìilàngàne. Bantu makùmi ànaayi bàakafùnda Bible, mu cipòlò cyà bidimu cinunu ne nkàmà yisambòmbò bijimà, ne mu bikondo bishìilèshìilàngàne, bàdyànjila kwamba maalu à musinga mutàmbe bunène àkaadiku menzèke mu maalu-malonda à buloba ebu, ne, misangu yàbùngì, nkàmà yà bidimu kumpàla kwà kwenzekaci.



Ne kakwèna ntùpàkanyi nànsha yà kànà mu Mikàndà yònsò makumi àsambòmbò ne yisambòmbò ayi to. Kaa, ekèlekèle! Kakwenàku mufùndi nànsha umwe to pa kuumusha Nzambi Yèyè mwine uvwa mufwànyine kwikala mujaalame mùshin dù awu. Dìyì nànsha òmwè kadyèna dibènganganana ne dikwàbò to.

Vùlukàayi ne, bidimu cinunu ne nkàmà yisambòmbò bijimà, Bible wàkafùndiibwa, kuumukila ku Mòsà kuya ku—ku lufù lwà—lwà Yone ku cisanga, anyi Cisanga cyà Paatèmò. Bidimu cinunu ne nkàmà yisambòmbò, kàdi wàkafùndiibwa kùdi bafùndi makùmi ànaayi bashiilàngàne; ewu kàyi nànsha mumanyè mukwàbò to, ne kabàvwa Nendè bu “Dìyì to”. Bàmwè bàà kùdìbo kacya kabàtukù banji kumòna “Dìyì to.” Kàdi pààkaDifùndabo, ne kuumvwabo bu bapròfetà, dībà adi, pààkateèkabo bipròfetà byàbò kaaba kàmwè, cyònsò ne cyònsò kunwànganaci ne cikwàbò.

<sup>56</sup> Tàngilàayi Peetèlò, wàkamanyisha mu Ditùkù dyà Mpenta awu ne: “Nyingàlalaayi, muntu ne muntu wa kunùdi, ne nùbatijiiibwè mu Dìna dyà Yesù Kilstò bwà dilekelediibwa dyà mpèkaatù yènù.”

Pòlò kàvwaku mwanji kuumvwa kantu nànsha kàmwè pa Bwalu abu to. Wàkaya ku Arabie munda mwà bidimu bisàtù, bwà kulonga Dipungila Dikùlukulu, bwà kumòna ne Dikunji dyà Kapyà edì òvwa nganyì uvwa wàkaakula nendè mu njila awu, wàmba ne: “Shawùlà, udi uNkèngesha bwà cinyì?” Mmunyì mùvwaye mufwànyine kwikala mupiiile? Kacya kavwàku nànsha mukonke èkèleeziyà mwinè to nànsha kakesè.

Nènku bidimu dikumi ne binaayi bimanè kupita, pààkatuutakeenàye ne Peetèlò, bàvwa bàyiisha cintu cìmwècìmwè, ku mwàkù ne ku mwàkù. Ke wetù Bible awu's. Mèyi à muntu mukwàbò àpangile. *Eci*, muntu nànsha umwe kèna mwà kusàkidilaKù to. Kwèna usàkidila kàbidì ku Bible to. To, mukalenge. Eci ke Dibuulula mu kaabujimà. Ke cyònsò cidiku.

<sup>57</sup> Bu mùdi Bitampì Mwandamutekète. “Bitampì Mwandamutekète,” muntu kampànda ùvwa ànu wènza kungambila ne: “mpindyewu wèwè newikale...Mukalenge neàkule neebè, Mwanèètù Branham, pààbuuludiibwà Bitampì ebi, ne neàtwàmbilè mwà kutàmba kuseemena pabwìpì ne Nzambi, ne mwà kucyènza.”

<sup>58</sup> Mèmè ne: “To, mukalenge, kabyèna mwà kwikala nànkù to. Bwalu, Bible, Bitampì Mwandamutekète pamutù Pèndè apu bìvwa ne maalu masokoka mwandamutekète masokoka. Bikaavwa bimana kufùnda, kàdi kabàvwa buumvwe cìvwàBi to.”

Tàngilàayi nùmonè mwàkakwàtàbo naabì mudimu, babàtijiiibwè mu Dìna dyà “Yesù” adi; nwamònu's, kacìvwa aci to. Dìna dyà “Mukalenge Yesù Kilstò”! Nwamònu bintu

byónsò abi, mùvwàbi. Bwalu, kùdi ba-Yesù bààbúngì; ndi ne balundà bààbúngì pa buloba apa bàdi ne dinà dyà “Yesù,” bambi naanyi. Kí ng’aci to. Cìdi ngwetù “Mukalenge Yesù Kilistò.”

Mufùndi nànsha umwe pa kuumusha Nzambi ùvwa mwà kwikala mujaalàme nànkù. Mpindyewu twánjààyibi kumòna ànu mwàkafùndiibwa Bible ewu.

<sup>59</sup> Mpindyewu, twámbebi cileejilu, kuumukila ku... Ambààyibi tǔng bu twètù mwà kuya mpindyewu ne kwangata mikàndà makumi àsambòmbò ne yisambòmbò yà baamingàngà yìdi yàkula bwà mubidi ayi, mifùnda kùdi bilongelu makùmi ànaayi bishiilàngàne byà baamingàngà, lukàmà ne dikùmi ne bisambòmbò... anyi mu bidimu cinunu nkàmà yisambòmbò bitàpùlùke? Ndi ndikonka ne netùkafike ku ntungunukilu kaayi naayi’s?

Pààbi, George Washington, mfùmù wetù wa ditùnga, kùkaadi bidimu bitwè ku nkàmà yìbidi, bwà disaamà dyà bisùlùsùlù, bààkamulamuna luzàdi lwà mwàn’ankàsà ne kumutùnkumwisha mashi panshi citùpà cyà litre. Kàdi bu twètù bangàte...

<sup>60</sup> Tuyaayi kule ndambù, pa bintu kampànda bìdi bitukokakù leelù ewu ebi, s’mmaalu à mamanya. Kàdi bu twètù mwà kwangata maalu à mamanya makùmi ànaayi mashilàngàne, kuumukila ku bidimu cinunu ne nkàmà yisambòmbò bitàpùlùke, ne kumòna kutwikala mwà kufika naawù? Mwena maalu à mamanya wa mu France, kùkaadi bidimu nkàmà yisàtù, wàkajaadika ku maalu à mamanya, mu kunyunguluja ndundu, ne, kwòkù mwà kupeteka lubilu kampànda lukwàbò lwà lupite pa kilòmèetà makumi ànaayi ne mwandamukùlù ku díbà dimwè, cintu aci ncifwànyine kubùuka pa buloba ne kumataci. Nudi nwela meeji ne maalu à mamanya mmawànyine kwalukila ku cyòci aci anyi? Kùdikù ntungunukilu kampànda ne cyòci aci mpindyewu, ukàadìbo bàpweka ne mùsèèsù, mu njila emu, ne lubilu lwà kilòmèetà nkàmà yìbidi ne makumi ànaayi ku díbà ewu anyi? Nwamònu anyi? Kàdi’s wàkacijaadika ku maalu à mamanya, ku lubilu lwà ndundu wènda ùbènguluka mu malaba, bwà ne mu lubilu lwà kilòmèetà makùmi ànaayi ne mwandamukùlù ku díbà, ne, cintu kanà cyònsò ncifwànyine kutùntumunyiibwa pa buloba ne kuumuka kuya, ncifwànyine kupòna mu cibwàshìbwàshì. To, kakwèna ntungunukilu nànsha umwe bwà aci to.

<sup>61</sup> Kàdi Dìyì nànsha dimwè mu Bible kadyèna dibènganganana ne dikwàbò to. Mupròfetà nànsha umwe kèna ùbènganganaku ne mukwàbò to. Bàvwa, muntu ne muntu, bapwàngàne. Nènku pàdi ewu ubwela ne wàmba cipròfetà, ne mupròfetà mulelèlà awu ùdi ùjuuka kuulu ne umutàndisha, díbà adi cìvwa cìmwèneshiibwa. Nwamònu anyi? Nwamònu anyi? Pa nànkù Bible n’Dìyì dyà Nzambi, bwà beena kwitabuuja balelèlà bwònsò.

62 Mpindyewu, kwèna mufwànyine kupeta bwalu bujaalàme mu civwà bangàngàbukà bafwànyine kwitabanganapù aci to. Kwèna nànsha mwà kupeta bwalu bujaalàme kùdìbo mpindyewu to. Kwèna mwà kupeta bwalu bujaalàme mu maalu à mamanya mpindyewu to.

Mpindyewu, nudi bamanye's, kùkaadi cikondo kampànda, bààkatwàmbila ne...ne: "Pàdì Bible mwambè ne 'wàkamòna Banjèlò bànaayi biimàne ku ntengu yinaayi yà buloba,' ne aci kacivwa mwà kwikalakù to. Buloba búvwa buvùngàmàne." Kàdì Bible mmwambè ne: "matumba ànaayi." Èè, mpindyewu nuvwa bamòne's, kukaadi mbingu yìbìdì, anyi mbingu yìsàtù, kukaadi mpindyewu, bibejibeji bivwa bifila kaabwalu aka, bààkajandula ne buloba bùdì ne matumba ànaayi. Mbanganyi bààkamòna aci? Mòna's, bushùwà. Nwamònu anyi? Ndi naaci citentula cyònsò, mwindila ànu bwà muntu kampànda kwambayè cintu kampànda.

63 Nènku nebàjandule, dīngà ditùkù, ne kabèèna munkaci mwà kumòna bidimu miliyò lukàmà ne makumi àtaanu byà bukènkè mu cibwàshìbwàshì nànsha. Bàdì munkaci mwà kwenda ànu kunyùnguluka mu cijèngù. Ncyà bushùwà menemene.

Nenùjandule, dimwè dyà ku matùkù àdì paanshí aa, ne paùdì uya mu Dyulu, kwèna ubuuka uya ku mwaba mukwàbò nànsha ùmwè to. Úcìdì ànu mwab'ewu, kàbìdì, ànu mu cipaapu cikwàbò cyà lubilu lukolè kutàmba eci.

Ànu mu cibambalu emu mùdì meekala munkaci mwà kulwa. Diikala dyònsò, mutèèlù, nkanzu, cyònsò cyùdì muvwàle pambidi aci, ncyà Cyendèlèlè, cidi ànu munkaci mwà dikwàciibwa pa mikàbà, cìya eku ne eku pa buloba bujimà. Dìbà dyònsò dyùdì upòdya, mbikwàciibwe pa mukàbà. Tàngilàayi ne, ntèlèviziyò neàcìjaadikè.

64 Paùdì ulediibwa, Nzambì ùdì ùtwa munu pa mbòte wà dikwàta nendè. Kacyèna cyenza... Ùdì wèla ditadi mu cisanji, kacyèna cyèna mutooyi wàbùngì to bwà katanci kakesè, nudi bamanyè's. S'ke mwànà mukèsè wa mu dibòkò nyèyè awu, too ne pààfikaye ku cikondo cyà djingulula; dìbà adi mutooyi ùdì ùbanga, ùdì ùbanga kwamba maalu ne wenza bintu bidìye ne cyà kulumbulwila. Ne pashiishe pàdì mwoyi awu ùshiikila, ditadi adi anyi mukàbà wà mēyì awu ùdì ùmushiibwa ne ùtèèkiibwa mu—mu cilaminu cinène menemene cyà Nzambì. Mpindyewu, mmunyi muwàcicyungulukà ku Cibàsà cyà Cilumbulwidi? Bàdì bàcyèla ànu mwisù mwèbè, munyungakeenu wònsò ùvwà mwenze, meeji wònsò àvwà mapicile mu mutù mwèbè. Nudikù mwà kumòna aci anyi? Mpindyewu nudikù mwà kumòna mwaba ùdì Nzambì... .

65 Mèmè mwimàne kaaba aka, dilòlò adi, kùvwa muntu pa cibumbà cyà ku cyambilu apa, muntu mule, wa dibàla, muntu wa mmwènekèlu mwimpè kumòna, wa dikànda. Ki kupàtukayè... .

Mukalenge ùvwa mumwambile bintu byàbùngi bwà bwalu bwà dîkù dyèndè civwà cikèngela bwà yèyè kwenza. Kàdi kupàtukaye ne kusòmba paanshì. Mu tusunsa tukesè, ke mukwàbò muntu ùlwàlwa kumpàlà kwànyì mùshindù awu, kàdi ùvwa ne mutù wèndè mwinyika. Ncivwa mwà kumumanya to, ki mèmè kutàngila cyàkàbidì muntu awu mwaba awu; nènku yèyè. . . Kàvwa n'yèyè to, bwalu civwa ncintu kampànda cikwàbò. Kàdi muntu ewu, ncivwa mwà kucipeta to. Kukènzakana, kakùyi muntu nànsha umwe paanyimà apu, pàanyi mèmè. Mèmè ne: “Muntu awu mmusòmbè munda mwà bilàmbà byà ridô mwàmwa.” Nènku ùvwa wetù. . . mwanèètù kampànda utu ulwa mu èkèleeziyà emu, mule, wa dibàla, muntu mwìmpè kumòna kampànda musòmbè kuulu aku mùshindù awu. Nènku ùvwa ne mutù mwinyika, ùsambila, bwalu ùkaavwa ànu wàmba kufwà ne dîsaamà dyà cifù.

Ùvwa ne cyà kuya kasumbà mukòlò wà bisàbaatà. Mukàjèndè ùvwa muswè bwà àye kakeba mukòlò wà bisàbaatà mupyamùpyà. Yèyè ne: “To, kabyèna bikèngela bwà mèmè kubipeta to, bwalu ncyàkwikala ne mwoyi bwà kubìvwàla to.”

Ùvwa ùpunga ne lufù. Nènku musòmbè mwaba awu, nudi numòna's, mu cipaapu aci, àlèluuyàh, Nzambi kutentemuka muntwamu e kwamba ne: “Ke yèyè awu musòmbè,” ànu mu ngiimànyìnù uvwaye usanganyiibwa awu. Nudi bùmvwè cìndì muswè kwamba aci anyì?

<sup>66</sup> Mpindyewu mònaayi, ne kakwèna ntùpàkànyì nànsha yà kànà mu Mifùndu to. Yèsù, Dìyì dyà Nzambi, didi dìjingulula meeji àdì mu mwoyi. “Dìyì dyà Nzambi ndikolè, ditwè ngwè,” Ebèlù 4:12. “Dìyì dyà Nzambi nditàmbe kutwà, ne bukolé kutàmba mwelè wà mvità wà nseke yìbidì, nànsha mene dìjinguludi dyà meeji ne mapàngadika à mu mutù.” Nwamònu anyì? Dibwela too ne mu ndòndò wa meeji, ne dîpàtula, ne dìjingulula. *Kujingulula* ncinyi's? “Kumanyisha, kubuulula.” Nènku ke cìdì Dìyì dyà Nzambi dyènza ncyôci aci.

Leelù ewu tudi twamba ne: “Èkèleeziyà wa Kàtòlikè n'Dìyì dyà Nzambi; ba-Baptistes, ba-Méthodistes, beena Mpenta, tabernacle.” Aci's ncyà mashimi. Dìyì ndibuulula; Nzambi, mubuulula kùdì Dìyì.

<sup>67</sup> To, katwena bafwànyine kwikala ne. . . kupeta ntùngùnukilu nànsha wa kànà munkaci mwà bangàngàbukà, munkaci mwà beena maalu à mamanya, bantu bashiilèshiiàngàne to.

Bu Einstein wikala ànu mupete ngangàcilù wà nyumà, bu mwàkadiye ne ngangàcilù wa mubidi, pàvwàye ùlonga mikenji yà bukènkè, ne bikwàbò apu, ùvwa mwà kwikala mutwàmbile cintu kampànda. Pangààkuumvwà mukenji wèndè pa mpwilààmàmbò munène awu mwaba kampànda mu maulu, ne: “Muntu yèyè ànu mupetàngàne ne mpwilààmàmbò awu, udi mufwànyine kufùka maloba, kwenza ní ncinyì cyònsò, ne bukolé

abu mbufwànyine kwikala kabùyi ne mikàlu to.” Nwamònu anyi? Yèyè ùkaavwa mumòne aci.

<sup>68</sup> Nudi numòna tufuku takesè tùdi tùpicila mu lupeepèlè etu, tùdìbo bàbiikila ne “tuumàlòngò,” ne bikwàbò. Bantu nàнку . . . Aci, èè, mbìmpè nànsha twètù kucilekela’s. “Nudikù buumvwe byònsò byà bantu bàdì bàjìmina aba anyi?” munùdi nwamba. Katùyi tuumvwa bwalu bwàbò to; mbiimane ànu mwaba awu, ne katanci kabàciyikù to.

Mùshindù awu ke wikalà Dyambwibwa. Kàmwè kàà kùditu nekàpone ànu paanshì, ne mubìdi wa pa buloba ewu newùlwatè mubìdi wà ku dyulu. Nènku kakwàkusààle . . . dikòbà, nsukì, anyi mifùbà; nebìshintuludiibwè mu katùpà kàà dìbà, kàfùmina ànu mu cibwàshibwàshì ne kàya naawu Kumbèlù. Tudi tumòna biinè byònsò ebi munkaci mwà kwenzeka mpindyewu, ne—ne beena mu Pentagone bàdìkonka bwà makènkè aa, ne makènkè àdì kaàyi ùmvwika aa, ne byònsò bìdìbo bàmòna mu—mu dyulu abi. S’nudi bamòne mùvwàbo ne cimwè kaaba aka mu cibèjìbeji mu Jeffersonville emu lumingu elu, ne bikwàbò, “bukènkè bùdì kabùyi bùumvwika to.” Pa nàнку, kaa, kì mbamanyè ne ncinyi ciinè aci to. Kàdi tèèlejàayi, nwènù bânà bakesè, Bwòbù nebùnwambùlè, dìmwè dyà ku matùkù àdì paanshì aa. Nwamònu anyi? Nwamònu anyi? Kanùtàcishi meeji to.

Vùlukàayi ne, Yesù wàkamba ne: “Ànu mwàkadìbi mu matùkù à Sodomà.”

<sup>69</sup> Cyàkenzèkà kumpàla menemene kwà Sodomà ncinyi? Nzambì wàkatùùluka ne bàmwè Banjèlò, ne Bàvwa bènda bàkenketa bwà dilumbulwisha. Yèyè ne: “Ndi muumvwe lubilà, lwà ne ùdi ne mpèkaatù yà dikèma, minène be, ke pàndì mutùùlùke bwà kujandula ne mbulelèlè ànu bwà menemene ebu anyi kì mbwòbù.” Ncyà bushùwà anyi? Tàngilàayi Yèyè wa munène wàkashàala ne Abraham awu, ùvwa mwà kujingulula meeji àvwa mu mwoyi wà Sarah, paanyimà Pèndè apu.

Mpindyewu, nudi nukènzakana kakesè cyanààna ne numòna’s, nwamònu’s, tàngilàayi cidìCi cyenza, cintu cimwècimwè aci leelù ewu. Ndikenketa dyà cilumbulwidi.

Mòna’s, paanyimà pàà katanci, Èkèleeziyà, pàdìYe mwà kushàala mu mwaba awu, ne dimiinu dyònsò dikafikè pa kaaba kààdì, bwòbò nebìikalè bayè. Kabàakumanya cidì cibenzèkéle to. Ewu neikale wènda ùya mu mùshindù kampànda. Nwamònu anyi? Ewu neikale wènda ùya kwà mpaasàtà, ne ewu neikale wènda ùya *apa*, anyi kwinshì *kwàka*, nènku, katanci aka anyi, kabàciyiku to. Bwalu Henòkà uvwa cifwànyikijilu awu: “Nzambì wàkamwangata, ne kààkasanganyiibwakù to.” Mupweke bwà kukenketa’s! Ntùngùnukilu, mùvwà ditentemunyiibwa dyà Henòkà, cifwànyikijilu cyà Izalèlèlè munkaci mwà kwambwibwa mu bwàtù amu . . .

<sup>70</sup> Bipwàngàne ànu menemene, Dìyì dyà Nzambì ndipwàngàne ànu menemene, nànsha too ne ku Dipungila Dikùlukulu ne Dipyadìpyà, mbitùpà bìbìdì ne cijimà cìmwè. Ncyà bushùwà. Dipungila Dikùlukulu ncutùpà cyàDì, ne Dipungila Dipyadìpyà didi citùpà cyàDì; panùdì nuCìtwàngaja, nudi ne dibuulula dijimà dyà Yesù Kilistò. Kwaka kùdì bapròfetà munkaci mwà kwakula, kàdì's ke Yèyè ewu mu Mupersonà; nwamònu's, bitùpà bìbìdì ne cijimà cìmwè. Mpindyewu katwèna baswè kwangata bipitèpìte búngì to. . .

<sup>71</sup> Mpindyewu, vùlukàayi ne, Dipungila Dikùlukulu kí ndikumbànàngàne kakùyì Dipyadìpyà to. Ne Dipyadìpyà kadyèna mwà kwikala dikumbànàngàne kakùyì Dikùlukulu. S'ke bwà cinyì mvwa mwambe ne bitùpà bìbìdì, byà cijimà cìmwè. Bwalu, bapròfetà bàakamba ne: “Yèyè neikale mwab'ewu! Yèyè neikale mwab'ewu! Yèyè neikale mwab'ewu; nebàMwenzèlè *cikampànda*. NebàMwenzèlè *cikansanga!*” Kàdì's ki Yèyè ewu: “Úvwa kaaba aka! Úvwa kaaba aka, ne kuMwenzelabò *cikampànda*, ne kuMwenzelabo *cikansanga.*” Ndi mufùme ku diyiisha pa bwalu abu kùkaadi ndambù wa malòlò.

<sup>72</sup> Mpindyewu, bwà kulonga Mifùndu, Pòlò wàkambila Timòtè ne: “ÚDilongà, ùlongeshà mu bululàme Dìyì dyà Nzambì, didi Bulelèlèlè adi.”

Byòbì abi mbijila bisàtù byà munda mwà Mifùndu. Mu kukwàta kwà mudimu ne Dìyì dyà Nzambì, kùdì bintu bisàtù binùdì kanùyìku ne cyà kwenza to. Mpindyewu túbìlongààyaaku bwà tusunsa dikùmi tùdì tùlondà etu; bintu bisàtù binùdì kanùyìku ne cyà kwenza to. Ne bwònsò bàdì pambèlu mu ditùnga, nànsha wèwè mwikàle penyì, mu ditùnga dijimà, ikàlè mutwishùbwe bwà kufùnda byòbì ebi mu meeji èbè pawikala kùyì ne crayon to. Kwèna ne cyà kwenza bintu ebi to. Tudi tunwàmbila dìbà dyònsò binùdì ne cyà kwenza, mpindyewu nènswambilè cinùdì kanùyì ne cyà kwenza to.

<sup>73</sup> Mpindyewu, kwèna ne cyà *kuumvwija* Dìyì *bibì* to. Wèwè udi wamba ne: “Èè, mèmè ndi ngèèla meeji ne Didi dyùmvwija *cikampànda.*” Didi dyùmvwija ànu cidìDi dyamba aci. Kadyèna dikèngela muumvwiji to. Ne kwena ne cyà *kutèèka* Dìyì *mwaba mubì* to. Ne kwèna ne cyà *kukòsolola* Dìyì to. Nènku bu twètù mwà kwenza nànsha cìmwè cyà ku byòbì ebi, bìdì bikùpa Bible mujimà mu cibwejàkàjì ne mu cimvundù cinène.

<sup>74</sup> Mònaayi. Bwà kuumvwija bibì Yesù, mu mmwènekèlu wa Nzambì mu muntu, udi mufwànyine kuMuvwija—udi mufwànyine kuMuvwija Nzambì umwepele mu yisàtù. Bwà kuumvwija bibì mùdì Yesù Kilistò mwikàle Dìyì, udi mufwànyine kuMuvwija Nzambì umwèpelè mu yisàtù, anyì udi mufwànyine kuMuvwija Mupersonà mwibìdì mu Bunzambì. Nènku bwà kwenza nànku, udi mufwànyine kusopakaja

mufundu mujimà. Kwèna ne kuwàya nànsha. Pa nàнку kaDyèna ne cyà kwikala dyumvwija bibi to.

<sup>75</sup> Kàdi wèwè wamba ne cintu kampànda eci, utèèkaPù dyumvwija kampànda, ne uDyàngata bwà cikondo cikwàbò; anyi Dyàngaciibwa bwà cikondo cikwàbò, udi kàbidi ufla dyumvwija dibi.

<sup>76</sup> Muntu yèyè muumvwije Yesù Kilistò bibi mu Bible, bwà ne Yèyè kí Nzambi mwinè to, ùMuvwija Mupersonà mwibidi, anyi Nzambi umwèpelè mu yisàtù, eci ncifwànyine kunyangakaja Dìyì dyònsò mu Bible mujimà. Ncifwànyine kushipa dìyì ditùma dyà kumpàla dyà ne: “Kwàkwikala ne nzambi mukwàbò kumpàla Kwànyì to.” Èyo. Ncifwànyine kwenza cisà cijimà cyà beena Kilistò musumbà wà bakuukwidi bampàngaanù bakuukwila nzambi yisàtù mishilàngàne. Nudi numòna ne m'Bible wa mùshindù kaayi wunùdi bafwànyine kwikala nendè anyi? Dìbà adi's ncifwànyine kutùvwija cidi beena Yudà bamba ne ke citùdi eci. Yèyè ne: “Nganyi wa ku tunzambi atu udi Nzambi wenù?” Nwamònu anyi? Pa nàнку, nudi numòna's, kwèna mwà . . . Kwèna ne cyà kuumvwija Bible bibi to.

Bwalu, Yesù Yèyè mwinè ke dyumvwija dyà Bible, pàdiYe ùmwèneshiibwa mu cikondo cidi citùpà cyà Mubidi Wèndè munkaci mwà kumwèneshiibwa. Cyòci ciikàle cikondo cyà cyanza, cidi ne cyà kwikala cyanza; kacýèna mwà kwikala cikondo cyà mutù to. Cyòci ciikàle cikondo cyà dìyì, èè, dìbà adi, kacýèna mwà kwikala cikondo cyà dikàsà to. Nwamònu anyi? Nèнку mpindyewu tudi mu cikondo cyà disù. Nèнку mpindyewu cidi cilonda, mbwà kulwaye, Yèyè Mwine. Lumònu; cipròfetà!

<sup>77</sup> Nwamònu's, munda mwà cikondo cijimà aci, twètù kubangila ku cishimikidi, kuumukila ku cikondo cyà kumpàla cyà èkèleeziyà; pàakayà Dimiinu mu buloba, Dimiinu mu kaabujimà. Pashiishe kupàtukilaci mu makàsà, Luther; kwalukidila pashiishe mu Wesley; pashiishe mu beena Mpenta, mu myakulu, mu mishiku, nwamònu's; mpindyewu cidi mu mèsù, cipròfetà, cyà Maalàkì 4, ne bikwàbò. Nèнку mpindyewu kakwèna cintu cikwàbò nànsha cimwè cidi cishààle bwà kulwaci to pa kuumusha Yèyè Mwine bwà kubwela mu cyòci aci, bwalu ke cintu cyà ndekeelu cidiku ncyòci aci.

Cidi cilondà mmeeji, ne katwèna ne meeji à mu twètù nkààyetù to; ngèndè Yèyè. Katwèna ne lumònu lwà mu twètù nkààyetù to. Mmunyi mùdiku muntu mwà kudyanjila kumòna bintu abi? Kèna mwà kacýènza to. N'Nzambi Yèyè mwinè. Nwamònu's, cidi—cidi cilwa pa kaaba kampànda. Ne Yèyè mmukòokèshe mubidi too ne ku ndekeelu, dìbà adi Mubidi mukùmbànàngàne wà Kilistò mmubuulùdìibwe mu mmwènekèlu wa Mukàji-musèla uvwa mwangàciibwe mu lubadi Lwèndè awu, bu Adàmà ku cibangidilu . . . mùvwà wa Adàmà amu's wè, èyowà, ku cibangidilu.

<sup>78</sup> Èyowà's, "kaanzambì," eci's ncifwànyine kubweja Bible mujimà mu cibwejàkàjì, kunyangakaja dìyì ditùma dyà kumpàla adi, kàdi kwenza kaanzambì, kaanzambì kàà ciimpàngaanù kàà isàtù. Ncifwànyine ànu—ncifwànyine ànu kunyangakaja cimfwànyì cyònsò nkòong cyà Bible. Pa nàнку kanwèna ne cyà kuumvwija Bible bibi to. Mpindyewu, aci's cìdi ànu cintu cìmwè.

<sup>79</sup> Pàdibi ne, Mufùndù wònsò mu Bible wùdi ne dyangaciibwa òmwèdìmwè adi, bikèngela ùWùtèèkè pa kaaba Kààwù. Nènku bwà kuWùtèèka pa kaaba kabì, nudi bafwànyine kuMuvwija Nzambì mu cikondo kampànda, kàdi—kàdi cikondo cìdi cìlonda nudi mwà kuMuvwija bwalu-bulonda, bwà diWùtèèka paa kaaba kabì. Pa nàнку kwèna ne cyà kutèèka Mufùndu awu mwaba mubì to. Yèyè ùdi Nzambì dìbà dyònsò. Nwènu baMuvwijè leelù ewu Nzambì wa maalù-malonda, cìvwàku kale wàwa aci, ne Kàyì umweumwe awu leelù ewu to, cìwènzà ncinyì ne Ebèlù 13:8? Nwamònu's: "Yèyè ùdi umwèumwè awu makèlèlèlè, leelù, too ne kashidi."

<sup>80</sup> Mpindyewu, nàнку mònaayi cìvwà eci cìfwànyine kwenza, ne cìdici cyenze. Cìkaadi cìmanè kucyènzà, kuMufikisha ku divila Dìyì Dyèndè Yèyè mwine, bwà kutèèka Mifundu mwaba mubì.

<sup>81</sup> Kukòsolola Mifùndu, nudi bafwànyine kusangisha mubidi Wèndè bibi, kutèèka dikàsà mwaba ùvwà ne cyà kwikala mutù, anyì cintu kampànda. Ànu byà mwomùmwè ne... Mu ngaakwilù mukwàbò, udi mufwànyine kwikala ne Yesù munkaci mwà kulongesha mukenji wà Mòsà. Udi mufwànyine kwikala ne... anyì mene Wesley ùlongesha cikondo cyà Luther. Udi mufwànyine kwikala mpindyewu, mu cikondo cyètù emu, ulongesha Mpenta, mukenji wà Mpenta. Udi umòna ne nCìfwànyine kusanganyibwa mu cibwejàkàjì kaayi's? Mpenta's ùkaadi mumanè kuleeja cìvwaye. Luther ùkaadi mumanè kuleeja cyèndè, mukadibwinke mu òngumba. Kumba kufwila ànu mwaba awu. Cìkondo kutwàdijaci; ke cyòci cìyaaya cyàcya.

<sup>82</sup> Mònaayi ne, ncyènzè ànu ne cyadìlongòlòdì, cyumba cìfwa ne kufwà. Mpindyewu, mònaayibi ànu ní kí mmwòmò. Alùjaayibi mèsù paanyimà mu maalù-malonda. Musangu wònsò wàkadìvwijaci bulongolodi, cyumba cìfwila ànu mwaba awu; kakùcìvwakù kàbidì búnga bwalu ku cyòci aci to. Cyàkalwa mukuukwidi wa—wa nzambì wa buloba ebu, ne kudìtwaci mu tusùmbusumbu, ne malongolodi, ne màngumba, ne bingènyingenyi. Musùmbà wa ba-Rickys kubwelawù muntwamu ne kubwejamu byàbò bìvwàbò baswè, anyì kubwejamù meeji àbò bwòbò's we, èyowà, mwòmò amu. Kàdi cyàkenzekà ncinyì? Cyàkalwa cimvundù. Cìyaaya kookeka mu kaanzambì kàà buloba ebu, mwaba wàshikikabo Sàtaanà yèyè mwìnè mu nkwasà, bèèla meeji ne bàdi bàpeta mulombodi munèna wa buloba bwà kubàtwàdila ditalala.



<sup>83</sup> Mvwa munwámBILE ditùkù adi, nēncyámBè cyàkàbìdi ne, nànsha mene dishidimuka dyòdi diine leelù ewu ndibèngàngàne ne Nzambì. Dishidimuka kadyèna dìpetangana ne Nzambì to. Dilonga dyà tùlaasà ndiye kule Nendè mu ntàntà wa kilòmèètà cinunu ne nkàmà yisambòmbò; maalu à mamanya àdi mu ntàntà wa mùliyò mujimà ne nkàmà yisambòmbò yà kilòmèètà. Maalu à mamanya ne tùlaasà bìdi bìteeta bwà kujaadika ne Nzambì kénakù to, nwamònu's, ku maasèminèrè à tèòlòjì ne mu bilongelu, ne bibambalu byà maalu à mamanya, ne bikwàbò. Mbapètè dyàbò dinyùkushiibwa's.

Kàdi bìshi bwà cìkèènà-kumòna aci dilòòlò adi, cyà muntu awu pààkeelaye beena maalu à mamanya abu lubilà lukolè mwaba awu munkaci mwà kupòngolola cintàkanyì aci mùshindù awu? Bwòbò kukùdimuka ne kubàndisha mèsù, ne kutùngunukabò. Nèkwikale kàbìdi dyendela pa kabalu.

<sup>84</sup> Mònaayi ne, kaa, bijila bisàtù ebi bìdi ne cyà kwikala nànkù. Mpindyewu, kanwèna mwà. . . Yesù kààkalwa kuyiisha mukenji wà Noà to, Yèyè kààkalwa kuyiisha mukenji wà Mòsà to, anyì, Mòsà kààkalwa kuyiisha. . . Nwamònu's, kanùumushi Mufundu pa kaaba Kààwù to, ùdi ne cyà kwikala mu cikondo. Mpindyewu, kanwèna mwà kwangata. . .

Pàvwa muntu munène awu, John Wesley, pààkapàtukàye, anyì, muntu munène awu, Luther, pààkapàtukà Luther ne mukenji wèndè wà dibingishiibwa, mpindyewu pàvwà aci ciikale. . . Luther ùvwa muntu munène, wàkabiikila Èkèleeziyà bwà kupàtuka mu mìdimà, ne wàkatèeka dibingishiibwa ku diitabuujà, nènku pààkenzàye nànkù, bààkiibakilapù bulongolodi, ke cyòci kufwà. Mwoyi kwasawù lwendu, ànu mùdibi mu cikolakola cya blé amu, mupàtùke buludi mukabwele mu cikondo cyà Wesley, too ne ku mwepu. Mu Luther amu kupàtukamù makwàbò mabèji, àkafwà naaci, àvwa n'Zwingli, ne Calvin, ne bakwàbò bwònsò bààkapàtukà mu dilongolola dinène adi abu.

<sup>85</sup> Pashìishe kulwakù Wesley, cikondo cikwàbò cìvwà citòlòkèlè mu mwepu amu. Wesley, ne Atterbury, ne bwònsò abu, ne—ne John ne mwanààbò wa balùme, ne bwònsò bwàbò abu, bantu banène bàà Nzambì biikale ne mukenji, kàdi kusalulawù ditùnga dijimà. Bwòbò kuwùvwija bulongolodi; kufwàwu.

Pashìishe kupàtukawù mwenze menemene ànu bu ne ùvwa ne cyà kukwàma ntete mpindyewu, kàdi, kulwa kujandula ne, cìvwa ncizubu, Mpenta.

Kàdi lwà paanyimà pàà cyòci cyònsò aci, kulwakù kaalutòngà kakesè.

Nènku nudi numòna's, pa ciibidilu. . . Ngèela meeji ne, mu bidimu bu bisàtù anyì bìnaayi paanyimà pàà Luther mumanè kwikala mu budimi bwà bwambi, ne èkèleeziyà wa ba-Luthériens wàkavwijiibwa bulongolodi. Ànu bwà katanci

kakesè cyanàànà paanyimà pàà Wesley mumanè kwikala mu budimi bwà bwambi, wàkavwijiibwa bulongolodi.

<sup>86</sup> Tucson, tudi bapete ndongamu wa—wa mùshindù ùvwà èkèleeziyà wa Wesley, anyi èkèleeziyà wa ba-Méthodistes, mufike ku diikalakù. Kàdi pààkalwàbo mu Àmèrikè emu, bààbùngì bààbò bàvwa baalùkile ne kwambabò ne bàvwa benze m—mèyi ne mikàndu ne bikwàbò, byùmukila mu Angletterre, bwà kubìtwàla munwemu, ne mùshindù wakacyènzàbo dinàya ku bisanji. Mémè kumòna ànu díbà adi mene cyàkenzekà. Ke yèyè ufwàfwa wàwa.

<sup>87</sup> Èè, ke beena Mpenta kupàtubo, beedi bàà mbilà bàà kale bàà mu matùkù à kale abu, bàvwa ne dipà dyà dyakula dyà mu myakulu, ke kubangabo kwakula mu myakulu. Pashiishe kucibiiakilabò ne: “cileeji cyà Nyumà Mwimpè.” Pashiishe kudivwijabò bulongolodi. Ewu ne neènzè *cikampànda*, ne mukwàbò *cikansanga*, ne kupetabo makòkyanganyi mu wòwù's. Cívwa mwà kwenza cinyi? Dyònsò dyà ku mabèji kuvùnguluka, ànu mwàkenzàdi ku cikalakola ne mwàkenzàci mu mwepu amu's. Kupetabo ba-Unitaires, ba-Binitaires, ba-Trinitaires, ne église de Dieu, ne bakwàbò bwònsò aba; bamònàngàne ànu ne divùnguluka, divùnguluka, divùnguluka.

Kàdi mpindyewu, bilondèshilàngàne ne bufùki, bùdi bwikale cileejilu cipwàngàne, kanwàkwikalakù ne kantu nànsha kàmwè kàà diCilongesha bwà kucyùmushakù to.

<sup>88</sup> Dìkù kampànda, dyà balundà bàanyi bàà mu Kentucky mwàmwa, ndifume ku dipeta mwànà mukesè—mukesè wa mu dibòko mulediibwe ditùkù adi, ne maamù ùvwa kuntwaku pàvwàbo munkaci mwà ditùlàmbila cyà kudyà. Nènku ùvwa munkaci mwà kwambulwisha mwanèètù wa bakàji mukwàbò awu ku dilàmba cyàkudyà bwà musùmbà wètù bantu balùme bàvwa baye kalemba kuntwaku. Ki mwànà awu kubangayè kudila mwadi, ne mémè nguvwa wakula. Ngèèla meeji byàkatàcisha maamù awu, ke kunyeemayè lubilu ne kwambulayè mwànà, ne—ne kubanga bwà—bwà kwamusha mwànà mukesè awu. Mémè ne: “Udi mumanyè's, aci's cidi ànu bufùki.” Nwamònu anyi? Mpindyewu, kwèna mwà . . .

Kacya kabàtukù banji kupeta mùshindù mutàmbe bwimpè bwà mwànà wa mu dibòko kupetayè cidiye muswè kupeta aci kutàmba kudila mwadi bwàci to. Mpindyewu, udi mufwànyine kumupèèsha mukàndà wà—wà nsòmbelu wa bukalanga, ne kusòmba kaaba aka kwamba ne: “Ndi muswè kukulongesha tèlòjì, wèwè mwanàanyi wa balùme. Mpindyewu, kubangi kwela mikunda mwab'ewu mùdi bakwàbò bânà bènza emu to; wèwè udi mushiilàngàne naabò. Mpindyewu, paùdi muswè kwamwa, udi wela ngonga mukesè udi apa ewu.” Kabyàkukùmbanakù to. To, kabyèna ànu bikùmbana to.

<sup>89</sup> Pa nàнку, panùdì nutàngila bufùki, mpindyewu tudi tumòna mwaba wùdì cikondo ne cikondo cyònsò, ne bacileejà dyàkàmwè ne tudi mu cikondo cyà ndekeelu. Cizubu cìkaadi cyumùke. Nènku tudi nè bidimu dikumi ne bitaanu, byàmba kwenza makumi àbidì mpindyewu, bidimu's, byà Mukenji mwikale utwa eku ne eku kwà ditùnga ne ditùnga, ne mu dindà emu batwàngàne ku nshinga mu ditùnga dijimà, nwamònu's, kàdi kakùyì bulongolodi to. Kawèna mwà kudyènza bulongolodi to. Kacya kakùtukù kwanji kwikala cintu bu nàнку to, anyì kakwàdyàkwikalakù pashìishe nànsha. Nwamònu anyì?

Bwa—bwalu bùdiku nè Mukenji leelù ewu, mbwà nè, aba bàdì bàWùpetè mu myoyi yàbò bàdì ne cyà kushààla mu Bwikadi bwà Mwànà, bwà kubobeshiibwabò. Nwamònu anyì? Nudi mwà kwangata Mukenji, ne pashìishe kulekela Mwànà wòsha bubìshi bwònsò bùdì munda mwènù abu ùbùpàtula, nwamònu's, ùnùvwija beena Kilistò babobè. Nudi bùmvwè cìndì muswè kwamba aci anyì? Nzambi ùlwalwa kàtàtaakà, bwà kwakidila Èkèleeziyà Wendè, nènku tudi ne cyà kwikala ne beena Kilistò bàà mùshindù awu bwà Yèyè kubàkidila. Bikèngela bwà—bwà blé àbobè. Èyo.

<sup>90</sup> Bijila bisàtù ebi bìdì ne cyà kwikalakù. Kanwèna ne cyà kumvwija bibì, anyì kuDyàngata bibì, kuDyùmvwija bibì, anyì kud-...anyì kuDìkòsolola to. Dìdì ne cyà kulamiibwa ànu menemene mùshindù ùvwà Nzambi mwambe ne mmùvwàbì amu.

Bwà bàà pa buloba, Cìdì m'Mukàndà wa bwalu busokoka. Bantu bàdì bèèla meeji nè Cìdì ànu Mukàndà wà kawùyì wùmvwika to. Musangu kampànda mwawa nyiikilangana ne muntu kampànda mwende luumù muneemu mu cimenga emu, udi mulame mwaba munène wà bwena Kilistò, ki yèyè ne: “Ngaakateeta kubala Mukàndà wà Bwàkabuulwibwà dilòlò kampànda.” Yèyè ne: “Yone ùwà ne cyà kwikala mudyè bintu byelà ndungù mukolè muukute mupèicishe kàdi kulwa kupeta cilòòtâlòòtà.” Nwamònu's, Mukàndà wa bwalu busokoka.

<sup>91</sup> Kàdi, pàdìbì ne bwà mwena kwitabuuja mulelèlè, Ùdì dibuulula dyà Nzambi diikàle dibuuludiibwa mu cikondo citùdì ne mwoyi eci. Wàkamba ne: “Mèyì Àanyì àdì Nyumà ne Mwoyi.” Yesù ngwàkamba nàнку's. Kàbìdì ne: “Dìyì n'Dimiinu dyàkamyaminà mummyanyi.” Tudi bamanyè ne aci ncilelèlè. N'Nzambi mu mmwènèkelu wa Dìyì, ne ùdì mwà kuumvwijiibwa ànu kùdì Yèyè mwine.

Meeji à muntu kî mmakùmbànyìne kuumvwija meeji à Nzambi to. Mmunyi mùdì meeji makesè—makesè mashìikile aa mwà kuumvwija Meeji àdì kaàyì mikàlù, patùdì katùyì nànsha mene mwà kuumvwija meeji à muntu ne mukwèndè to?

<sup>92</sup> Nènku nudi tumòna ne, Yèyè ke Umwèpelè udi mwà kuDyùmvwija, ne Ùdì ùDyùmvwija kùdì udiYè muswè. Kì

mbyambe nè: “Bantu bàà cifwàkà bàà kale, pàakakòsololàbo buloba mu bikondo byà kale ne mu mishindù mishiileshiiilàngàne to.” “Nzambì, mu bikondo byà kale ne mu mishindù mishiileshiiilàngàne wàkaDibuulula kùdì bapròfetà Bèndè.” Nwamònu anyì?

<sup>93</sup> Kàdi, mònayyi nè: “Kùdì ewu waswaYè kuDibuulwila awu.” Ne Yèyè mmulongolole bwà ne Ùdi mwà kuDisokoka mu Mifundu, kùdì mwena tèlòlòjì wa mutàmbe kwikala wa meeji matwè udikù awu. Kaa, ekèlekèle! Yèyè ùdi ànu mwà kuDisokoka, kusòmba mwaba awu mene mu Mifundu, kàdi wèwè kutàngila ditùkù dijimà kàdi kùyiku mwà kucimòna to; kutàngile matùkù wònsò à mwoyi wèbè, kàdi kùyiku mwà kucimòna to. Ùdi ànu mwà kuDisokoka, musòmbe mwaba awu.

<sup>94</sup> Mpindyewu, bu nwènu mwà kuswa, myaba yònsò, lekèlaayi aci cibwele cìtùkinè. Cyà ne, Nzambì, mu Dìyì, ùdi mwà kuDisokoka mu Dìyì, mu mùshindù wà kakùyikù mwena tèlòlòjì nànsha umwe anyì cilongelu pa buloba apa cifwànyinekù nànsha mwà kuMupeta, kàdi nànsha nànkù Yèyè's ùdi ànu kacya wàsòmba mwaba awu.

Wèwè udi wamba ne: “Ncyà bushùwà anyì, Mwanèètù Branham?”

Kàdi bishi bwà Bàfaalèsà ne Bàsàdòka? Kàdi bishi bwà mu cikondo ne cikondo cyònsò? Yèyè's mmucyènzè. Bushùwà. Yèyè mmucyènzè ànu mu cikondo ne cikondo cyònsò. Mpindyewu tudi bafwànyine kukenketa aci. Twelanganàayi meeji pa matùkù à Noà; cikondo cyà meeji matwè, ne mamanya à mu mutù, mùshindù wàkaDisokokàYe mu Dìyì Dyèndè dilaya. Mu matùkù à Mòsà, mwàkaDisokokàYe. Mu matùkù à Eliyà, mwàkaDisokokàYe. Mu matùkù à Yesù, mwàkaDisokokàYe. “Yèyè ùvwa pa buloba, ne buloba bwàkenjiibwa kùdìYe, kàdi bàà pa buloba kabààkaMumanya to. Wàkalwa kùdì Bèndè Sungasunga; Bèndè Sungasunga kabààkaMwakidila to.” Nwamònu anyì?

<sup>95</sup> Yèyè ùdi ùDisokoka kùdì muntu wa meeji matàmbe kutwà, wa mamanya à mu mutù udikù pa buloba awu. Wèwè udi wamba ne: “Èè, ewu n'Docteur Taatù Munsantu *Kampànda*.” Nànsha yèyè nganyi, Nzambì ùdi ùDisokoka kùdiye; ne neacibuulwile bânà bakesè bàdì baswè kuyiila abu, nwamònu's, bânà bakesè bàà Nzambì, dimiinu didyànjlila kulongolola.

<sup>96</sup> Anjì elàayibi meeji. Nzambì wa Bukolè awu, musòmbe mu Méyì Èndè Sungasunga, ùfomija bantu bàà meeji matwè, balongè tulaasà bàà cikondo cyà mpindyewu eci, kàdi kabàyi bācimòna to. Bèela meeji ne cidi ànu musumbà wa dikolesha dyà maalu cyanàànà. N'Yèyè awu mwimàne mwaba awu munkaci mwà kusokoma, kùdì beena Mpenta, ba-Baptistes, ba-Méthodistes, ba-Presbytériens. ÙDibuulula ànu patòoke bantu bitàngile, ne ùleaja bintu byà mishindù yònsò, nànsha mene

ùcitàèeka mu bibejibeji, ne bintu byà mùshindù awu, kàdi kabàyi ànu bàcimòna to. Kaa, Nzambi wetù, mùshindù mwine ùdiYe munène's wè, mwikale ùDibuulula kùdi udiYè muswè.

<sup>97</sup> “Kaa,” mùdi wamba, “Mwanèètù Jones anyi Mwanèètù *Kampànda*, yêyè's—yêyè's mmuntu munène. Yêyè neàCimònè.” Kaa, to. Yêyè ùdi ùCibuulwila ewu udiYè muswè. Wêwè udi wamba ne: “Mukajàanyì kayi ùCimònà, pèndè mwikàle mukajì mwena Kilistò.” Udi ùDibuulula kùdi ewu udiYè muswè. “Èè, mpaasàtà wanyì mmuntu munène.” Ncyà bushùwà, kàdi Yêyè ùdi ùDibuulula kùdi ewu udiYè muswe. Mpindyewu, kenkètaayi cidì cibuulùdiibwe, ku cidì munkaci mwà kwenzeka, dibà adi nenwikalè. . . nudi mwà kuumvwa ànu bimpè menemene.

<sup>98</sup> Mpindyewu tudi tumòna dibà adi ne, cidì cìCivwija Mukàndà wà Nzambi kí mmukàndà wà muntu to. Bu ne Ùvwa wà kùdi muntu. . . Mpindyewu tutàngilàayi mùdiWu mufwànyine kuDyamba patòòke. Tàngilàayi mùdiCi citandula mpèkaatù yà bantu bààkaCifùndà abu, mònaayi ne, bantu bàvwà—bàvwà ne mwoyi ditùkù Dyàci.

Abraham, cileejilu, ùdi ùbiikidiibwa ne “taatù wa beena lulamatu.” Mònaayi mùdi. . . Nudi nwela meeji ne Abraham ùvwa mwà kwikala mufunde Mukàndà ewu bwà bwalu bwèndè yêyè mwinè, bwà ditulumuka dyèndè yêyè mwinè anyi? Nudi nwela meeji ne mmunyi mùvwàye mufwànyine kwikala mufunde ne wàkashima mfùmù mu dindà adi, ne kwambayè ne ùvwa mmwanààbò wa bakajì, pèndè mwikàle mukajèndè? Cìvwa cìfwànyine kufùnda bwà byenzendi byèndè byà ditulumuka byàkenzàye abi anyi? Ncyà bushùwà ne, kàvwakù mwà kucyenza to.

<sup>99</sup> Kàdi bishi bwà Yakòbò mu dishima dyèndè? Mushimyanganyi mukesè uvwa Yakòbò awu. Mu—mu—muntu mmufwànyine, mwena Ebèlù wetù ewu ùfùnda bwà mwena Ebèlù nendè, ne mu ewu mùvwà Izalèlèlà mujimà mubiikidiibwe amu, mufwànyine kudìdinga kufùnda mashimi à taatù mene wà ditunga dijimà anyi? Mu Yakòbò, kupàtukamù bankambwà; ku bankambwà, kupàtukakù bisàmbà. Ne dibwe dyà cishimikidi dyà byònsò byàci abi, Bible ùmutandula patòòke bu mushimyanganyi. Mmwômò anyi? Nudi nwela meeji ne muntu ùvwa mufwànyine kwikala mufunde aci anyi? To, mukalenge.

<sup>100</sup> Ambàayibi tǔng bwà muntu wetù ewu ùfùnda bwà mfùmù mutàmbe bunène wakadikù pa buloba apa, bu mfùmù mwasa cifulu cyà butùmbi; Davìdì, mu dyenda dyèndè dyà masandi anyi? Beena Yudà abu mene mbafwànyine kufùndakù bwà wabò mfùmù wa buneeme bwònsò ne ngèndààmàsàndi anyi?

Kaa, tudi ne maalu-malonda, bu mùdi ne: “Kacya George Washington kàtukù mwambe bwalu bwà mashimi to,” ne bintu byà mùshindù awu. Tudi twamba, tubiikila aci ne mbwalu-bulonda.

Kàdi ewu muntu yêyè, Bible ùdi ùbìikila Davidi ne “ngèndààmàsàndi,” kàdi’s ke cyàkadiye. Mfùmù wa Izalèlèlà, ngèndààmàsàndi uvwa ne cyà kwikala mwànà. . . uvwa Yesù ne cyà kwikala Mwànà wa Davidi’s. Dibwe mene dyà mùsongà; ne taatù Wendè, bilondèshile mubidi, uvwa ngèndààmàsàndi. Beena Yudà kabàvwakù bafwànyine kufùnda Mukàndà wa mùshindù awu to. Muntu mmufwànyine kufùnda eci bwà yêyè mwinè anyi? Nànsha kakesè.

<sup>101</sup> Mmunyi mùvwa ditùnga dyà maditambishi dyà Izalèlèlà adi difwànyine kwenza nànkù? S’nudi bamanye mùvwabo ne maditambishi’s. Ditùnga dyà Izalèlèlà didibàndishi adi, kuyadi kafùnda bwà dikuukwila dyàbò bwòbò dyà mpìngu adi, bafùnda bwà ditombokela dyàbò dyà Nzambì wabò adi, báfùnda bàpiisha bintu byà manyaanu, byà bukooya byàkenzabo abi, kàdi báfùnda mu mukàndà? Nùnkù’s bwòbò mbabisokoke bushùwà. Bàvwa kwikala baleeje ànu bintu bìmpè. Kàdi, Bible ewu, ke udi wamba cidi cìmpè ne cidi cibì. Cidi, muntu kanà yònsò ewu mmumanyè ne beena Yudà kabàvwakù bafwànyine kwikala bafunde Mukàndà bu nànkù to, bwà bukooya bwàbò sungasunga, ne dikuukwila dyà mpìngù, ne mapanga, ne byònsò bìvwàbo naabi abi. Kabàvwakù mwà kufùnda aci to. Kaa, to.

Dibà adi, Nganyi wakaMufùnda? Bible mmwàmbe, mu Ebèlù 1:1 ne: “Nzambì, mu bikondo byà kale ne mu mishindù mishilèshilàngàne wàkaakwila ne baataatù kùdi bapròfètà.” Dibà adi, kacivwa bapròfètà to, kacivwa cyà cifwàkà to. “Nzambì!” Kaciyi ne “bapròfètà mu bikondo byà kale to.” Kàdi ne: “Nzambì, mu bikondo byà kale, mu mishindù mishilèshilàngàne wàkaakwila ne baataatù kùdi bapròfètà.”

Ndi ne Mufùndu mufùnda kaaba aka. Ncyèna mumanyè cidiWù to; ncyèna mwà kuWùledila to. Pa ciibidilu, pàndi ndeedila ku bintu ebi, ntu ntàngila Mufùndu kampànda. Nèntàngilè bwalu abu ànu bwà katanci kakesè cyanànà, bu nwènù mwà kumfwilakù luse. N’Timòtè Mwibìdi 3:16. Mvwa—mvwa—mvwa ndyambidila ne ndi mufwànyine kuvùluka cyòci aci, kàdi ndi ndòmba luse. Nèngànji ànu kwimanyika katanci bwà kujandula ne ncinganyì.

<sup>102</sup> “Nzambì, mu bikondo byà kale ne mu mishindù mishilèshilàngàne wàkaakwila ne baataatù kùdi bapròfètà.”

Mpindyewu Timòtè Mwibìdi 3, 3:16. Tùmònèbi cìdici cyàmba mu 3:16.

*Mufùndu wònsò (èyo) mmufidùbwe ku disonsodiibwa dyà (Bapròfètà anyi? To.) . . . disonsodiibwa dyà (Cinyi?) Nzambì, ne ùdi ne mushinga bwà dilongesha, ne ditàndisha, ne dilongolola, ne dileeja njila mu bwakàne:*

*Bwà muntu wa Nzambì wikala mwà kwimana mupwàngàne, mukùmbànàngàne cishiki bwà byenzedi byònsò bìmpè.*

103 Èyo, dîbà adi, Mufùndu wònsò mmufùnda ku disonsodiibwa. Yesù, pa buloba apa, wàkamba ne maulu ne buloba nebijiminè, kàdi Dìyì Dyèndè kadivwa mwà kujimina to. Yèyè wàkamba ne Mufùndu wònsò ùdi ne cyà kuula. Pa nàнку Mukàndà kî mmukàndà wà mifùndu yà muntu to. Cintu's m'Mikàndà yà mifùndu yà Nzambi.

104 Mpindyewu, tudi bamanye ne Nzambi wàkasungula ku didyànjila-kulongolola dyà Èkèleeziyà Wendè, mwaba Wendè, bapropetà Bèndè, ne byònsò bidì bitàngila bwalu abu. Ku didyànjila-kumanya, Yèyè wàkadyànjila kulongolola mupropetà Wendè. Nènku pàakalwà cikondo aci, Yèyè wàkafikisha mupropetà Wendè musangu wùmwe wùmwe awu, ne kumasonsola pàvwàYe ùfùndila Bible kùdiye. Mpindyewu, Nzambi mmufùnde Bible ùkwàta mudimu ànu ne mupropetà, bwalu's ke mùshindù Wendè wà dicyenza ngwòwò awu. Pa nàнку, nwamònu's, kî n'dîyì. . . Pa nàнку, nwamònu's, Didi Dìyì dyà Nzambi, kàdi kî n'dîyì dyà muntu to.

105 Nzambi m'Mupersonà. Nzambi ùdi mwà kwakula. Nzambi ùdi mwà kuyiikila. Nzambi ùdi mwà kufùnda. Kabyàkakèngela bwà Yèyè kucyenza mùshindù awu to, kàdi's ke mùshindù ùvwàYe—ùvwàYe musungùle bwà kucyènta. Kabyàkakèngela bwà Yèyè kucyenza mùshindù awu to, kàdi's Yèyè wàkasungula bwà kucyenza mùshindù awu. Mpindyewu wèwè udi wamba, “Nzambi's wàkafùnda ne munu Wendè, munu Wendè Yèyè mwine wà butùmbi awu, mikenji dikumi ayi. Pa nàнку Nzambi ùvwà mwà kufùnda, Yèyè mwinè, bu ne Úvwà muswè kufùnda.” Nwamònu anyi? Kàdi Yèyè—Yèyè wàkasungula bwà kuCifùndila ku bapropetà, nwamònu's. Bwalu bivwa byambiibwà Byèndè, Dìyì Dyèndè, Yèyè wàkaakwila patòoke ku byòbi, mwikàle wènta bwònsò citùpà, anyi citùpà Cyèndè. Nwamònu anyi? Úvwà mwà kufùnda ne munu Wendè. Yèyè wàkangata kàbidi munu Wendè ne kufùnda pa bimanu byà Baabùlòdà ne: “Wèwè udi mwediibwè mu cipiminu ne musangànyiiibwe mupeepèle.” Wàkafùnda ne munu Wendè Yèyè mwinè.

106 Nzambi ùdi mwà kwakula. Nudi nwitabuuja ne Nzambi ùdi mwà kwakula anyi? Wàkaakula ne Mòsà pa mukùnà, mu cipuka cyà cilakuka kapyà. Nudi nwitabuuja nàнку anyi? Èyowà's, mukalenge. Yèyè wàkaakula ne Yone, mu mmwènekulu wa nkuci, (nudi nwitabuuja aci anyi?) ne: “Ewu m'Mwan'Àanyì munanga Mwena munda Mùndì nsànka bwà kusòmbela.” Wàkaakula nendè. Wàkaakula ne Yesù pa Mukùnà wà Dikùdimuka dyà mpàla, kumpàlà kwà Peetèlò, Yakòbò, ne Yone. Ùdi mwà kwakula. Kî nkamàmà to. Nzambi ùdi mwà kwakula. Pa nàнку Yèyè wàkaakula ne—ne Yesù pa Mukùnà wà Dikùdimuka dyà mpàla. Ne Yèyè wàkaakula ne Yesù kumpàlà kwà musùmbà mujimà wà bantu; pàvwà, bantu kwambabò ne civwa cikungula, kàdi civwa n'Nzambi wàkula ne Yesù. Ne pàmwè ne byònsò byà

baa Maataàyi, Maakò, Luukà, ne Yone, n'Yesù wàkula. Yèyè ùdi Nzambi. Pa nànkù, Nzambi ùdi mwà kwakula.

<sup>107</sup> KwangataYe minu Yèndè Yèyè mwinè ne kufùnda pa lusenga, dīngà ditùkù. Yèyè wàkaakula, Wàkayiisha, Wàkamba cipròfeta, ne mishikù Yèndè Yèyè mwinè, Nzambi wàkacyenza, pàakavwijibwàYe mubidi ne kusòmbela munkaci mwètù apu ne: “Nzambi mumwènèshìibwe mu mubidi.” Pikalàye mwà kufùnda, kwakula, Yèyè kèna kàbidi mwà kwambila bakwàbò cyà dyenza anyi? Ùdi bushùwà mwà kucyenza. Ùdi mwà kuyiikila naabò, mu dīyi dyà buntu. Ùdi mwà kufùnda ne kubaleeja cyà dyenza. Yèyè mmucyènzè.

Pa nànkù: “Nzambi, mu bikondo byà kale ne mu mīshindù mīshìlèshìilàngàne wàkaakwila ne baataatù kùdi bapròfeta.” Nènku Yèyè wàkamba, mu Mufundu ewu, ne: “Katòba nànsha kāmwe anyi kashoonyi kakàakujiminakù pàdiku kakàyi kùlè to,” ne pashìishe nDimwènèshìibwe; dībà adi neDipitè, bwalu nDimwènèshìibwe. Kadyèna mwà kupitakù to pa dībà adi, kàdi ànu Dīyi Dyòdi diinè ndivwijibwe mubidi. *Katòba* mbwena kwamba ne “mwàkù mukesè.” *Kashoonyi* mbwena kwamba ne “kaacimanyishilu kakesè.” Nànsha mene cimanyinu cīmwe cyà mu difùnda, cyakwidi cīmwe, cintu kampànda, kacyakupangilakù mu Dīyi dyà Nzambi to. Kacyèna mwà kupangilaku to, bwalu Cidi n'Nzambi, Nzambi mumwènèshìibwe mu mmwènèkelu wa mubidi wà muntu. Bwalu, n'Nzambi Yèyè mwinè mu mmwènèkelu wa dileeta, mu mmwènèkelu wa mupròfeta, mumwènèshìibwe mu mubidi.

Mpindyewu, ki bwà cinyi Yesù ùvwa mwà kwamba ne: “Aba bàakaakulà neenù abu, nudi nubàbìikila ne ‘mbanzambi,’ bàakaakulà neenù ku Dīyi dyà Nzambi abu,” yèyè ne, “ne bwòbò's bàvwa banzambi.” Bapròfeta abu pàvwàbò balaabìibwe ne maanyi kùdi Nyumà wa Nzambi, ne bàtwàla ànu Dīyi dyà Nzambi mu dyòdi menemene, dībà adi bàvwa banzambi. Cìvwa n'Dīyi dyà Nzambi diikàle dyàkwila kùdìbo, bàdi mwà—bàdi ànu buumvwija bu mùvwà Mwenadi mwà kubàanyishila bwà kuumvwija amu.

<sup>108</sup> Mpindyewu, panwìkalà bàswe kupeta aci, aci's m'Peetèlò Mwibìdi 1:20 ne 21. Èyo. Bwalu, eci, mwaba ùdi Nzambi... Kakwèna muumvwiji wa pàà nkààya to, Yèyè ùdi ùDyumvwija Yèyè mwinè.

Nzambi ùdi wàkula ne uDyùmvwija, Yèyè mwinè, pashìishe uDìbuulwila ewu ùdiYè muswè awu, ùsokoka bakwàbò bwònsò. Kabyèna bikèngela bwà Yèyè kuDìbuulwila ní nganyi ní nganyi to ànu Yèyè muswè. Ne Yèyè kèna...Yèyè, Yèyè mmwambe patòòke cintu Cyèndè cyònsò mu kaabujimà mu Mifundu, ki bwà cinyi cintu cyònsò mu kaabujimà ncimana kumanyisha; bìdi ànu ne Yèyè mmusòmbe mwaba awu munkaci mwà kucibandila cyenzeka. Nwamònu anyi? To. Pa kumòna ànu



Mubidi awu mwenza ne kwalukila ku Wawò, ku mmwènekelu, wa Mukàj'Èndè-musèla cyàkàbìdì. Èyo.

109 Beena kwitabuujà bàdì bàCìitabuujà, bu mùdì Abraham wakabiikila bintu bìvwà kabiyì bipetangana naaCì bu ne kabìvwaku to.

110 Cìdì kàbìdì, Dìyì edi, dijingulula maalu masokòme à mu myoyi, Ebèlù 4:12. “Dìdì dijingulula maalu masokòme à mu mwoyi.”

111 Bapròfetà kabàvwa misangu yònsò ànu bùmvwa bìvwàbò bàfùnda abi anyì bìvwàbò bàmba abi to, cyanàànà kabàvwakù bafwànyine kwikala bacyàmbe to nànsha bìshi bu ne bàvwa mwà kucyùmva. Nwamònu anyì? Kàdì Bible mmwambè ne: “Bàakasàkiibwa kùdì Nyumà Mwìmpè.” Basàkiibwe! Pàdì Nyumà Mwìmpè ùkusàka, udi usàkiibwa. Muntu. . . “Nzambì, mu bikondo byà kale ne mu mishindù mishìlèshìlàngàne wàkaakula ne bapròfetà bàakasàkiibwa kùdì Nyumà Mwìmpè.” Ke bwà cinyì, mu bikondo byònsò bantu bàvwa bàà nyumà bàvwa bàkonka bapròfetà pa bìdì bitàngila bikondo ne cìvwà ne cyà kwenzeka.

Mupròfetà mufùndi ùdi ne cyà kwikala mu bwobùmwe bwà dìbà dyònsò ne Mwena mukanda awu. Nwamònu anyì? Ùdi ne cyà kwikala ne mwoyi ku musangu ne ku musangu mu Bwikadi bwà Mwenawù, bwà kumanya cìkalà Mukàndà. Nwamònu anyì? Mupròfetà mufùndi awu, ùvwa ne kasàlà kalongolola dìbà kanà dyònsò, bwobùmwe bwà dìbà dyònsò ne Mwenawù, uvwa Nzambì awu, bwà kufùnda cyònsò cyàkambàYe bwà kufùnda aci. Nwamònu anyì? Bivwa bileeja mùshindù wà nsòmbelu wùvwàye ne cyà. . . nsòmbelu mutàpùlùke ne bàna bààbò bwònsò.

112 Mpindyewu, ki bwà cinyì mupròfetà ùvwa ne meeji èndè matèèka dìbà dyònsò pa bìvwà Nzambì mwàmbè; kí mpa cìvwà muntu ùdyàmbidila, cìvwà cikondo cidyàmbidila, cìvwà bukalenge bùdyàmbidila to. Cìvwà Nzambì ùdyàmbidila! Yèyè ùvwa wàmba ànu patòòke meeji à Nzambì ku Dìyì, bwalu dìyì mmeeki pàdìdì dyambiibwe patòòke. Nudi bacyumvwe mpindyewu anyì? Dìyì mmeeki mapàtula patòòke, nàнку mupròfetà ùvwa mwindile meeji à Nzambì. Nènu pàakamubuulwilà Nzambì meeji Èndè, wàkaàleeja patòòke mu Dìyì ne: “EMU MMÙDÌ MUKALENGE WÀMBA.” Nwamònu's, kí ng’“Emu mùndì mèmè, mupròfetà ngàmbe to.” “EMU MMÙDÌ MUKALENGE WÀMBA!” Nwamònu anyì? Èyo.

113 Ki bwà cinyì bààkeela makalenge ne bikondo byà èkèleeziyà kadyòmbò, pàabi, bwà kwenza nàнку mu matùkù àbò awu, cìvwa ncibawu cyà lufù. Wèwè udi uya mutàngile mu mpàlà mwà mfùmù kampànda umwambila ne: “EMU MMÙDÌ MUKALENGE WÀMBA, *cikampànda* necyènzeke,” udi mufwànyine kukòshiibwa mutù. Èkèleeziyà mmufwànyine

kukushebeya mpindyewu mene bwà dicyènza. Kàdi baprófeta aba bàvwa ne bukitù. Bwà cinyi? Bàvwa basàkiiibwe kùdi Nyumà Mwímpè, nwamònu's, nènku, bwóbò, ki bwà cinyi bàakalwa ne bukitù. Nènku bwóbò bàakafúnda Dîyi dyà—dyà Nzambì didi kadiyi mwà kupangila adi.

<sup>114</sup> Kùvwa bàábúngi bàákateeta bwà kutentula baprófeta abu, bu baakwidi, anyi bikwàbò. Kàdi cyàkenzabo ncinyi? Ànu kusopakaja, kwajiki's. Kabàvwa mwà kucyènza to.

Bwalu, Nzambì ùvwa musòbòle muntu awu bwà cikondo aci, ne musòbòle Mukenji, nènku nànsha mene ngiikàdilù wa muntu awu ne cìvwà mwà kupitakana mu cikondo aci, cìvwàYe mwà kutèèkakù aci, mùshindù ùvwàYe mufwànyine kwikala, ne ngiikàdilù wa muntu kampànda awu, Yèyè ùvwa mwà kufofomija mèsù à bakwàbò. Mèyi àvwà muntu awu mufwànyine kwamba awu, mùshindù ùvwaye wenza awu, bìvwa mwà kufofomija bakwàbò, ne kutabaja mèsù à bakwàbò. Nwamònu anyi? Wàkavwàdika muntu mu mùshindù wà mùzàbi ùvwaye awu; ngiikàdilù, kalumbilà, ne bikwàbò byònsò ànu mùshindù ùvwàbi ne cyà kwikala awu, musungula ànu bipwàngàne menemene bwà bantu kampànda bàvwàYe ne cyà kubiiikila bwà cikondo aci abu.

Pàvwàbi ne, bakwàbò bàvwa bafwànyine kwimana bwà kumutàngila, kwamba ne: “Èè, ncyèna mwà kucyènza to. Kùdi. . . Ncyèna—ncyèna mwà kumòna to.” Bàvwa bafofomija.

<sup>115</sup> Yesù wàkalwa mùshindù wùmwèwùmwè awu, muvwàle, Nzambì udi kàyì mwà kufwà muvwàle mubidi wà buntu. Nènku bwalu Ùvwa mulediibwe mu cidiilu, mu cikumbi cyùle nténtè ne tùmvi twà nyama, kàyì ne mwaba wà kutèèkaYè mutù to; mulediibwe, mu ngeelèlù wa meeji yònsò, mwikale ne dìnà dyà mulediibwe mu masandi diMulamika. Nwamònu anyi? Bintu byònsò bìvwàYe abi, ne mwàkakolàYe, mwànà wa mukoonyi wa mabaya, mùvwaYe kàyì mulonge kàlaasà.

Mu mùshindù kampànda, pa buloba, lungènyi lwà pa buloba ebu, Yèyè kàvwa naalu bwalu nànsha bùmwe to. Yèyè kàvwa bwalu nànsha ne dimwè dyà ku dishidimuka dyà buloba ebu, dilonga dyà tulaasà, anyi ní ncinyi cyònsò to. Bwà cinyi? Yèyè ùdi Nzambì. Mbifwànyine kupàlakana. Bu Yèyè muteete kuya ku sèminèrè kampànda mwaba kampànda bwà kulonga cintu kampànda cìvwà èkèleeziyà yà pa buloba eyi yènza, cidi mu. . . Mòna's, kí ncifwànyineku nànsha. . . mòna's, kí ncifwànyineku nànsha. . . kí ncifwànyineku kupetangana nànsha kakesè ne ngumvwilù Wendè to, bwalu Yèyè ùvwa Nzambì.

Pa nànkù, dilonga dyà talaasà, malonga, maasèminèrè, ne bikwàbò, kakùyì mpatà to bìdi bìbèngangana ne diswa dyà Nzambì. Ndongolwelu yònsò nkòong wa dilonga dyà tulaasà ùdi ùbèngangana ne Nzambì. Byònsò bidi bìlongesha bisàka kule ne Nzambì, dìbà dyònsò. Pàndi nguuvvwa muntu wamba

mùdiye Dr., Ph.D., L.L.Q., aci's cidi ànu citàmba kumusàka kule bikolè ne Nzambi, bwànyi mèmè. Nwamònu anyi? Ku dilongeshiibwa mmutambe kudisàka yèyè mwinè bikolè kule ne civwàye mubiikidiibwe bwà kwenza bulelèlè. Ncyà bushùwà.

Mònaayi mùshindù wùdibi mpindyewu ne bàvwa basàkiibwe kùdi Nyumà Mwímpè.

<sup>116</sup> Mpindyewu, aci kî mbwena kwamba ne bantu bàdi balongè tûlaasà kabèèna babwela to. Tàngilàayi Pòlò. Ngèèla meeji ne kakùvwa muntu wa meeji matwè nànsha umwe mu ditùkù dyèndè kutàmba Pòlò, yèyè uvwa Shawùlà wa ku Taashishii awu to. Ùvwa mulongeshiibwe kùdi Gamaalièlè, umwe wa ku balongeshi bàà batàmbe bunène bàà mu ditùkù adi; mwena Ebèlù munène, muumishi wa maalu ncyoncyoncyo, Mùfaalèsà wa mu dingingumba. Ne Pòlò wàkakoleshiibwa kùdiye. Ùvwa mumanyè ntèndeleeleu yònsò wa beena Yudà awu. Kàdi pàakafikàye mu èkèleeziyà, wàkamba ne: “Ncitukù mulwè kunùdi mu dilonga dyà tûlaasà dyà bantu to, ne bikwàbò. Bwalu, bu nwènù mwà kulwa nànkù, díbà adi nudi bafwànyine kweyemena cyôci aci. Kàdi ndi mulwè kunùdi mu bukolè ne dimwènesha dyà Nyumà Mwímpè, bwà diitabuujà dyènù kwikaladi mu Nzambi.” Ki bwalu mbwòbù abu's. Nwamònu anyi? Ncyà bushùwà.

<sup>117</sup> Bààbúngì bààkateeta kutentula bantu aba, kàdi's mbabwejākàje cintu cyònsò aci ànu mùdìbo benza leelù ewu emu. Kùvwa kampànda wàkajuuka kumpàlà kwà cikondo cyà Yesù, wàkapàmbula bantu nkàmà yinaayi. Ne nudi bamanyè mùdi Mifundu yàmba bwà maalu aa, bàteeta kucyèna kumpàla kwà cikondo kulwaci. Ne bàmwè bàà kùdìbo bààkateeta kuMutentula, ne bwònsò abu bàvwa *bikampànda*, *bikansanga*, anyi *bikankènga*. Ki Yèyè kwamba ne: “Mu matùkù à ndekeelu, mùshindù ùvwàbo mwà kujuula ba-Kilistò bàà mashimi, mu matùkù à ndekeelu, ne bapròfetà bàà mashimi, ne kuleeja bimanyinu ne maalu à kukema.” Tudi ne byònsò abi. Nwamònu anyi? Kàdi aci kacýèna cyùmusha cilelèlè to. Cidi ànu cìCìkenkesha bìmpè bitàmbe, bwalu tudi ne Kilistò mulelèlè, kî ngwa mafi to.

<sup>118</sup> Mpindyewu, mpindyewu, tudi bamanyè díbà adi ne Nzambi wàkatùma bapròfetà Bèndè. Ke mùshindù ùvwàYe naawù bwà kufikisha Dîyi Dyèndè kùdi bantu, ku mishikù yà bapròfetà Bèndè.

Nènku mònaayi ne, nudi bamanyè's, Mòsà wàkamba, panwikalà baswè kucibala mu Ekèsòdè nshapità mwi4, ku mvensà wa 10 ne wa 12. Mòsà kwambayè ne Nzambi wàkaakula nendè. Nzambi wàkayiikila ne muntu, ku mushikù ne ku dicit. Ki yèyè ne: “Ndi ne lujòòkò ku dyakula,” mwàkambà Mòsà. “Mèmè, ncyèna mukùmbàne to. Ncyèna—ncyèna mwà kuya to.”

119 Yèyè ne: “Wàkenza muntu bwà kwakulayè nganyi, anyi Wàkamuvwija kamàmà awu nganyi? Wàkamufikisha ku dimòna, anyi Wàkamufikisha ku diteèleja awu nganyi? Kí m’Mémè, Mukalenge anyi?” Yèyè ne: “Nèngiikalè ne mukana mwèbè.” Nwamònu anyi? Pa nàнку . . .

120 Ki Yelèmiyà kwambayè, nwènù baswè kubala aci mmu Yelèmiyà 1:6. Yelèmiyà kwambayè ne: “Nzambì wàkatèèka mèyi mukana mwànyi.” Nwamònu anyi? Yèyè—Yèyè kwakula, ku mushiku ne ku dici, ne mupròfetà umwèpelè; ne wàkaakwila kùdi mupròfetà mukwàbò, yèyè kàvwa ne bukòntononyi nànsha bwà kànà to, kàdi kwakwila ku mishikù yèndè.

121 Yèyè ùdi ne mìshindù yà dipàtwila Dìyi Dyèndè, nudi bamanyè’s. Èyowà’s, mukalenge. Pa nàнку nudi numòna ne Bible n’Dìyi dyà Nzambì’s, kí n’dìyi dyà muntu to.

Mòsà kwambayè ne: “Nzambì wàkaakula naanyi ne Dìyi kampànda, ke mémè kuMuumvwa. Mémè kufùnda cyàkambàYe aci.”

122 Yelèmiyà kwambayè ne: “Ncyèna mufwànyine kwakulakù to nànsha kakesè. Nènku, katanci aka anyi, mishikù yànyi yìvwa yàkula, ne—ne—ne mvwa munkaci mwà kufùnda.” Nzambì wàkaakwila ku mishikù yèndè, ne byàkenzeka.

Danyèlè, Yeshàayi, ne bakwàbò, bapròfetà bwònsò abu bìvwa ànu bu mùshindù ùmwèùmwe.

123 Nudi bamanyè’s, mu Dipungila Dikùlukulu nkaayadi, mbipite ne misangu binunu bibìdi yìvwa bapròfetà abu bambe ne EMU MMÙDÌ MUKALENGE WÀMBA. Mpindyewu, muntu yèyè wàmba ne EMU MMÙDÌ MUKALENGE WÀMBA, kí mmuntu udi wakula to. Bu yèyè mwà kwakula, kàvwa mufwànyine kwikala mupròfetà to, ùvwa mufwànyine kwikala mwena lubombo, nwamònu’s, bwalu kabivwa bifwànyine (nànsha) kwenzeka to; mpùùkàpùùkà musangu ùmwè pa misangu nkàmà dikumi yà binunu, nwamònu’s, mbafwànyine kucicinkidila. Kàdi cyòci ciikàle EMU MMÙDÌ MUKALENGE WÀMBA, Mukalenge Nzambì ngudi mucyàmbè.

Bu mémè mwà kwamba ne: “Emu mmùdi Orman Neville wàmba”; mwanèètù wa balùme ùdi wamba ne: “Emu mmùdi Mukalenge Mann wàmba”; Ndi mufwànyine kwamba ne: “Emu mmùdi Mwanèètù Vayle wàmba,” mwaba ewu, anyi umwe wa ku bânà bèètù bakwàbò aba, yònsò wa kunùdi; ndi ngàmba binùdi nwamba abi. Mémè mwikalè ne lulamatu, ndi munkaci mwà kwamba ànu cinùdi bàmbè aci.

Nènku bantu aba, bu mùvwàbo bapròfetà, kwambabò ne: “Kí mmémè to. Ncyèna naaci bwalu to, kàdi cidi EMU MMÙDÌ MUKALENGE WÀMBA.” Pa nàнку Bible ùdi EMU MMÙDÌ MUKALENGE WÀMBA kùdi bapròfetà.

124 Mònaayi ne, bààkangata Nyumà wa Kilistò pambidi pààbò, ne kudyànjila kwamba maalu àvwà mwà kulwa kwenzeka. Nwakula bwà kudyànjila-kwamba's! Bààkamba cìvwà cìfwànyìne kwenzeka mu bikondo, pàvwàbò basòmbe apu, biimàne, badyadije, bènda ne Nyumà wa Kilistò pambidi pààbò, mu mùshindù wà ne bààkenza maalu bu Kilistò. Kàdi babadi bàdi mwà kucibala ne kwela meeji ne bapròfetà bàvwa bààkula bwàbò bwòbò biinè.

Nudi bavùlùke mutungula awu pàvwàye ùbala Yeshàayi 53:1, bwà mùshindù ùvwàbi, ne: “Wàkatàpiibwa mpùtà bwà kushipa kwètù kwà mikenji, muzaajìbwe bwà bubì bwètù, dinyooka dyà ditalala dyètù dyàkalwa pambidi Pèndè, ku mibùndàbùnda Yèndè twàkondopiibwa?” Mutungula awu kwambila Filipò ne: “Mupròfetà ùdi wàkula bwà nganyì, bwèndè yéyè mwinè anyì bwà muntu mukwàbò kampànda?” Nwamònu's, mupròfetà wàkaakula byenzè bu ne ùvwa yéyè mwinè.

125 Tàngilàayi Davidi munkaci mwà kwela lubilà mu Nyumà ne: “Nzambì wanyì, Nzambì wanyì, Wàndekèdi bwà cinyi? Mifùbà yànyì, nyòyì eyi mintàngile, mintàngile mèmè,” Davidi. “Bätùbulu makàsà àànyì ne byanza byànyì,” Davidi. “Bätùbulu makàsà àànyì ne byanza byànyì. Kàdi Kwàkulekela musùukà wànyì mu ifèrnò, anyì Kwàkwitaba bwà wa cijila Webè àmonè dibola nànsha,” byenze bu ne Davidi ùvwa wàkula bwèndè yéyè mwikale wa cijila. Ùvwa m'Mwànà wa Davidi, Dimiinu dyà nyumà, ditòlwesha, difùmina mwinshì àmu's. Nànsha mùvwà Davidi yéyè mwine mwikàle mpoopu amu, kàdi munda amu mùvwà lutete lwà Blé. Nwacyùmvù anyì?

Pa nàнку, Bible mujimà kì n'díyì dyà muntu to, anyì Kàvwa mufùndiibwe kùdi muntu to, mutwàla kùdi muntu, anyì mene Kèna mwà kwikala—kwikala mubuulùdiibwe kùdi muntu to. N'Díyì dyà Nzambì dibuulula kùdi Nzambì Yéyè mwinè, MuDyùmvwijidi wa Yéyè mwinè, Kilistò mwikàle ùDìbuulula mu Dìyì Dyèndè Sungasunga.

126 Tàngilàayi Kilistò mwimàne paanyimà apa mu Davidi. Davidi kàvwa mene mwà kwelakù meeji mpindyewu to. Lungènyì lwèndè lukaavwa lumanè kupàtuka mu yéyè, mutùdi mwà kwamba. Ne Yéyè ùvwa mulembeleja ku nkùrusè, bu munùdi numòna lupingù alu mwaba ewu; mukùdika ku nkùrusè, wèla lubilà ne: “Nzambì Wanyì, Nzambì Wanyì, WàNdekèdi bwà cinyi? Mifùbà Yànyì yònsò, mmiNtàngile. Bätùbulu byanza Byànyì ne makàsà Àànyì. Bätùbudi lubadi Lwànyì.” Nwamònu anyì? “Bwà cinyi Udi mutàmbe kwikala kule Naanyi? Ngombe yònsò yà Basàna mminyùngùlùkile. Bàdi bàkùpa mitù yàbò, bàmba ne: ‘Yéyè wàkeeyemena Nzambì, bwà Wàmòna mwà kuMusùngila; mpindyewu tùmonèbi Yéyè ní wàMusùngila's,’” bààkula mèyì àmwèàmwè awu.

Pa nàнку, nudi numòna's, pàakamwèshiiibwa Nzambi pa buloba apa, Yèyè wàkamba mèyi àmwèàmwà àkambà Davidi awu. Nwacyũmvù anyi? Pa nàнку, nudi numòna's, Kí n'díyì dyà muntu to; N'Díyì dyà Nzambi. Cívwa n'Nzambi mu Davidi; awu kàvwa Davidi to. Kàvwa mumanyè cívwayè wàmba to; úvwa yèyè ànu mu Nyumà menemene.

Mùshindù awu's nguvwa Mòsà. Úvwa mu Nyumà menemene, mupite mu cipaapu cívwayè musòmbèlemù aci, ne mwimàne mwaba awu mpàla ne mpàla, mu kaacipuka kàvwa kàlakuka kapyà aku, wàkula ne—ne—ne Nzambi Yèyè mwinè. Yèyè ne: “Kòpolà bisàbaata byèbè. Buloba bùdì mwimanepù mbuloba bwà cijila.”

Ndi ndifwànyikijila pàvwa Mòsà muumùke mwaba awu, kudyàmbidilaye ne: “Cyàkenzeka ncinyi? Cìdì cyenzèke ncinyi? Cívwa ncinyi?”

Yèyè ne: “Pwekààku mu Èjiipitù. Nènye neebè.”

Yèyè ne: “Ncilelèlè menemene bwànyì mèmè, ndi ne cyà kuya.” Kwangatayè mukàjèndè ne bàna bèndè...ne—ne mwanèndè, èyo, ne dikombo dyèndè mu cyanza, ne kukwàta njila kupweka mu Èjiipitù, bwà kusungila cisàmbà. Nwamònu anyi?

<sup>127</sup> Nzambi wàkwila, Yèyè mwine, ku bapròfetà. Nwamònu's, bwòbò, kakùyì mpatà to bàdì...Kí mbapròfetà to; cívwa n'Nzambi. Bwalu, mupròfetà awu, bwòbò biinè, kabàvwa mwà kwamba bintu abi to.

“Nganyì udi mwitàbùùje mulubù wètù?” Yeshàayi ngudi wàmba, nudi numòna's. “Udi mwitàbùùje mulubù wètù nganyì? Udi dibòkò dyà Mukalenge dibuulùdiibwe kùdiye? Yèyè neàbandè kumpàla kwètù bu kànà kàà ngombe mu—mu cikumbi. Ne mùvwàbi ne, nànsha nàнку, Wàkatàpiibwa mpùtà bwà kushipa kwètù kwà mikenji, muzaajìibwe bwà bubì bwètù, dinyooka dyà ditalala dyètù dyàkapòna pambidi Pèndè; ku mibùndàbùndà Yèndè twàkondopiibwa.” Tuvwa bondòpiibwe, kule menemene ne cikondo eci; ne Yeshàayi, kale wàwa bidimu nkàmà mwandamukùlù kumpàlà kwà Kilistò. Nwamònu anyi? “Ku mibùndàbùndà Yèndè,” cikondo cimane kupita, bamanè kwikala “bwondòpiibwe.” Kaa, ekèlekèle!

Mùshindù mene, Díyì dyà Nzambi, dipwàngàne menemene's! Dyeyèmènaayi, nwénù mìkòòkò. Ke cintu cimwèpelè cìdì mwà kunùsùngila.

<sup>128</sup> Mèyi makwàbò ònsò awu, nànsha wòwò matèèka bìmpè munyì, mùshindù kaayi, nànsha àlwila kùdì ní nganyì, nànsha àfùmina mu dingumba kaayi, anyì nànsha muntu mwinè yèyè wa meeji matwè à bìshi, kakùyì mpatà to byònsò mbyà dipwà mwoyi, cintu kanà cyònsò cìdì cibèngangana ne Díyì. Nudi baswè kufùnda Mufùndu awu, n'Galàtiya 1:8. Nwamònu anyi? Pòlò mmwambè ne: “Nànsha twètù, anyì Mwanjèlò wa mu

Maulu, mwà kuyiisha cîngà cintu cishiilàngàne ne Eci cinùkaadi bamanè kuumvwa, èdiibwè mulawu.”

Mu ngaakwilù mukwàbò, bu Mwanjèlò mwà kulwa kunùdi ùfùmina mu Dyulu, Mwanjèlò wa ùbàlakana bikolè, ne mufwànyine kwimana; balùmyana wa yààya, aci’s ncifwànyine kwikala cîshi cyela ku ndobo bwà ditùkù edi’s, kî mmwómò anyi? Mwanjèlò wa ùbàlakana bikolè ùlwa kaaba aka ne wìmana, kàdi kwamba bintu byvà bibèngangana ne Dìyì; wèwè udi wamba ne: “Sàtaanà, nguumùkìlè apa.” Mbîmpè. Yèyè mwikale mwèpiskòpò, yèyè mwikàle. . . nànsha mwikàle cinyi, kanùmwitàbùùjiku to pìikalàye kàyi wàkula bipetangana menemene ne Bible awu to, ku Mwàkù ne ku Mwàkù. Mutàngilaayi, yèyè neàye neenù ne Bible mpindyewu. Yèyè neànùfikishè too ne ku mwaba kampànda, ne pashiishe kucìswikila buludì mwaba awu. Panùdi numòna Bible wamba cintu kampànda, kàdi yèyè ùcipìta, mutàngilaayi ànu mwaba awu.

Nwamònu’s, mùshindù awu’s ke wàkenzàye Evà. Wàkalwa buludi e kwamba bintu byònsò ànu mu byòbì menemene. “Èè, Nzambi’s ngudi mwambe *cikampànda*.”

“Neyà bushùwà, Evà. Amen. Tudi twitabuuja aci, bwònsò pàmwè.”

“Èè, Nzambi’s ngudi mwàmbè *cikampànda*.”

“Amen. Tudi twitabuuja aci, bwònsò pàmwè.”

“Nzambi mmwàmbè *cikampànda*.”

“Tudi twitabuuja aci, bushùwà.”

“Èè, kàdi Nzambi’s mmwàmbè ne netùfwe.”

<sup>129</sup> “Èè, mpindyewu, s’udi mumanyè ne Yèyè n’Nzambi mwîmpè.” Kàakamba ne Yèyè kî mmufwànyine kucyenza to, udi mumanye’s. “Kàdi bulelèlà. . .” Kaa, mèmè! S’ki yèyè awu.

Kàdi pìkalàye ùvwa mwena dishima mùshindù awu, nènku Bible mmwàmbè ne: “Mu matùkù à ndekeelu yèyè ùvwa mwà kuseeswisha Basungula bu ne bìvwa mwà kwenzeka,” bìvwa bikèngela twètù kwikala leelù ewu penyi, nwènù balundà bàanyi? Mpindyewu, maaleesònà à kàlaasà kàà Dyàlumingu aa àdi, bìvwa bikèngela kwikalawù matwàdìibwe bîmpè menemene, nudi bamanyè’s, mu myoyi yètù, bwà kumòna. . . Bìvwa bikèngela twètù kutèeleja ne ntèmà yònsò ne kumòna mùdi cintu aci ciseeswishangana.

<sup>130</sup> Mònaayi ne, katwèna mwà, katwèna ne cyà, kutèeleja dîyì dyà muntu mukwàbò nànsha yèyè nganyi to. Katwèna tucyùka nànsha yèyè wa meeji matwè à bìshi to, nànsha mwikàle mulonge tulaasà twà bìshi. Bible, mu Nsumwinu, ùdi wamba ne: “Tudi ne cyà kushimbula dilukakaja dyà ngenyì.” Nwamònu anyi? Mpindyewu, mu cipaapu ciibidì eci emu. . .

Cipaapu cyà kumpàla's ke byumvwilu byèbè byà lumònu, lulabulu, lulengu, lununku, ne luumvu. Aci's mmu mubidi wèbè wà pambèlù awu.

Mu mubidi wa munda, ùdì mwikale nyumà, ke dilukakaja dyà ngènyi ne meeji, ne bikwàbò. Tudi ne cyà kwimansha byònsò abi paanshi. Kwèna mwà kulukakaja lungènyi, kwamba ne: “Mpindyewu anji indilaayibi, piikalàbi ne Nzambi ùdì Nzambi mwîmpè...” Ne bàdi bàtwambila bikolè leelù ewu mùdiYe mwîmpè. “Yèyè mwikàle Nzambi mwîmpè, dîbà adi mèmè mwikale ne meeji matòòke, nànsha mèmè nciyi mwà kumòna aci mu Bible awu ciikàle cyà bushùwà to, mèmè mwikàlekù ànu ne meeji matòòke, nènsungidiibwè.” Neùjimine. [Katùpà kàà mukàbà wà mèyì munda mutupù—Muf.]

<sup>131</sup> “Mèmè nya mu èkèleeziyà ngèza ànu maalu àndi ngèèla meeji ne mmîmpè, ne nteeta bwà kushààla mulamè cîndi mèmè ngèèla meeji ne ncyà bushùwà aci, èè, ndi...” Wèwè ucìdi ànu mujimine.

“Kùdi njila udi umwèka bu mululàme kùdi muntu, kàdi ndekeelu wendè nnjila yà lufù.” Nwamònu anyi? Kwàkusungidiibwa to; neùjiminè. Nwamònu anyi? Nwamònu anyi? Cìdi ne cyà kwikala ànu ku bukòntononyi bwà Muntu wa munda awu.

<sup>132</sup> “Èè, nkààdi mwakùle mu myakulu, Mwanèètù Branham. Èè, kùtu witabuuja dyakula dyà mu myakulu anyi, Mwanèètù Branham?” Kakùyì mpatà to. “Èè, mèmè's ntu mwelè mbilà; wèwè kwèna witabuuja aci anyi?” Èyowà's, mukalenge. “Mèmè ndi ne nsòmbelu mwîmpè wa bwena Kilistò. Kùtu witabuuja aci anyi?” Èyowà's, mukalenge. Kàdi aci kaciyèna ànu cyùmvwija ne udi musungidiibwe to. Udi muntu mwîmpè; mukezùke, wa nsòmbelu mulenga, muntu wa cijila, mwîmpè.

Ki mùvwà kàbìdì baakwidi abu, batèndeledi bàà mu umwe, batèndeledi bàà dikèma mu mùshindù wà ne umwe yèyè mwele mapikù, bàvwa bàashibwa mabwe bàbàshebeya. Cibawu cyà lufù cyà kukutakanangana ne Dîyì dyà Nzambi cìvwa ndufù.

<sup>133</sup> Ki lutàtù lùdiku ne ditùnga dyètù leelù ewu ndwòlò alu. Cìdi cyenza ne leelù ewu tudì ne bintu byà mukòdikodi pa buloba, mbwalu bibawu kabyèna bitàmbe kukola menemene to. Bwòbò bakwàte muntu ùpàtuka ne mukàjaabendè, bìvwa bìkèngela kubàpàtula patòòke ne kubàpakula, bushùwà, bantu bitùùle, kàdi kubalekelela. Ncyà bushùwà. Bwòbò bajìkile muntu wènza cintu kampànda cyà cìbì, mu njila mwàmwa, unyeemesha lubilu lwà mùsà, kabìvwa bìkèngela kumukòsela bidimu mwinshì mwà dikumi to; yèyè's mmush-...mmushebèyàngàne ne dimanya dyònsò. Nwamònu anyi? Nwènú batèèkepù manyooka bu nunku ewu, nenùbàfikishè ku dyendesha bitekète.

Kàdi pàdì mwena cìdìdì kampànda mwenzavi mwà kukamònanangana ne *kampànda* ewu mwab'ewu ne ùmupicìsha,



wàmba ne: “Èè, yêyè’s ùvwa ùnwa ndambù wa maala, ùvwa . . . kàvwa ne meeji à kwenza nàнку to.” Kàdi mufwànyine kushipa muntu mulùme, mukàji, ne musùmbà mujimà wa bàna kabàyi bamanyè bwalu, ùlekela Ricky awu ùpàndukakù, aci’s ke cidiidi. Ke buloba mbwòbù abu. Ke dyabùlù nyèyè awu’s.

<sup>134</sup> Nzambi mmwàmbè ne mulùme kampànda yèyè mujikila mu masandi, anyi mukàji kampànda, bapàtwilaayi pamèlù pààpa bwà kubààsa mabwe kubàshebeya. Aci’s ncikòse bwalu. Nwamònu anyi? Bwòbò bamujikile mene wàmbula mucì wà bujitu, mu ditùkù dyà nsabatu: “Mwangàtaayi nùmwàsè mabwe.” Bàvwa ne mwoyi ku cyòci aci mu cikondo aci. Nènku mpindyewu, nwamònu’s, katwèna ne mikenji yà mùshindù awu ayi leelù ewu to.

Kàdi mwena Kilistò, èkèleeziyà, ùndi ngambila mu dindà emu ewu, mukenji wà Nzambi awu wùdi mu mwoyi wèbè amu. Nwamònu anyi? Kwèna ne dijinga dyà kucyènzà to. Cidi munda emu. Udi muswè kushàala mukwàte ku mikenji yà Nzambi bipwàngàne ànu menemene. Nànsha ciikàle cinyi, udi muswè kwikala ànu cidi. . . Piikalàbi—piikalàbi ne Nzambi ùdi dijinga ne cikùpwidi cyà makàsà cyà ku ciibi, Yèyè’s mmuswè bwà wèwè kwikala cikùpwidi cyà makàsà aci, s’udi ne disànkà dyàbùngi bwà kwikala cyòci aci. Nànsha cifwànyine kwikala cinyi, udi muswè bwà kwikala cikùpwidi cyà makàsà aci. Nwamònu anyi? Cyònsò cidi Nzambi muswè bwà wèwè kwenza aci, ke cyùdi muswè kwenza, bwalu n’Nzambi. Mpindyewu, mwaba awu ke wùdi bushùwà upeta dinanga dyèbè dilelèlà, dishùwashùwàle, dilelèlà bwà Nzambi.

<sup>135</sup> Mpindyewu tudi tusangana dībà adi, ne: “Mwanjèlò mufwànyine kuyiisha cintu cikwàbò kanà cyònsò,” pa kuumusha cidi ciyè, cikaavwà cimana kwamba mu Bible: “èdiibwè mulawu.” Muntu nànsha umwe kèna mwà kwenza aci to. Kèna mwà kwenza aci to; Cidi ne cyà kwikala ànu menemene mùshindù wùdiCi cyàmba awu.

<sup>136</sup> Ne tudi kàbìdi tubala, mu Bwàkabuulwibwà 22:18 ne 19 ne: “Muntu kanà yònsò yèyè ànu musàkidile dīyi dimwè ku Cyòci eci, anyi muumushileKù Dīyi dimwè, Nzambi neùmushè cyèndè citùpà ku Mukàndà wà Mwoyi.” Cyà bushùwà. Nzambi neùmushè cyèndè citùpà, nànsha yèyè mwikale mwambi, cyònsò cidiye mwà kwikala aci, ne dīyi dyèndè . . . dīnà dyèndè ndifùnda mu Mukàndà wà Mwoyi. Nzambi wàkamba ne: “Nèndikùpùle ànu dyàkàmwè,” ncyà bushùwà, “yèyè musàkidileKù kantu, anyi muumùsheKù Dīyi dimwè.” Ke mùshindù ùdi Nzambi utu kàyì mwà kupangila awu mwenzè Dīyi Dyèndè. Nwamònu anyi? Udi mwà kusàkidila ku èkèleeziyà, anyi kuumushila ku èkèleeziyà. Kùsakididikù ku Dīyi adi to, anyi kuumushidiKù to, bwalu Nzambi neùmushè dīnà dyèbè mu Mukàndà wà Mwoyi. Nènku, mbwena kwamba ne, kwèbè nkujike dībà adi. Nwamònu anyi?

Kwêna mwà kusàkidilaKù kantu to, anyi kuumushilaKù. Bidi ànu menemene cidi. . .

<sup>137</sup> Kadyèna dikèngela muumvwiji nànsha umwe to, bwalu Bible mmwambe ne Nzambi ùdi wènta dyumvwija Dyèndè Yèyè mwine dyà Bible. “Kí ndyà didyumvwijila dyà pàà nkààyèbè to,” mwàkambà Peetèlò. Èyo.

<sup>138</sup> Ne Mifùndu yònsò mmifidiibwe kùdi Nzambi, mmitèèkìibwe mu bulongame kùdi Nzambi, ne cintu cyònsò mu kaabujimà ndibuulula dyà Yesù Kilstò. Dipungila Dipyadipyà ne Dikùlukulu, mùvwàbo bàdyànjile kwamba bwà ne Yèyè ùlwalwa, cìvwàYe mufwànyine kwenza pàvwàYe ùfika pànwapa, ne cìvwàYe mufwànyine kwenza mu cikondo cìcìlwalwà eci. Pa nàнку aci cidi ciMuvwija umwèumwè awu makèèlèlè, leelù, too ne kashidi. Nwamònu anyi?

Bu mu Ebèlù amu, pàakacifùndà Pòlò apu. Yèyè ùdi Nzambi: “Yesù Kilstò makèèlèlè awu,” wa mu Dipungila Dikùlukulu. Yèyè ùdi “Yesù Kilstò leelù ewu,” mumwèneshiibwe mu mubidi. “Ne Yèyè ùdi Yesù Kilstò bwà kashidi,” mu Nyumà, “bwà kulwa.” Nwamònu anyi? Nwamònu anyi? “Umweumwe awu makèèlèlè, leelù, too ne kashidi.”

Ne Yèyè ùdi ànu ne mwoyi kashidi bwà kuvwija Dìyì Dyèndè ne mwoyi cyàkambàDi ne neDyènzè bwà cikondo aci. Yèyè ùdi ne mwoyi.

<sup>139</sup> Ûvwa ne mwoyi mu Dipungila Dikùlukulu, mumwèneshiibwe. Ndi muswè ànu kunùfikisha ku dimòna kaacintu kakesè mwab’ewu, bu nwènù mwà kukàtwàlakù. Tàngilààyi, pàakamwèneshiibwà Yesù mu Dipungila Dikùlukulu, mutùdi tucìitabuuja.

Mpindyewu, nwènù bayiishi bàdì aku abu, nudi mwà kukòkangana naaci, kwenza cyònsò cinùdi baswè kwenza aci, kàdi ndi ngaakula bwà cyànyì. . .cìndì mèmè ngèèla meeji. Nwamònu anyi?

<sup>140</sup> Pàakamwèneshiibwà Yesù mu Dipungila Dikùlukulu, mu tèòfàní, mu mupèsonà wa Melekisedekè; kí mbwakwidi to, kàdi Mupèsonà awu, Muntu awu. Nwamònu anyi? Bwalu, Muntu ewu kàvwa mwanji kulediibwa to, kàdi Ûvwa mu tèòfàní, pa nàнку Kàvwa ne taatù to, ne kàvwa ne maamù to. Ûvwa Nzambi Yèyè mwinè. Wàkamwèneshiibwa mu mmwènekèlu wa Muntu, mubiikila ne: “Mfùmù wa Salèmà, udi Mfùmù wa Ditalala, ne Mfùmù wa Bwakànè.” Nwamònu anyi? Yèyè ùvwa Melekisedekè. “Kàvwa ní nnè taatù anyi nè maamù, ní nnè ntwàdijilu wa matùkù anyi ndekeelu wa mwoyi to.” Nwamònu anyi? Ûvwa n’Yesù mu tèòfàní, mu mmwènekèlu wa Muntu. Nudikù mwà kulonda nàнку anyi? Èyo.

<sup>141</sup> Dìbà adi Yèyè wàkavwijiibwa mubidi wà buntu mu bulelèlè, ne wàkasòmbela munkaci mwètù, mu Mupèsonà wa Yesù Kilstò Yèyè mwinè, mulela kùdi virgò Màriyà. Yèyè wàkalwa

mu mmwènekeli awu bwà Wàmòna mwà kufwà, ne kwalukila mu Dyulu.

Mpindyewu mu matùkù à ndekeelu aa, Yèyè mmulayè bwà kuDìmwenesha cyàkàbìdi mu kaabujimà, kàà mubidi Wèndè, mu Nyumà. Nwamònu anyi? “Bwalu ànu mwàkadibi mu matùkù à Sodomà, ke mwikalàbi kàbìdi ku Dilwa dyà Mwànà wa muntu.” Mpindyewu tàngilàayi ku Sodomà, mùshindù ùdiye mutèekiibwe, ne cyàkenzeka. Ne Yesù Kilistò mwikàle mumwèneshiibwe mu mmwènekeli wa mubidi, wà Èkèleeziyà Wèndè leelù ewu, nwamònu’s, wènza cintu cimwècimwè aci, cyenzi cimwècimwè aci, bintu bimwèbimwè byàkenzàYe musangu wònsò abi, kàyiku ùshintuluka to, Wa Cyendèleelè awu. Nwamònu anyi? Ne pa buloba leelù ewu, Yèyè mmuDìmwènèshe mu mibidi yà buntu, mibidi yètù yà buntu yìdiYe mubiikile, ne mwenze ànu cintu cimwècimwè aci menemene cyàkenzàYe mu bikondo byà kale, ne mu bikondo byà mubidi Wèndè pa buloba. Ne mwikàle wènza cintu cimwècimwè aci leelù ewu, bwalu: “Nzambì mu bikondo byà kale wàkaakwila ne baataatù kùdi baprófetà, mu matùkù à ndekeelu aa ku Mwàn’Èndè, Yesù Kilistò.” Nwamònu’s, Mwànà mwikàle ùbuuludiibwa mu matùkù à ndekeelu, Nzambi mumwèneshiibwe mu mubidi wa buntu, musòmbe ànu kumpàla menemene kwà kabùtù kàà Sodomà, ndekeelu wa bàà Bisàmbà byà bendè. Nudi nucimòna anyi?

Kùdi mamwèneshiibwa àsàtù.

<sup>142</sup> Mpindyewu, cintu cyàlondà cidi cyènzeka, mpàdici cyònsò cidikungwija mu Mupersonà umwèpelè awu, Yesù Kilistò, Mukàji-musèla ne Mubidi, ku dyalukila dyà mu mubidi dyà Mukalenge Yesù. Wènza misangu Yèndè yisàtù. . . PàakalwàYe pa buloba; kushipiibwa, kupoopediibwa pa nkùruse, kubiiika ku lufù. ÙDìmwènesha mu mmwènekeli wa Mubidi Wèndè, ùdi Mukàji’Èndè-musèla awu, Mukàji awu. Nwacyùmù anyi? Yèyè ùdi citùpà cyà Mubidi Wèndè.

Nènku mukàji ne mulùme bàdi ànu batàmbe kutwàngana nkundù, mu mùshindù wà ne bàdi ànu bàmba. . . Bàdi bàmwèbàmwè. S’bivwa bikèngela kwikalabò nàнку, nànsha bishi. S’ki bwòbò abu, nwamònu’s, bàakamwèneshiibwa ànu menemene mùshindù ùmwèumwè awu. Mukàji ewu ùdi citùpà cyèndè, bwalu yèyè wàkangaciibwa ku yèyè.

Ne Mukàji-musèla leelù ewu mmwàngacila mu mubidi wà Kilistò, udi munkaci mwà kukwàta mudimu ne kwenza ànu menemene mùshindù wàkambaYe Civwa cifwànyine kwenza bwà ditùkù edi, Mukàji-musèla, Mukalenge-mukàji; Mfùmù ne Mukalenge-mukàji. Èyo.

Dìbà dikaadi dyènda dipita mpindyewu, pa nàнку ne bikèngelè bwà twètù kulwijakaja bwà kujikija.

<sup>143</sup> Èyo, Bible mujimà ùdi dibuulula dijimà dyà Yesù Kilistò, ùDìmanyisha kùdì cikondo cyònsò. Wàkadimanyisha mu matùkù à Luther, bu cishimikidi; èkèleeziyà, mikòlò, dikàsà, mikòlò.

Ànu mwàkenzàYe Mfùmù Nebùkàndenèèsà amu; nudi bavùlùke mwàkalòotaye bilòota abi, ne kuumukila ku mutù too ne kwinshì anyi? Nwamònu anyi? Mpindyewu Yèyè ùdi ùlwa ùmukila ku makàsà ùbànda. Nwamònu anyi? Mu bukalenge bwà Baabùlòonà Wàkaleeja byònsò byà Dipungila Dikùlukulu abi, Wàkalwa ùmukila ku mutù mupweke, too ne mwàkapwekàYe mu mùshindù wà ne Nzambì Mwinè kuvwijiiywa mubidi kwinshì kwà cibàndilu. Mpindyewu mu Dipungila Dipyadipyà emu, Yèyè ùdi ùDyàluja cyàkàbìdi buludi, ku Mutù cyàkàbìdi, Mutù wà ngòlò awu, bwà kwashiibwa cifulu cyà butùmbì. Nwamònu anyi? Tàngilàayi. Nwacyùmvù anyi?

Nwamònu's, Nzambì ùvwakù ku cibangidilu, ne Yèyè wàkatungunuka ne kupweka, kupicila ku baprofetà, ànu nàнку ànu nàнку, too ne mwàkalwà Nzambì Yèyè mwine muntu bu twètù, buludi too ne kwinshì kwà cibandilu aku, Mwànà mulèla mu cidilù cyà nyama; mukinyiibwe, mubèngiibwe, mudyombòdiibwe, ne dìnà dibi, ne cyònsò cìvwàYe aci. Pashiishe kubangaYè kubànda, nwamònu's, nènku kuumukila ku makàsà kutwàdijaYe kwibaka Èkèleeziyà, Mukàji-musèla awu, wènda wàlukila, mutùnginùke ne dyalukila; ne mpindyewu ùpàtuka ùkabwela mu Dibwe dyà mùsongà, mùdì byònsò bitwàngajiibwa pàmwè ne byènza Mubidi ùmwè munènè mushintùlùdiibwe wà Yesù Kilistò.

<sup>144</sup> Nzambì mmubuulùdiibwe mu cikondo ne cikondo cyònsò ku Dìyì Dyèndè dilaya bwà cikondo aci. Mpindyewu twánjaàyiibi ànu kutàngila cidi yìmwè yà ku milayi Yèndè yà leelù ewu ayi, patùkaadi tujikija mpindyewu mu mèyi à ndekeelu aa apa.

<sup>145</sup> Mpindyewu Nzambì ùdi munkaci mwà kuDibuulula mu cikondo cyà Bukènkè bwà dilòòlò. Tùmònàayiibi mpindyewu. Tudi tumòna . . .

<sup>146</sup> Ndi ànu ne mushikì wà Mifùndù mifùnda kaaba aka. Bu munùdì mwà kumòna pa dibeji edi, bùngì bwà Mifùndù yìdì mifùndapù's. Kàdi, tudi ànu ne tusuna tutwè ku dikùmi ne tùtaanu cyanàanà too ne ku dìbà dikùmi ne ibidi. Ndi muswè kupàtuka. Kàdi dìyì kì ndimpàte, mu dindà emu, ne dyakula to. Míngà misangu byamu bifidì byà cyashima ebi bitu bulelèlè bimpàcishisha dìyì.

Pa nàнку pìikalà Mwanèètù Neville kàyi . . . Kwèna ne cintu nànsha cimwè bwà dilòòlò edi anyi? [Mwanèètù Neville ùdi wàmba ne: "To."—Muf.] Èè, èè, nèngìikalè. . . Pìikalàbi ànu bìmpè, ndi ne cintu kampànda. Ndi mupetè dibùkì dyà mfwankà, ditùkù adi, ditèeka mu diitu amu; nènku ndi ne Mukenji wà ku dibùkì dyà mfwankà adi, bwà dilòòlò edi, bu Mukalenge mwà kwanyisha. Nwamònu anyi?

Pa nàнку, ndi ne Mifùndu eyi mwab'ewu. Ne ncyèna muswè kupicisha dîbà to, bwà nwamòna mwà kwalukila.

<sup>147</sup> Dibùkì dyà mfwankà, dyàkula. Èyo. Mvwa ngenda mpàtuka mu diitu amu, ke dibùkì dyà mfwankà edi paanshì, ke mèmè kutungunuka ne kuya kùmvwà nya. Mèmè kudyàmbidila ne: “Èè, kùdi muntu kampànda kumpalà kwànyì eku.”

Ke Cintu kampànda kwambaci ne: “Alùkilà wàmbule cyòci aci.”

Mèmè kudyàmbidila ne: “Ngàmbule dibùkì dyà mfwankà? Kì mmèmè to.”

Cintu kampànda kwambaci ne: “Alùkilà ùkambule dibùkì dyà mfwankà adi.”

Ki mèmè kupweka, kùvwa dibùkì dyà kale dyà munda mutupù, ke mèmè kumòna cintu kampànda. Nènnwàmbilè bwalu bwàci, dilòlò edi, bu Mukalenge mwà kwanyisha. Èyo.

<sup>148</sup> Mpindyewu netwikalè mwà kwakula bwà Makènkè à dilòlò, ànu bwà katanci kakesè cyanààna. Bible ùdi ùdyanjila kwamba ne nekùlwe cikondo, ànu ku cikondo cyà ndekeelu, cìikala dîbà mwà kupàtuka, ne nekwikalè Bukènkè bwà dilòlò. Twètù bònsò tudi bamanyè nàнку. Kì mmwòmò anyì? Twètù, tudi. . . Twètù bàdi biibidilàngàne ne Mukenji wètù leelù ewu wà kùdi Mukalenge Yesù, tudi twitabuuja ne nekwikalè Bukènkè bwà dilòlò. Ne Bukènkè bwà dilòlò ebu. . .

Mu bushùwà bwà bwalu, Bukènkè bunène nebùlwe piikalà Yesù Yèyè mwinè mumwènèshiibwe pa buloba apa, anyì muulu mu Maulu mwàmwa, wàngata Mukàj'Èndè-musèla, ne pashiishe Bukalenge bwà bidimu cinunu nebùtwadije.

<sup>149</sup> Kàdi's tudi ne cìmwè cyà ku bikondo byà byèza bwòwa byà twètù kupicila, cikaadiku kacya citèèkùibwe kumpalà kwà bantu. Nèнку ndi ànu mwindile dîbà adi, nèнку patùdi mwà kupeta. . .muntu ne muntu ùdi mwà kupeta mpungà mwaba wùdi umuka ku mudimu ne upicisha ndambù wa matùkù, nèнку tudi mwà kukasòmbela paanshì mwaba kampànda wùndi mwà kwakula pa Bipùpu abi ne bikwàbò bìdi ne cyà kukùluka mu matùkù à ndekeelu abi; ne kupicishilakù mbingu mitwè ku yibìdi anyì yisàtù pàmwè, ne kutwàla aci pàmwè, bu Mukalenge mwà kundama ne mwoyi bwà kucyènza ne munsonsòle bwà kwenza nàнку, kumòna mwikalà bintu abi mwà kudibwinkamù, ne Mikungulu ayi. Dîbà adi nenùsanganè cìdi muntu awu ne bantu abu badìtwe mu kulòòta bwà bwalu abu, ne bintu byònsò ebi kuntwaku, nebyènzekè; nwamònu's, nenùmòne cyàkabuululàbi, Mukungulu munène awu ùpàtuka mu—mu maulu. Mpindyewu, mu bushùwà bwà bwalu, musumbà mujimà mu nwènù, nudi bamanyè ne mèmè ndi mumanyè cìdi—cìdi cyòci aci cyumvwija, nudi numòna's. Nèнку, kàdi twindile ànu too ne pààlwà cikondo aci, nudi numòna's, bwà kwikalaci, nwamònu's, mpindyewu, ne necitambè kwikalà mu movù menemene.

<sup>150</sup> Mpindyewu, pa nàнку netùbalè ndambù wa Mifundu eyi—eyi munda emu. Mpindyewu, mu Makênkè à dilòòlò àlwalwà awu, mpindyewu, tudi tumòna ne nebikengelè bwà kwikalaci Bukênkè bùmwebùmwe bìvwàku mu dindà abu.

Bwalu, kakwèna dîbà kampànda mu dindà ne dikwàbò dîbà mu mapingaja to. Ndîbà ànu dimwèdimwè adi. Dîbà dimwèdimwè didi mu mapingaja adi ndidi mu dindà; dimwèdimwè adi mu dindà bu mùdidi mu mapingaja.

Mpindyewu, nCyâmbè ne: “Ditùkù dyòdì diine,” ditùkù dyà pankaci pàà cikondo aci, “nediikalè bu mùdì, kaa, bu mùdì ditùkù dyà dibungama, ditùkù dyà mîdimà. Kadiyì mwà kubìkidiibwa ne mmundaamuunya anyì mbutùku to, pankaci pàà dyòdì adi.”

<sup>151</sup> Nwamònu’s, ke didifwimbà dyà Mubidi adi’s, kuumukila ku makàsà, wènda ùbànda. PàvwàYe pànu pa buloba apa, Yèyè ùvwa Mwànà, Bukênkè abu, pashìshe Wàkashiibwa. Èkèleeziyà wàkangata kaaba Kèndè, pashìshe dishebeyiibwa bwà diitabuuja ne wàkopicila mu Bikondo byà Mîdimà, ne kubanga kwibakila pa cishimikidi wènda upàtuka. Dîbà adi lùmònu lùdi lufùmina penyi? Ku lusongo lwà mutù.

Nudi numòna cikèenà-kumòna aci anyi; cyà Nebùkàndènèèsà? TuMumòna wènda ùpweka, kacya ku cibangidilu cyà cikondo cyà bàà Bisàmbà byà bendè kumpàlà kwà Mashì kwediibwawù panshi bwàbò ne kufuta cibawu. Bàvwa beena diitaba babwejamù. Kàdi mònaayi ne cyàkapweka ànu, kupweka ànu, kupweka ànu too ne kwinshì, mu cimfwànyì, nwamònu’s, kupweka naaci ne paanshi.

Pashìshe kutwàdijilulaci, cyàlukila, Èkèleeziyà kwalukila ùumukila ku makàsà, wènda ùbànda. Mpindyewu cidi mu cikondo cyà mutù—cikondo cyà mutù. Mpindyewu mònaayi Bukênkè abu’s.

<sup>152</sup> Kwèna mwà kumòna ne byanza byèbè abi to, nànsha mùdibi citùpà cyà mubidi amu. Kwèna mwà kumòna ne maci to, nànsha mùdìwu ànu mwà kuumvwa. Kwèna mwà kumòna ne dyulu to, nànsha mùdidi dinunkila. Kwèna mwà—kwèna mwà kumòna ne mshìku to, nànsha mùdìyi yàkula amu; nwamònu’s, aci’s civwa ncikondo cyà beena Mpenta. Kàdi mpindyewu cidi mmu cikondo cyà mèsù, dimòna adi. Nwamònu anyi? Mpindyewu, kakwèna cyumvwilu cyà cinyunga dyàmwàmwà dyà mèsù nànsha. Kì mmwômò anyi?

Cidi cìlondà mmeeji, àdì Kìlistò Yèyè mwinè, Udi ukòntonona Mubidi mujimà.

Kakwèna dinyunga, munyungakeenu dyàmwàmwà dyà aci nànsha. Nwamònu anyi? Bikwàbò byònsò ebi bìvwa bìnyunga. Nwamònu anyi? Udi unyungisha makàsà èbè, unyungisha minyiinyi yà mu mikòlò yèbè, unyungisha bikwàbò byònsò. Unyungisha èbè... Maci èbè àdi mwà kunyunga, dyùlu dyèbè,

mishikù yèbè, ne bikwàbò. Kàdi paanyimà pàà mèsù èbè awu apu, kakwèna cintu nànsha címwè cyà cinyunga to.

Ke bwà cinyi bàtu bàmba ne bantu balùme bàdi bapeta mabàla ne lukàsà lwònsò, mbwalu, nwamònu's, kakwèna munyungakeenu bwà kudyundisha minyiinyi yà mu—mu nsukì, cisèbà cyà mutù to. Nwamònu anyi? Ne kacyèna ne cisòmbedi cinefùke bwà mashi àmòna mwà kwendelamù to. Mashi kaàkudicintamù to, nwamònu's, kaàkubànda bwà kufila mashi to. Mu bushùwà bwà bwalu, muji wa—wa nsukì wùdi ne mwoyi ku mashi.

Nènku mpindyewu tudi tusangana ne cyàcya citùpà, nudi numòna's, kakwèna cintu nànsha címwè cidi dyàmwàmwà dyà mèsù to.

<sup>153</sup> Mpindyewu tujandulààyaaku's. “Nekwikalè Bukènkè” (Iwà munkaci mwà ditùkù anyi?) “ku ibaamulòlò!” Bukènkè mbutùmbwe bwà cinyi? Bwà nwamòna mwà kumòna mwaba wunùdi. . . mùshindù wa kunyunguluka. Ncyà bushùwà anyi? Kumòna mwaba wunùdi nusanganyiibwa's. “Nekwikalè Bukènkè Iwà ku ibaamulòlò.”

<sup>154</sup> Mpindyewu, tudi twangata aci mpindyewu tucifwànyikija ne Maalàkì 4. Yèyè mmulayè ne nekùlwe Bukènkè cyàkàbìdi ku ibaamulòlò, nwamònu's: “Bwalu, mònaayi ne, Mémè nènñütùminè Eliyà mupròfetà, ne yèyè neàlujululè bàna abu—abu kùdi baataatù, ne baataatù kùdi bàna,” (mmwómò anyi?) “bwà Ncìlu kutuuta buloba ne mulawu.”

<sup>155</sup> Mpindyewu twàngatàayi Yone anyi. . . Luukà Munsantu 17:30, kàdi tàngilàayi nùmonè cyàkambà Yesù mu cipròfetà mwaba awu, wàmba ne: “Ànu mwàkadìbi mu matùkù à Sodomà, nebìikalè cintu címwècímwè aci. . .”

Mpindyewu vùlukàayi, mònaayi ne, eci nku cikondo cìvwà Mwànà wa muntu ne cyà kubuuludiibwa; dibuulula dyà Mwànà wa muntu. Mpindyewu, Mwànà wa muntu awu wàkabuuludiibwa mu mùshindù mushààdìle, ànu bwà katancì kakesè cyanàànà kuntwaku, ànu pabwìpi menemene ne Sodomà kwoshiibwa. Mpindyewu, Muntu awu ùvwà Elohim. Úvwà n'Nzambì; ne Yesù ùdi Nzambì. Nènku Nzambì wàkabuuludiibwa mu mùshindù mushààdìle ànu mwaba awu bwà katancì kakesè cyanàànà, bwà kuyiikila ne Abraham, mu dikenketa dyà cilumbulwidi. Ànu bwà katancì kakesè cyanàànà, Mwànà wa muntu wàkabuuludiibwa; Mwànà wa muntu, Elohim. Nudi nucimòna anyi, nwènù èkèleeziyà? [Disangisha dìdi dyàmba ne: “Amen.”—Muf.] Mwànà wa muntu, Elohim, wàkabuuludiibwa ànu bwà katancì kakesè cyanàànà. Bwalu, dindà mene dyàkalondà cyòci kwoshiibwa, (dìbà kaayi?) kumpàla kwà dìbà kupàtukadi cyàkàbìdi.

Nànku kakwèna mwà kwikala bulongolodi bushààle, anyi mwà kwikala dilubuluka kampànda dikwàbò kutàmba

cìdì munkaci mwà kwenzeka mpindyewu eci nànsha, bwalu cyôci nocyôshikè kumpàlà kwà ditùkù adi kucyàdi cyàkàbìdì. Ditàbuluja dyàjiki, mu ditùngà dijimà. Kakwàkwikala kàbìdì matàbuluja to, matàbuluja manène à àkônga bantu nànsha; ditùnga edi kadyàkudìpetakù nànsha. Nudi bafwànyine kwikala ne cisangilu cyà mamanya à mu mitù. Kàdi, ndi muswè kwamba ne, ditàbuluja dyà Nyumà edi, tukàadi badìmòne dyònsò. Ndi ntékemena ne nudi nucyùmvwà. Ndi ncyàmba mu mùshindù wà ne—wà ntékemena ne nudi nucyùmvwà. Nwamònu anyi? Nkujikè.

Mwambi kampànda wa maalu malenga ùvwa wamba, katanci aka, wàmba ne: “Mwanèètù Branham, ngìkalakù ànu ne disànkà dyà Mukalenge mu mwoyi wànyì’s wè!”

Mèmè ne: “Mwanàanyi, ditàbuluja ndijikè.” Nwamònu anyi?

<sup>156</sup> Patùdì twakulangana apa bibàtamiji bikaadi bimana kutèeka pa màzuwà à màyi. Mavwala manène à ènza bwòwà ngwòwù aa kumpàla kwètù; kàdi tudi bamanyè ne, ànu dyàmwmwà dyà òvwala adi kwàka, tukaadi twenda tuseemena pabwìpì ne mwelelu awu. Nwamònu anyi? Tukaadi twenda tuseemena pabwìpì ne mwelelu. Shààlaayi ànu batùükije. Shààlaayi ànu mu Díyi. Shààlaayi ne Nzambì. Nànsha wèwè udyùmvwà bishi, anyi ní ncinyi cikwàbò; shààlaayi nwènù ànu ne Díyi. Cìlekèlaayi—cìlekèlaayi—cìlekèlaayi cìshaalè cìbàtàmè, panùdì numòna mavuba wònsò manène aa matùnyùngùlùkile, ne mvùla yà bipùpu yilwa, ne bombè bwà mushindà abu, ne bikwàbò byònsò bidìbo bàakula abi. Kàdi cìbàtamiji cyètù cidi ànu buludi mu Díyi. Nzambì mmwàmbè ne necìikalè mwab’ewu; netùbandè pamutù pàà dyònsò dyà ku wòwù awu. Èyo, netùye ànu buludi ku lusongo lwàwù aku. Èyowà’s, bushùwà! Wòwò, kaèna mwà kutùtùkija mu màyi to. Kaèna mwà kutwìnyisha mu màyi to. Wèwè mutwele mu lukità; netùpatukè cyàkàbìdì. Ki cyònsò cìdiku ncyôci aci. Kakwènakù mùshindù nànsha wùmwe pa buloba bwà kuwùlamina mwinshi amu to. Netùbande kumutù kwà dyònsò dyà ku wòwù, bwalu Kàpìteena wetù Munène ùdi munkaci mwà kubìikila luseke lukwàbò.

Tudi bèle lwongo mu Yesù, nèntambè bipùpù byà mu nsòmbelu;

Ndi mwèle lwongò mu Yesù, ncyèna ncìina ní ncipepèlè anyi mavwala to;

<sup>157</sup> Cyònsò cìdici cifwànyine kwikala aci, cìlwe. Cìdì mwà, cìikalakù, kacýèna ne cìdici cishintulula to. Tudi bèlè lwongo mu Yesù amu mene. Mèmè ne mwoyi, nèngìikalè ne mwoyi bwà butùmbì bwà Nzambì. Mèmè mufwè, dìbà adi ndi mwà kufwà bwà butùmbì bwà Nzambì. Ndi—ndi—ndi ànu muswè ànu bwà...Cìdì bwà butùmbì bwà Nzambì, ke cìndì muswè kwenza. Pàdì aci cyònsò cìjika, ncyèna muswè kushàala ntàntà mule kàbìdì to. Ndi muswè kuya kùdi...ku



difutu dyànyì dyàkansùmbilàYe; kí ndímvwà mupete to, kàdi dyàkansùmbilàYe, dyàkampèeshàYe ku ngàsà Wendè.

158 Pa nàнку tуди tumòna ne Bukènkè bwà dilòòlò bùdi kaaba aka. Nèнку bиди ne dikwacisha kaayi bwà kwikala ne Bukènkè, pawikalà kùyì ne mèsù bwà kumòna mwà kunyùngulukaMù? Bukènkè bwà dilòòlò ncinyì? Bukènkè bùdi bùlwa, bwà kubuulula cintu kampànda. Ncyà bushùwà anyì? Kwòkò cintu kampànda *kaaba aka*, cyùdì umvwa kàdi kùyì mwà kuumvwa cìdìci to, mu mídìmà, díbà adi teemèshà bukènkè's. Mbwà kubuulula's! Maalàkì 4 ùdi ne cyà kwenza cinyì? Nwamònu anyì? Kwenza cintu cimwècimwè aci. Dikangudiibwa dyà Bitampì Mwandamutekète divwa ne cyà kwenza cinyì, mwaba wùvwà màngumba wònsò aa ènda àtètuka mu eci. . . ? . . . Mbwà kubuulula, kwela patòòke. Pawikalà kùyì ne mèsù to, díbà adi bиди ne dikwacisha kaayi bwà kubuulula? Bikèngela kwànji kwikala mèsù, dyàmbedi, bwà kumòna. Ncyà bushùwà anyì? Bwà kubuulula Maalàkì 4, kubuulula Luukà Munsantu 17:30, Yone Munsantu 14:12, kàbìdì Yone 15:24, 16:13. Ne kubuulula kàbìdì Bwàkabuulwibwà 10:1 too ne ku 7, dikàngula dyà Bitampì Mwandamutekète, ne Mukenji wà mwanjèlò wa mwandamutekète; bwà kwela patòòke, bwà kubuulula, pàdì Bukènkè bwà dilòòlò bùlwa. Mpindyewu muntu yèyè. . .

159 Mu Cikondo cyà Laòdikiyà, bantu bàvwà (cinyì?) “butakà.” Mmwómò anyì? “Mpofo.” Bukènkè bùdi ne dikwacisha kaayi kùdì muntu mpofo? Mpofo yèyè ùlombola mpofo, bwònsò kabèèna bàdishinda mu mùkìdì anyì? “Butakà, mpofo, kàdi kabàyi bacimanyè to.” Nànsha mene byeledi byàbò byà meeji mbimanè kuya, byumvwilu byàbò byà nyumà byà mu meeji abi, dyumvwa dyà nyumà. Nwamònu anyì?

“Beena mutù mukolè, badibàndishi, banangi bàà bisankasanka kutàmba kwikala banangi bàà Nzambì; bashipi bàà bipungidi, bashiminyinyanganyi bàà maalu, kabàyi ne kudikànda, ne badyombodi bàà aba bàdi bìmpè; biikàle ne cimwenekelu cyà difwàna dyà Nzambì, kàdi bàvila Bukolè bwàdì.” Bukolè bwà dibuulula; kabèèna nànsha baciitabuuja to. Nwamònu anyì? Kabèèna biitabuuja bintu bu bapròfetà to. Ne pa nàнку kabèèna bàciitabuuja to. Bàdi biitabuuja ne—ne Maalàkì 4 neikale èkèleeziyà kampànda anyì bulongolodi kampànda.

Pàakalwàye musangu wà kumpàla, ùvwa muntu. Pàakalwàye musangu mwibìdì, mwikale ne bitùpà bìbìdì, ùvwa muntu. Pàakalwàye mu mmwènekelu wa Yone Mubàtiiji, yèyè ùvwa muntu. Nwamònu anyì?

Mu matùkù à ndekeelu, pàabangà Makènkè à dilòòlò kukenka, mèsù neàtabalè ne neumonè kùyaayà. Pashiishe Mubidi ùkaadi mumana kufwimba, mwimànyine kuulu, ùnyungakana, ùnyungishiibwa kùdì Nyumà Mwimpè. Ncinyi

aci? Yêyè umwèumwè wâkawkâcila mudimu pa bapروفeta bâakafundà Bible abu, Nyumà Mwîmpè umwèumwè awu ùkwâta mudimu mu Mubidi mûle tètè ne Nyumà Mwîmpè, ùbwela mu Nyumà Mwîmpè, ùpâtuka mu dînâ bulongolodi bwônsò, mu cifuku cyônsò, mu mwakulu wônsò, ne mu bantu.

<sup>160</sup> Inâbânzà mutekète ewu, kâtu wa mu bulongolodi ebu to, anyi bulongolodi ebu...wa mu disangisha edi to. Udi ùfûmina ku mwaba mukwâbò, ne mmubwelè mu dindà emu, ùdi ne fôtô kuntwaku. Úvwa...mumupèeshe mwanâanyi wa balûme, uvwa ukèma bikolè be. Ncyèna mumanyè ní ùkaadikù muumvwè bwâ Cyôci eci anyi to. Ncyèna mumanyè to. Úvwa ne fôtô wa Mwanjèlò wa Mukalenge ewu uvwa mmu Bikondo Mwandamutekète byâ Èkèleeziyâ, Bitampì Mwandamutekète byâkakânguka, mwaba awu, pàakenzekâci. Kwambayè, kutapa dîsù paanyimà apu, ke kumônayè cyôci aci ciimâne mu dyulu, mu cilòtâ. Kâdi kwelayè dîsù paanyimà apu ne kucimòna, kumòna muntu muvwâlè bitòòke, wènda mutângile kumpâla; ne paanyimà pàaci apu, kwambaye ne cívwa cifwanângane... Yêyè ne: “Mwanèetù Branham, ùvwa ng’wèwè’s.” Ne kwambaye ne: “Wendela munda amu,” yêyè ne, “paanyimà pèbè apu, pàvwa bantu bàà meekala mashiilèshiiàngâne, bambùle mabèndelè; dyâ Géorgie, dyâ Alabama, myaba yônsò yâ mishindù mishiilèshiiàngâne, bènda bàya batângile kumpâla,” bàbânda bàkabwela mu bulombodi mùvwâ Kilistò munkaci mwâ kubuuludiibwa mu cikèenâ-kumòna amu. Kaa, àlèluuyâh!

<sup>161</sup> Tudi mu matùkù à ndekeelu, ne mu mèbâ à ndekeelu à matùkù awu’s. Nudi nuMumòna mpindyewu mu Diyì Dyèndè, ne Diyì Dyèndè dyônsò ndimwènèshiiibwe mwab’ewu mene kumpâla kwètù eku anyi? Kaa, Èkèleeziyâ wa Nzambì udi ne mwoyi, juukilaayi kuulu, Mwitâbùùjaayi ne byônsò bìdi munda mwènù. Shââlaayi bakwâte ku Lukâta lukesè lùdi munkaci mwâ Lukâta alu, nuMulekèlè àshîndamije cyenzi cyônsò ne dinyungakana dyônsò dinùdi nwenza. Meeji wônsò anùdi naawù, ikale makòntonona kùdi Kàleyi aka munda mwènù amu. Bwalu, Nzambì mmusòmbèlè ànu mu Diyì Dyèndè dyâ dîbâ edi, mu Bukènkè bwâ dilòòlò, mwikàle uleeja Bukènkè.

<sup>162</sup> Bufôfo bwâ kapulukusu’s wè! Udi mwâ kuteemesha bukènkè, kâdi kapulukusu—kapulukusu nkafwânyine kwikala kafôfo menemene byâ kakâyì mwâ kubùùka to. Cipùngulù cyena diinà eci, byendi byônsò byâ butùku ebi, ne bintu byâ mùshindù awu, bipènzù ne bikwâbò, kabyèna mwâ kumòna mundaamuunya nânsha. Kí mbimanyè ne biinè byônsò abi mbinganyi to. Kabyèna mwâ kumòna to.

Ne Makènkè à dilòòlò àfikì. Lusùmwinu lwônsò, myaba yônsò yitùyaayâ, ku bufùki, ku Bible, ku—ku mpìngù yidi Melc-...yivwâ Danyèlè mumòne, ne—ne mfùmù wa ditùkù adi, bwônsò bwâbò bàakamòna; ne bintu byônsò ebi, bantu bwônsò, mùshindù wônsò, dinyungakana dyônsò, mwaba wônsò

mu Mubidi, bilondèshile myaba ùdi ùtùleja dîbà mene ditùdi ne mwoyi. Kakwèna nkwaka mukwàbò udi mwà kulwa kumutù kwàci to.

Kùwva nkwaka wa cyanza; dinanga, Wesley. Kùwva nkwaka kampànda, wa cishimikidi; Luther. Dinanga, kacya kakùvwakù wa mutàmbe bunène to; wàkabiikidiibwa ne nkwaka wà Wesley. Bàakatùma ba-missionnaires pa buloba bujimà. Ùmwè wà ku nkwaka mitàmbe bunène yàkenjiibwà, mu cikondo cyà kumpalà kwà cyôci aci.

Pashiishe kulwakù cikondo cyà beena Mpenta; pashiishe kubwelakù minu mishiilàngàne ne bikwàbò, cikondo cyà beena Mpenta, cyà myakulu, ne dyùlù, ne bikwàbò.

Mpindyewu bìdi mu mèsù. Mbwîmpè kaayi bûdi mwà kujingila mèsù, anyi kujingila bukênkè, piikalàbi ne mèsù awu kaàvwakù bwà kumòna? Bikèngela kwànji kwikala mèsù, dyàmbedi, bwà kumòna. Ne pashiishe pàakalwà cyôci aci, Yèyè wàkakàngula Bitampì Mwandamutekète ne kubuulula Bukênkè bwà dilòlò, wàngata maalu masokoka wònsò àvwà masokoka munda mwà bikondo byà èkèleeziyà ebi awu, nènku mpindyewu kuàbuulula bu mwàkalayà Ye bwà kwenza mu Bwàkabuulwibwà 10:1 too ne ku 7. S'ki twètù aba leelù ewu basòmbe munkaci mwà Dìyì, ne Dìyì munkaci mwà kubuuludiibwa kutùdi kùdi Yesù Kilistò. Dîbà adi, *Eci's* ke Dìyì dyà Nzambi.

<sup>163</sup> Nènku biikàle bantu Bèndè, tudi ne cyà kwenda pabwîpi ne Mwenadi, bwà kuDyùmwa, bwà Dyôdi kubuulula. “Éyi Mukalenge, ncinyi ciWakèngelà bwà mèmè ewu, kwenza? Ndi mèmè ne cyà kuya mu madimi ne kuyiisha Èvànjeeliyò, anyi ndi ne cyà kushàala kumbèlu? Nànsha ciikàle cinyi, byôbi ne ndi ne cyà kwikala mukàji wa nzùbu mwîmpè, byôbi ne ndi ne cyà kwikala maamù mwîmpè, byôbi nè ndi ne cyà kwenza *cikampànda*, *cikansanga*, anyi *cikankènga*? Nànsha ciikàle cinyi, mèmè ne cyà kwikala cidimà, bu mèmè. . . Nànsha ciikàle cinyi, Mukalenge, ncinyi cyÙdi muswè bwà mèmè kwenza?”

<sup>164</sup> Aci kî ncyàkelelè Shawulà lubilà lukolè mwàba awu ne: “Mukalenge, Udi muswè bwà ngènzè cinyi anyi?” Ùwva panshi mu nj- . . . mu njila wendè ùpweka bwà—bwà kwela èkèleeziyà yònsò mu bùlokò. Kàdi pashiishe kwelayè lubilà lukolè ne: “Udi muswè bwà ngènzè cinyi?” Pàakateemà Bukênkè, bu Dikunji dinène dyà Kapyà dilembèlèle kumutù kwèndè. “Udi muswè ngènzè cinyi?”

<sup>165</sup> Ndi ngèlè meeji ne aci m'mwàkù mwîmpè wà kwimanyinapù, ne kwamba ne: “Mukalenge, cyÙdi muswè bwà ngènzè ncinyi? Pàndi mmòna Mufundu ewu mubuuludiibwe menemene ànu mpindyewu mene; Mukalenge, ncinyi cyÙdi muswè bwà ngènzè's?”

Twìnyikàayi mitù yètù.

<sup>166</sup> Ndi ndòmba bantu bwónsò mwab'ewu bwà kukenketa mu myoyi yènù mpindyewu ne kwela lukonko alu ne: “Mukalenge, Udi muswè bwà mèmè kwenza cinyi?” Ne nwènù, pìikalàbi ne nucidi ànu neetù ku nshinga yà tèlefonè mu ditunga dijimà, inyikaayi mitù yènù nukonke ne: “Mukalenge, Udi muswè bwà mèmè kwenza cinyi? Bu mùdibi ne tudi kaaba aka mu matùkù à ndekeelu ne mu mèbà à ndekeelu, ànu mu byòbì menemene kumpàlà kwètù, bibuulùdiibwe ànu menemene, cyŪdì muswè ne ngénzè ncinyi?”

<sup>167</sup> Nzambi munanga, pàdìbo bàKwela lukonko alu apa; ndi nKukonka, mèmè mwinè ne, ncinyi cyŪdì muswè bwà mèmè kwenza, Mukalenge, bu mùndì mfika ku dyumvwa ne ditùkù dyónsò dìdi ne cyà kubadiibwa. Nènku ndi ndòmba bwà Ūnkwàcishèku, Mukalenge, bwà kwikala ne mwoyi mu mùshindù wà ne ditùkù dyónsò, nedìbadiibwè bwà buneemè Bwèbè ne butùmbi.

Ndi ndombamba bwà Wèwè kukwacisha muntu ne muntu mu ditunga dijimà, ne aba bàdì kaaba aka mu tabernacle patùdì tukenketa myoyi yètù twamba ne: “Mukalenge, cyŪdì muswè bwà mèmè kwenza ncinyi? Cìndì mufwànyine kwenza ncinyi, Mukalenge, bwà ditancisha dyà Bukalenge Bwèbè ne Bwalu Bwèbè?” Enzàku nànu, Nzambi.

Tùkenkètekù, mu myoyi yètù, ne tùteetekù. Kwòkù kwikala bubi kanà bwónsò munda mwètù, Mukalenge, citù cyónsò, tulumbilà tubì twónsò ne twipàcilà, Éyi Nzambi, tùkezùlèku ne Mashi à Mwànà Webè, Yesù Kilistò, Utùdì twitaba ne didipwekesha dyónsò difuta Dyèndè dyà cibawu cyà lufù Lwèndè ne dibìikà Dyèndè dyà ku lufù. Ne biikàle babingìshìibwe mu kwitabuuja kwà ne Yèyè wàkenza cyòcì eci, tudi twitaba ne disànkà dyónsò ndongamu wa lupàndu wŪdì mutùpèeshe, kutùdì twètù.

Taatù, tudi tuKwela twasàkidila bwà Mukenji wà ditùkù edi, utùdì twitabuuja ne utùdì bakwàtekù awu, bwà kumanya ne kwitabuuja ne n'Diyi Dyèbè ne Mukenji Webè. Kabiyi bwà kupanganangana ne bakwàbò bantu to, kàdi bwà kuteeta bwà kutàmba kwikala bafwànàngàne ne Yesù Kilistò Udi cileejilu cyètù awu.

<sup>168</sup> Nzambi munanga, mìshwalà nyòyì eyi myadija kaaba aka, ne kùdì babèèdì myaba yónsò. Ne mèmè mwinè, Mukalenge, ndi mucyòke ne muzengèle, mu dindà emu. Ndi ndòmba bwà Wèwè kutùkwàcisha, Nzambi munanga. Tudi baKùtèkèmène bwà dikàndà. Wèwè ki Dikàndà dyètù. Udi mukwàcishe bààbùngi be, Nzambi munanga.

<sup>169</sup> Dìngà ditùkù, pàmvwà ngèèla meeji mu diitu amu, twenda twendakana ne Mwanètù Banks Wood, pàvwà bangàngàbukà. . . Mwoyi wèndè ùwà bibì be mu mùshindù wà kàyì mwà kunyùnguluka bipepèlè to. Pashiishe pa kwela meeji

mùshindù wúmvwà . . .nciyikù mumanyè pâmvwà kuntu kwaka apu, ngènda ngèndakana mu mikùnà ayi paanyimà pàà cikèèná-kumòna aci ndyàmbedila ne: “Ndi ne cyà kupeta nyama wa ntambwe awu. Ndi ne cyà kumòna ntambwe awu mushebeya.”

Ne pashiishe mu dipweka amu, ne mwimanè mu Tucson amu, ku Cafétéria kaa Furr aku, ne kumòna bilàmbà byèndè bimulembèlèle pambidi, mèsù èndè kacya miinamija. Mémè ne: “Nzambi, piikalàbi ne Wèwè udi mwà kuleeja cikèèná-kumòna, mwaba wùdi ntambwe awu ùsanganyibwa, ncyà bushùwà ne Udi mwà kuleeja bwà bwalu bwà Mwanèètù Wood.”

Ki pashiishe kulwaci ne: “Mutentèkèlè byanza.”

Kàdi’s ki yèyè ewu leelù ewu, mwalukile, Mwanèètù Banks cyàkàbidi, ne makànda, wènda ùbànda ùpweka mu mikùnà ayi. Mùshindù mwinè wutùdi tuKwela twasàkidila’s, Nzambi munanga. Wèwè udi Nzambi umwèumwè awu kutùdi twètù bwònsò mÙdi mufwànyine kwikala ne Mwanèètù Wood amu. Ndi mumanyè ne Wèwè udi mumunange, bwalu yèyè mmusadidi Webè, wa kweyemena ne wa meeji matòòke.

<sup>170</sup> Nènku ndi ndòmba, Nzambi munanga, bwà Wèwè kukwàta mudimu ne yònsò wa kutùdi, ne kufwàku luse ku mpèkaatù yètù, ne ondopaku màsaamà ètù à mibidi yètù. Tàmba kutùvwijakù bafwànàngàne Neebè, ku ditùkù ne ku ditùkù, Mukalenge, too ne patwàbwela mu cipidi cikùmbàne cyà Yesù Kilistò aci. Enzàku nànkù, Mukalenge. Ndi mutwìshìibwe ne Udi mukenkète mwoyi wònsò, mpindyewu, ne tudi bamanyè cyà dyenza. Tudi tulòmba bwà Wèwè kutùbènèshakù mpindyewu, mu Dìna dyà Yesù.

<sup>171</sup> Nènku patùcidi ne mitù yètù miinyika apa, kùdikù muntu kampànda kaaba aka, anyi pambèlu mu—mu ditùnga ku tèlefonè mu ditùnga dijimà, udi mufwànyinekù ànu kuswa bwà, panùdi nusambila apu, ne mutù mwinyika, ànu bwà kwela cyanza muulu kùdi Nzambi mpindyewu anyi? Ki cyònsò cyùdi wèwè mwà kwenza ncyòci aci; munda emu mmuule ntèntè mu dindà emu. Elà ànu cyanza cyèbè muulu cyanààna kùdi Nzambi, wambè ne: “Nzambi, mvwijèku mutàmbe kufwànàngàna ne Yesù. Ndi—ndi muswè kwikala mutàmbe kufwànàngana ne Yesù.” Nzambi àkubènèshè. Lwà mu ditùnga dijimà mwàmwa, kùdi byanza myaba yònsò, musumbà kawùyì kwambangana naawù. Ne cyànyì pàànyì’s, ncyelà muulu. “Ndi muswè kwikala mutàmbe kufwànàngana Nendè. Nkenkètèku, Mukalenge, ne ujangule ne kùdikù bubi kampànda mu mémè emu; ùbùmùshèku. Ndi—ndi muswè. . .” Ncinyì aci? Tudi bashààle mwab’ewu ntàntà mule be, kàdi netwikalè ne cyà kuumuka nànsha wèwè mwikàle. . .anyì, cyùdi nànsha ciikàle cinyì, wikalè mubanji, wikalè mupèlè, wikalè nsongà, wikalè mununu.

<sup>172</sup> Mwà mwimàne makèèlèlè awu ne kasùmbù ka—kakesè, kàà bantu balandike, lwà kwìnshì ku. . .ku kasùlù aku.

Kùvwa kaadiiku kakesè kuntwaku, muntu kampànda ùmvwà nyiikila nendè bwà bwalu bwà Nzambi, kùkaadi ntántà mule. Kutùùlukaye, mukàjèndè mukesè awu, ne bânà mwandamutekète anyi mwandamukùlù; yéyè, muntu mukesè menemene, wa kanyikanyi, kuntwaku útàta bwà kukwàta mudimu, bwà kupeta ndola bu yìbìdi ku ditùkù. Kàdi muntu kampànda kumwanyishila bwà kusòmbaye mu kaamutàndà kakesè. Nènku ke mukàjèndè kuntwaku, wàmba kulela mukwàbò mwànà, kàdi's mukàji awu ùvwa ne cisuuyi cinène cyà njààjàma, ùkosa nkunyi, bwà kuyìpulumuna; mwànà mupàyika ku lubèsè, wènda ùpulumunangana ne nknyi ne mukwàbò; kupwekayè bwà kukòsa lukùnyi alu, bwà kulaminyinaye mbèelebeelè ayi mu makopu's, bwà kubènga kufwà nzala mu movù wà mashika. Ekèlekèle, mùshindù mene utwàkamuumvwila luse's wè! Ke Mwanèètù Wood ne mèmè kuya kangata cisemuna aci, ne kuya kuntwaku ne kumukòsela nkunyi, ne kumutwàdilayi. Yéyè, mukàji mukesè mwikàle ne kusàkidila ewu, kacya mwimàne ànu mwaba awu. Mèmè kuumuumvwila luse. Ke twètù kutùngunuka ne kubàsambidila.

<sup>173</sup> Kàdi mwanèndè mukesè wa mu dibòko awu kukwacikayè ciseki. Twètù kuya kasambidila mwànà mukesè wa mu dibòko awu, ne Nzambi kumwondopaYè. Nènku dikwàbò ditùkù, bàyèndè kupeta dîsaama dyà kààmunda, ne kubwela mu. . .

Mvwa munkaci mwà kuyiikilangana nendè. Ùvwa ùnwa mfwankà, bùbìdi bwàbò. Mukàji ùnwa mfwankà wa cipàtu, ne mulùme ùnwa, yéyè pèndè, ànu mùtù bantu bàà ku mikùna menemene amu. Ke pashiishe mèmè kutùngunuka ànu ne kuyiikila naabò pa bwalu abu. Kàdi makèèlèlè awu mu dînda pangàakabwelàmu, lwà mundaamuunya nànkù, ke yéyè ulwàlwa ewu, byanza bivùnga, ne kwamba ne: “Mwanèètù Billy, mèmè's ndi muntu mushintùlùke.” Yéyè ne: “Nkàadi munwè wànyi mucì wà mfwankà wà ndekeelu, ne nkàadi ku luseke lwà Mukalenge.”

Mukàji awu ne: “Nkàadi munwè wànyi wà ndekeelu, mèmè pàanyi's.”

Kaa, kùna dimiinu's! “Mèmè Mukalenge ngudi mummyamine màyi. Mèmè nèndimiyaminè màyi muunya ne bufùku, bwà muntu kàlù kudinyènga mu byanza Byànyi to.”

<sup>174</sup> Éyi Nzambi, ikàlàku ne luse mpindyewu, ndi ndòmba, ne tùpèeshèku dijinga dyà mwoyi wètù, bwalu mu myoyi yètù tudi baswè kuKukwàcila mudimu. Mpindyewu, Taatù, bàdi bwònsò mu byanza Byèbè, myaba yònsò. M'bànà Bèèbè. Kwàtakù naabò mudimu bilondèshile luse, Mukalenge; kí mmu cilumbulwidi to, kàdi mu luse. Tudi tulòmba mu Dîna dyà Yesù. Amen.

<sup>175</sup> Nudi baMunange anyi? [Disangisha dîdi dyàmba ne: “Amen.”—Muf.] Ne mwoyi wènù wònsò's! Mpindyewu, nwènù bàdi ne mîshwalà abu, nudi mwà kuyipeta.

Nènkù mpindyewu, masangisha ètù, ngèèla meeji ne àdi àbanga ndambù kumpàlà kwà díbà, pa díbà mwandamutekète jaajaaja, anyi cintu kampànda cyà mùshindù awu. Mwanèètù Neville neàcimanyishè, ànu mu katanci kakesè cyanààna emu, pa díbà dyà kubanga.

Kùdikù dibàtiiza, ngèèla meeji, mu dindà emu anyi? [Mwanèètù Neville ùdi wàmba ne: “Mâyì mmamana kulongolola.”—Muf.] Mâyì àkaadi malongolola, muntu kampànda yêyè kaaba aka kàdi kàyì mwànji kubàtijiibwa mu Dìna dyà Mukalenge wetù Yesù Kilistò to, mòna’s, ncyà bushùwà ne àdikù... Mâyì mmalongolola bwà mudimu wà dibàtiiza.

<sup>176</sup> Tudi twanyisha bakwètù bambi bwònsò abu. Ndi mmòna Mwanèètù... Disangisha dyèbè divwa bìshi, divwa dipite ànu bìmpè anyi, Mwanèètù Parnell? Nènkù Mwanèètù Martin, ne, kaa, bààbúngì bàà kùdìbo mwab’ewu, Mwanèètù Lee Vayle. Kaa, kùdi ànu bambi mu mwaba wònsò ewu. Ncyà bushùwà ne tudi twanyisha munùdi kaaba aka, nwenza neetù bwobùmwe banyùgùlùkile Dìyi.

<sup>177</sup> Pàmwàpa nudi bafwànyine kubènga kupetangana naanyi ànu menemene pa Bwalu ebu; ncyèna nnulòmba bwà nwènu kupetangana naanyi to, nudi numòna’s. Cintu cimwèpelè, nudi ànu nuCítwa mushinga. Cyùdi wèwè ungambila aci, mèmè ndi ncítwa mushinga. Bu bambi mwà kwangata mukàbà wà mèyi ewu, ne bwòbò kwamba ne: “Èè, mèmè’s ndi mbèngangana naawù.” Abi’s mbìmpè, mwanèètù wanyi. Pàmwàpa wèwè mulami wa mikòòkò kampànda; udi—udi uyidiisha cyònsò cyùdi muswè aci.

Ndi nteeta ne mwànyì mwònsò bwà kushààla ànu ne Dìyi, bwà aba bàdi batèèkiibwe mu byanza byànyì bwà Nzambì, bwalu mikòòkò yitu miswè byàkudya byà mikòòkò, mu bushùwà bwà bwalu. “Mikòòkò Yànyì yìtu yùmva Dìyi Dyànyì.” Nènkù ke kutùdi twètù tupetela mwoyi aku’s, Dìyi dyònsò didi dipàtuka... Kì ndyònsò... Kì ng’ànù Dìyi kampànda apa ne pàapa to; kàdi Dìyi dyònsò didi dipàtuka mukana mwà Nzambì, ke ku dyòdi adi kùvwà kùkèngela bwà bansantu kwikalabò ne mwoyi aku.

Tùjuukilàyaaku kuulu mpindyewu. Patùdi twinyika mitù yètù apa... .


Nènkù Mwanèètù Neville, udi ne cintu kampànda cyùdi muswè kubàmbila anyi? [Mwanèètù Neville ùdi wàmba ne: “To.”—Muf.] Mwanèètù Mann? Èyo.

Bantu bwònsò bàdi bàdyùmva bìmpè anyi? Ambàayi ne: “Amen.” [Disangisha didi dyàmba ne: “Amen.”—Muf.] Èyo.

Mpindyewu twìnyikaayi mitù yètù.

Nêndombèku Mwanèètù Lee Vayle ní udiku mwà kulwa mwab'ewu, anyì pìikalaye ne mùshindù. Bu wêwè mwà kufikakù, Mwanèètù Vayle, bu wêwè mwà kuswà.

Mwanèètù Vayle mmwanèètù kaaba aka, mufùndi wa mikàndà. Ne yêyè ùdi munkaci mwà kulongolola mukàndà awu mpindyewu: *Bikondo Mwandamutekète Byà Èkèleeziyà*, ne ùdi munkaci mwà kukwàta mudimu ne *Bitampì Mwandamutekète*. Nènku àbìdì aa tudì tutèkemena ne netùyìpetè ànu mu matùkù makesè emu. Èyo. Mwanèètù Lee Vayle.

Nzambì àkubènèshè. 



65-0822M Kilstò Mmusokolola Mu Díyi Dyèndè Mene  
Branham Tabernacle  
Jeffersonville, Indiana États-Unis

CILUBA

©2024 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyì dya bwena-cintu

Makenji ònsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)